

h. h.
e. 21



63174/13

D

C. 11

The Library of the
Wellcome Institute for
the History of Medicine

MEDICAL SOCIETY
OF
LONDON
DEPOSIT

Accession Number

Press Mark

~~127~~ SCHELHAMMER, G.C.
2 pts.

GUNTHERI CHRISTOPHORI
SCHELHAMMERI,

ACADEMIÆ HUCUSQUE JENENSIS NUNC CIMBRICÆ
PROFESSORIS

ΟΓΚΟΛΟΓΙΑ PARVA

SEU DE

HUMANI CORPORIS
TUMORIBUS

EORUMQUE LEGITIMA CURATIONE

LIBER

AD RECENTIA VERIORAQUE DOGMATA ACCOMMODATUS
NOVAQUE METHODO ADORNATUS.



JENÆ,

Apud JOHANNEM FELICEM BIELCKIUM.

ANNO MDCCXXVII.

THE UNIVERSITY OF CHICAGO

LIBRARY

ACADEMIC DEPARTMENT OF THE UNIVERSITY OF CHICAGO

CHICAGO, ILL.

OF THE UNIVERSITY OF CHICAGO

1900

HUMAN CORPUS

TUMORIBUS

FOR THE UNIVERSITY OF CHICAGO

BY J. H. B. S.

AD. RECENTIA VITAE ET MORBI ET ALIIS REBUS
HUMANIS ET ANIMALIBUS



1900

MUSEUM OF THE UNIVERSITY OF CHICAGO

LIBRARY

REVERENDISSIMO, SERENISSIMOQUE
PRINCIPI AC DOMINO

DOMINO
FRIDERICO
HÆREDI NORWEGIÆ,
POSTULATO COADJUTORI
EPISCOPATUS LUBECENSIS,
DUCI SLESWICO-HOLSATIÆ,
STORMARIÆ ET DITMARSIAE
COMITI IN OLDENBURG
ET DELMENHORST,
DOMINO MEO CLEMEN-
TISSIMO.

GUNTHERUS CHRISTOPH. SCHELHAMMERUS
HOC QUICQUID EST OPUSCULI

SUB IPSA

FELICISSIMA REGIMINIS AUSPICIA
GRATULABUNDUS
HUMILLIME OFFERO.



SERENISSIME PRINCEPS

DOMINE CLEMMENTIS-
SIME,



*Ui peregrinas ter-
ras adeunt, novas-
que eligunt sedes,
eos hæc prima ma-
net ante omnia cura, ut quo-
vis pretio placatos inhabitan-
dæ*

EPISTOLA DEDICATORIA.

de regionis, propitiosque habeant Deos.

Sic pius Æneas, optata ad
littora vectus,

Ut primum sensit, fessis jam
dare quietam

Fata domum, Genium loci,
primamque Deorum

Tellurem, Nymphasque, &
adhuc ignota vocavit

Flumina.

Idem & mihi hodie incumbere, nemo non intelligit, dum à Magno Parente Tuo, nuper ad astra sua maximo

EPISTOLA DEDICATORIA.

*bonorum omnium luctu relato,
ex media Germania evocatus,
recens incola in Cimbriam
Tuam appuli: in eo felix, quod
non diu mihi ambigendum,
aut ignota Numina vocanda
sint, sed in solio Paterno collo-
catum, Paternæ non minus
gloriæ quam ditionis hæredem,
serenissima circumfusus luce,
suaque ipsa fulgentissima ma-
gis radiantem, suspicere li-
cet illico ac venerari. Nem-
pe Tu Genius loci benignis si-
mus, Te Rivorum, Telluris-
que*

EPISTOLA DEDICATORIA.

*que & Fluminum præsidem
unice omnes celebrant, late-
que profitentur. Accipe er-
go exiguum hoc munusculum,
quod ad aram CELSITU-
DINIS TUÆ supplex ap-
pono; & ad id illos converte,
quibus mare Tuum ad litora
impetuosius advolutum com-
ponis, pacatissimos vultus,
quos placare muneribus nun-
quam opus est, nunquam cor-
rugata fronte tremendos,
nisi in legum violatores &
transgressores improbos,
inju-*

EPISTOLA DEDICATORIA.

injustitiam, scelus, & consimilia terrarum monstra intueantur. Quæ & causa est, quod in argumento ab illo, in quo positus es, humani generis fastigio longissime remoto occupatus, nullus tamen hæreo, sed temeritatis meæ iudicium, dum ad Tuum tribunal causa dicenda est, intrepidus subeo. Ut enim Diis lacte rustici supplicabant olim, mola salsa alii litabant, nec ulli erat vitio, Deos colere quoquo modo possit, sic ego veniam impetra-

EPISTOLA DEDICATORIA.

*petraturum me confido, ea ad-
ferens, quæ in proprio fundo
nascuntur, si non eximia, at
mea tamen, & in quibus haut
verear ut exteri obtrectatores
compilatum & transcriptum
ex aliis sine iudicio opus ca-
villari audeant.*

*Non sum Alexander, quem
Asiæ domitorem adremigan-
tem hasta terram percussis-
se, veluti transfixurum, au-
ctores memorant: ad ejus ta-
men exemplum in morbos im-
perium affectans palam, lan-*

EPISTOLA DEDICATORIA.

ceolam, Chirurgorum ferramentum, sed incolis terrarum innoxium, figo; ad nutum me componens Divini Numinis & Tuum: forte majora etiam, si juberet, ausurus, & quæ ad rempublicam propius attinerent, Socerique immortalis umbram, memoriamque reducant.

Sed patere etiam hoc culpam meam diluere, DOMINE, quod novi Principis novus subditus, eandem in hoc sortem submissa cogitatione volvens, liberioriorem ad Te aditum mihi da-

EPISTOLA DEDICATORIA.

ri, intercedentibus Fatis, existimaverim. Quid porro sub hæc felicissimi Regiminis Tui auspicia aliud moliri, quid animo agitare aliud, aut ore proloqui possem, nisi quod omnium mentes Tuorum, pariter occupat? Id agentibus universis ac singulis, ut in vota & gratulationes hilares lætæque voces erumpant. Solem orientem tanquam summum juxta & jucundissimum numen adorare, Persarum solita erat superstitio: Quanto

EPISTOLA DEDICATORIA.

*causatius ego in eadem, sed ci-
tra injuriam Numinis æter-
ni, hodie pietate versabor? Et
vero quo verterem oculos me-
os advena, quam ad solis Tui
fulgentissimum jubar, quem
sub ipsum adventum meum ex
Oceanis undis pulcherrime ex-
surgentem, perque hunc totum
tractum Borealem, & per Bal-
ticum sinum radios jucundissi-
mos undiq; diffundentem con-
spicio, ut si maxime velim, ne-
queam evitare? Aspice ut
ineunte vere, lætius omnia te-
pore*

EPISTOLA DEDICATORIA.

pore illo mitissimi ignis Tui repullulent & evirescant! Nec terræ tantum sinus, sed hominum quoque recludi ingenia tam Augustæ lucis ambitu, expectandum est: Cujus ipse quoque benignissimis radiis illustratus, & facile in novo solo radices agam, & ingenii fecunditatem probare omnibus potero, neque erit metuendum mihi unquam, ne in frigido climate, & ad verticem mundi posito obtorpescam. Salve igitur **CELSISSIMA PRINCEPS,**

EPISTOLA DEDICATORIA.

*exoptatissimum terrarum sidus!
diuque ac felix Germaniæ, in
cælo isthoc Imperii resplende!
Nullæ valetudinis adversæ
maculæ orbis Tui nitorem vi-
tient, non aura maligna un-
quam obnubilet serenitatem
Tuam: quiescat Austri nim-
bosi turbulentia, sileant Aqu-
lonis mugitus ac murmura, &
placidum ventis, pacatumque
utrumque mare, perpetuam
Tibi tuisq, servet tran-
quillitatem!*

Lectori

* * *

Lectori benevolo

salutem!

Morborum ut non unum genus, sic multum etiam diversa est curandi ratio: alii enim Diæta potissimum, alii manu, alii medicamentis tolluntur; estque præterea proprium aliquid & loci & temporis, aliorumve, quæ nisi cuncta in numero habeat Medicus, & reputet probe, multum infelicitè in re sua versetur, necessum est. Primo tamen loco nominatorum præcipua est consideratio, tantaque dignitas, ut tantum non singula integris morbis sufficere, olim fuerint visa. Quod ex Celso patet, qui etiam ipse hanc rationem secutus, prioribus libris quos de Re Medica composuit, quartoque potissimum, illos tradit, in quibus victitandi ratio plus valet, quinto & sexto, qui medicamentorum plurimum exigunt, septimo demum ad eos, in quibus plus manus proficit, progreditur.

Quam contemplationem, cum utilisissima sit, neglexit tamen fere posterior, nostraque ætas, & ubique medicamentis pugnans, non chirurgica

EPISTOLA

rurgica tantum auxilia minus excolit, sed illa etiam quæ ex victu petuntur, fere contemnit, nec justo habet in pretio. Quantumvis enim ubique Diætæ fiat mentio, ut nulla prodeat tam exigua dissertatio, quæ non hujus quoque titulum ostendat, nec illa tamen præscribitur, quæ morbum magnopere levet, aut in quo aliquid sit præsidii, & postremo demum comparet in loco, cum in primo ordine, primaque acie sæpe foret collocanda. Sunt enim non pauci magni morbi, & qui oppropria nostra audiunt palam, quos potius illa, quam comparatis multo labore remediis vincas atque extermines.

Tales sunt Hydropis, Podagra, Scorbutus, aliique bene multi, qui vel in humorum perversa indole, vel abundantia, vel quorundam innatantium, vel etiam subtilissimi quod per nervos vagatur fluidi vitio radican- tur. Hinc cura lactis Phthificis permultis profuit; Hydropicis tolerata æquo animo sitis; Hystericis moderatio animi; quibus menses segnius procedunt, largior potatio; qua una plures a me mulieres, quam ab aliis forte medicamentorum ope restitutæ sunt; In permultis etiam morbis non parva utilitas est potus Thee, ut is non sine causa magni quibus.

AD LECTOREM.

quibusdam fieri soleat, ad Diætam itidem pertinent.

Quibus vel paucis exemplis, sed luculentis discitur, quanti Diæta in magnis ac diuturnis sit facienda, & quam procul absit a vera Medendi scientia, qui omnia hodie paucis guttulis eunt sublatum. Non is sum ego, qui veterem morem reductum velim, quo in diversa succedentes Medici, alii victu tantum, alii Medicamentis, alii ferro manuque opem tulisse memorantur; quin tam arcte innexas sibi has partes agnosco, ut ex toto separari se non patiantur. Veruntamen, Medicamentariæ præcipuam ubique dignitatem esse, ut hodie est persuasum, id vero nolim quemvis existimare. Ut enim non sunt infrequentes affectus, quibus Chirurgia pene sola medetur, sic etiam Diætæ suum honos laudemque manere, & nonnunquam etiam primas deferri æquum est. Quemadmodum scilicet in bello, quiescentibus vel leviter turbantibus inimicis, turmatim miles, isque modo eques, modo pedes, prout res postulat solus exit, (ubi vero hunc vel illum educere expediat, Imperatorem oportet scire) at si conferere manum plena acie cogimur, totus exercitus, omnisque generis, omnis

Vide Celsi

L. II præm.

EPISTOLA

armaturæ cohortes coeunt: sic etiam in oppugnandis hostibus, qui vitæ hominis perniciem struunt, nunc medicamentis, nunc victu, nunc ferro præcipue pugnandum, aliis collocatis post principia: in pertinaciter vero resistentibus, demum ex omni remediorum angulo arcessendæ sunt auxiliares copiæ.

Quæ ut in aperto sunt, facileque ab omnibus agnoscuntur, sic evenit tamen, ut sicut olim per victum curandi ratio, auctore Asclepiade, a Medicamentaria; sic mira temporum revolutione hodie ab eadem Manualis opera secessum fecerit. De illa notabilis est locus, nec vulgo notus Aurelii Cornelii Celsi; *Horum (medicamentorum) usum ex magna parte Asclepiades non sine causa sustulit: & cum omnia fere medicamenta stomachum ledant, malique succi sint, ad ipsius victus rationem potius omnem suam curam transtulit.* Est autem is ipse Asclepiades, de quo in præmio libri primi dixerat, eum medendi rationem ex magna parte mutasse. Chirurgiam vera corpore suo avulsam nobisque fere ereptam penitus, nemo ignorat; qua de re Johannis van Horne extat querimonia. Nec alii tacent: quamvis si ex ipsis postea scisciteris, ubinam locorum qui in omnibus

*Lib. 7. In-
troit.*

*Microtechn.
Part. I.
sect. 4.*

AD LECTOREM.

mnibus æq; excellant, reperias, tam paucos nominare possint, ut Chirurgiæ titulus jure medicinæ ademptus videri possit. Aequissimum interim est, unam artem putari, quam triplici præsidio instructam augustiorem incedere velim, ita tamen, ne nomen Diætæ aut Chirurgiæ falso præferat, sed utramque suo loco educat in aciem, & ubi exigit morborum causarumque series, pugnare faciat idoneis armis, sitque Medicus Imperator pariter horum omnium callens, nec in unis Chemicis præparationibus, iisque paucis, quod hodie a multis fit, acquiescat: Sic enim persuasum nunc fere est, si modo quis scrinia remediis ejusmodi, nudius tertius natis referta habeat, quæ symptomatis singulis ex templo possit objicere, totam se medendi artem exhaustam possidere.

Sed de his, & forte etiam morbis victu emendandis, alias vel ab aliis perscribetur. Mihi nunc **DE TUMORIBUS** acturo, alia difficultas objicitur, quam priusquam ad ipsam eorum naturam exponendam accedam, e medio par est tolli. Dubitari videlicet non sine causa potest, ad quemnam tumorum, ulcerum, vulnerum sanandorum doctrina omnis pertineat, Medicumne pharma-

EPISTOLA

cuticum, an vero Chirurgum. Tametsi enim ad hunc eam omnis retulerit antiquitas, neque nunc quidem facile vel Medici ea curanda suscipiant, vel ægri super illa ipsorum opem implorent, nihilominus quicquid medicamentorum hic opus est, (sine quibus tamen vix levisimum vulnusculum potest sanari,) id omne protenus ad Chirurgos nihil attinere, adeoque ex horum libris penitus proscribendum, eorum longe doctissimus Johannes van Horne, decus seculi, non contemnendis argumentis haut ita pridem contendit, & quibus hoc observatum haut fuit, Guidonem, Vigonem, Tagaultium, Vidium, Fallopium, ceterosque seculi, proxime elapsi scriptores, eo nomine severe increpuit. Quæ si nostris chirurgis eripias, miserrimi barbitonfores balneatoresque, qui nunc artis excultoribus peritissimis vix parere amplius volunt, peribunt fame, aut brevi saltem ad incitas redigentur. Id interim perspicuum est, nusquam recte isthæc inter se confundi, neque olim id a quoquam veterum & elegantiorum Chirurgiæ scriptorum Hippocrate puta, Cornelio, Galeno, vel quoquam ex illis antiquis, quotquot eorum temporum naufragium evasere, factum deprehenditur. Nec
de

AD LECTOREM.

de Philoxeno, Gorgia, Sostrato, Apollonio, Ammonio Alexandrino, Tryphone, Euelpide, ceterisque qui media inter Hippocratem Celsumque Aetate floruerunt, nunc vero periere, magis credibile est. Quin Aetius & Aegineta diu post istos viventes, de affectibus in quibus genus utrumque juvare possit, binis diversisque locis agere maluerunt, quam committere, ut plenariam omnemque curandi rationem uno impetu absolventes, methodi doctrinae minus observantes viderentur.

Quid ergo? numne omnem medicamentorum vim, ac parandi rationem Chirurgum convenit ignorare, an potius Clarissimum Horonium ipsum se decepisse fatebimur, omnemque simul antiquitatem sibi in hoc defuisse? Neutrum dixerim bene isthæc, recteque accipienti esse admittendum. Primum enim planissimum id est, Chirurgus, qua talis est, præter applicationem emplastrorum, unguentorum, linimentorum, aliorumque forte ejusmodi nihil cum his esse negotii oportere: dicitur enim a manuali opera; componere vero, coquere, præparare medicamina, non interna solum, sed externa etiam, solida, fluida, mollia, artis pharmaceuticæ esse opus;

c 3

Unde

EPISTOLA

Unde & in Pharmacopoliis omnis generis præsidia chirurgica asservantur, & prostant venalia. Ex quo satis apparet, distinctas esse has partes, recteque Cl. Hornium monuisse, non esse isthæc inter se temere confundenda, sed quæ manuum opera peraguntur, in scholis seorsim tradenda, alibi medicandi materiam exponendam esse, ne animi discentium varia longeque invicem dissipta doctrina turbentur: quod consilium veteres secuti, optime sane & arti & ἰατρῶν πανσι consuluere. Ut autem hæc ita se habeant, longe tamen certissimum est & hoc: Non licere ullo modo Chirurgum vires & efficaciam medicaminum ignorare. Ipsius enim utique esse partium, Tumores, Ulcera, Vulnera & reliqua ejus generis sanare, eorumque unice habere curam. Ecquis enim non videt, tumores ad partem illam, quæ Διαίρεσις audit, omnes pertinere? tamen si enim non omnes aperire statim par est, sed prius discussioni dissipationiq; materiæ studendum, non tamen nisi in paucis & quasi per accidens, quod dicitur, locum ea habere, nec ubique constat: deinde & in iis ubi tentatur, non semper succedere, quod si fit etiam, apponi tamen aliquid, res postulat, quod omnino Chirurgi est officium.

AD LECTOREM.

officium. Scire autem ipsum oportet, quid apponendum sit, si voto suo damnari optet. Ut vero de tumoribus id patet, sic vulnera & ulcera ad *σύνθεσιν* referenda esse, unionemque partium, est longe clarissimum; quæ tamen citra medicamina obtineri nequit. Id porro extra dubitationem ponunt omnes doctrina præstantes viri, ut ad finem ultimum in disciplinis earumq; ordine perpetuo respiciendum est, sic quorsum unumquodq; pertineat, illum unice docere ac terminare.

Videlicet, ut in aliis rebus non illico ad hunc licet properare, sed intercedere varia multaque sæpe oportet, antequam optatum exitum attingas, sic etiam in his sese res habet: Tumor antequam aperiri queat, emollienda primum est cutis coquendaque materia; vulnus, ulcus, mundandum; inflammatio arcenda, & reliqua *ἰατρικὰ* solita superanda sunt, antequam de consolidatione cogitare queat. Quisquis proinde hanc se curaturum profitetur, reliqua etiam præstare sciat necessum est, neque propterea Chirurgus non est, quia pharmacorum peritus, quo pacto & ex quibus isthæc fieri soleant, callet.

Ut ergo illa seorsim addiscenda sint, quod methodus disciplinarum id omnino postulet, quando

EPISTOLA

quando tamen ad ipsam rem ventum est, ut profliganda sint mala, aut illa singulis medendi ars plenius docenda veniat, frustra hæc invicem separe: quin imo, si ex schola protrudas foras, qui Microtechnen Hornianam, vel simile quodcunque syntagma chirurgicum ad unguem sciat, vix tamen ulcus sanandum vel exiguum tumorem ipsi discutiendum tuto committas: Nimirum in scholis ac libris fingere talem Chirurgum licet, imo sic fingi discipulos par est, resque exigit: Ast inde egressus in publicum, & ipsam Palæstram, vix talem, nisi in republica forte Platonica, invenias hominem. Unde nec ceteri, quos laudat Hornius, Medicaminum formulas prorsus neglexere, nec ipse a commemoratione præcipuorum penitus abstinere potuit, sed circa finem opusculi prope totus in eo occupatur.

Ut ergo tandem hæc concludamus, sic ad speciem pugnantes illas sententias conciliaveris: Aliter tyronem, aliter ad artis opera jam animum applicantem chirurgiæ auditorem esse instruendum. In principio nempe & manuum operationes ordine ac veluti in compendio tradendæ, & medicamentorum conficiendorum ratio eorumque vires proponenda sunt, ut in utroque

AD LECTOREM.

troque jam satis versatus, neque inexercitatus plane ad nobilem illam & arcanam, qua curandi ratio acuratus traditur, partem accedat. Quæ dein quomodo in unoquoque affectu a principio ad finem se gerere debeat, quid horum quando usurpare conveniat, uberius pleniusque explicet: sic enim demum fiet, ut ad artem feliciter exercendam possit cum fructu ac spe plenus accedere. Neque enim alia est Chirurgicorum externorumve quam reliquorum affectuum ratio, ut in illis magis quam his ex institutionum libris ut vocamus, ad praxin protenus transilire se posse quisquam præsumat.

Adeoque jam non amplius in obscuro est, quid commoverit Clarissimos illos seculi prioris auctores, ut medicamentorum quoque mentionem facerent, neq; ex toto eos in hoc aberrasse a scopo; quin plus etiam, quam si pharmaceutica omisissent, utilitatis attulisse existimandi sunt: formant enim perfectum, non ministrum Chirurgum, id agentes plane, quod illi, qui Praxin Medicam amplissimis operibus tradidere, quam integram sine his describi non posse, sole Meridiano est clarius: vendicarunt autem
d sibi

EPISTOLA

sibi illam præcipue partem, quæ manuum opera utitur, & ceu alii de capitis, ventriculi, uteri morbis seorsim differunt, sic ipsi de externis, magisque obviis malis; in eo forte uno accusandi vel culpandi, quod quæ supponere debebant remedia, ipsi descripsere: Etsi nec in hoc sine exemplo peccaverint, id per omnes Practicorum libros obtinente: nec injuria, si singularis efficacæ, nec alias cognita medicamenta forte excogitaverint.

Sed jam porro etiam, quid de Chirurgis nostris sit sentiendum, patet. Sunt nimirum isti non simplici modo Chirurghi, sed medicinæ universæ partem profitentur atque exercent: pari enim modo, quo Medici olim in Aegypto extitere, quorum alii oculis, alii capiti, alii aliis partibus male habentibus medelam facerent, sic isti ulceribus, vulneribus, tumoribus, luxatis, fractisque ossibus suam operam addixere: Veris interim Medicis neutiquam accensendi, siquidem optimos libros, in quibus medendi ars vera traditur, plerumque negligunt, experimentis potius & usu nitentes. Partem enim quam exercent, nostrates quidem, plane mechanicam fecere: quippe quam nemo eorum ex methodo calleat, aut per

AD LECTOREM.

per certas addiscit regulas, sed ex solo usu. Neque enim anatomes, nec disciplinæ de virtutibus simplicium justum pretium ponunt, quod a veris Medicis doctisque fieri omnino necessum est: Verum non aliter quam sutores, sartores, alii-que artifices mechanici, pueros suos nullis præceptis imbutos ad operam admittunt, cœcoque dirigunt ductu. Et quamvis in Gallia paulo magis studeant isti, sunt tamen nostratibus nihilo, vel parum meliores, unde in scribendis libris Chirurgicis mirifice etiam ineptiunt, ne de Italis nunc quicquam dicam.

Vnde etiam quales hodie extant, pristinam dignitatem recuperaturos, & nobili loco habendos aliquando esse, ut optavit Nobilissimus Hor-
 nius, sperari non potest: maxime, cum & vili barbitonorum vel balneatorum munere simul fungantur, quod ad manuales quidem operationes pertinere, sed infimæ notæ, nemo est qui nesciat. Fieri vero id tum demum poterit, ubi utrumque hoc correxerint, studiis Latinæ Græcæque linguæ se dederint amplius, & ex lege artium nobiliorum profecerint, puerisque postremum suis reliquerint quidem viliora ista opera,

EPISTOLA

sed ea lege, ut artificum primæ classi adscripti, illico eadem penitus omittant.

Quod, quo minus sperandum est, (quis enim credat facile futurum, ut viliores animæ, quales plerorumque eorum sunt, ad altiora ista, nullo invitati præmio, adspirent, & qui nunc in desidia sua possunt nulla opera pinguescere, ab otio & lubricine convertantur ad labores?) tanto magis optandum foret, ut cum Arte reliqua tandem Chirurgice rediret in gratiam, seque sororibus suis Germanis denuo adjungeret. Verum hoc longe etiam est a spe omni, si quid judico, remotius: Nisi enim de integro veteres Medicinæ mores, & eam perdiscendi ratio reducatur, vix fieri unquam, quod optamus, potest. Necessaria scilicet forent sequentia: Institutio a puero, qualem Asclepiadei suis adhibebant, qua a levioribus incipientes, ad majora & difficiliora successive opera perveniant, neque statim ad quævis admittantur, neque viliora ministeria primis annis refugiant, quibus tum in medicamentis, tum instrumentis ceteris Medicinæ pernoscentis, eorumque utendi modo exerceantur: dein adolescentes facti, componendis medicamentis, partibus cogno-

AD LECTOREM.

cognoscendis, & sectionibus corporum, ligaturis item Chirurgicis (quod hodieque fit in Gallia) dent operam, nec pigeat illos emplastra, unguenta aliaque percoquere quæ nunc Pharmacopæorum pueri præparant: Addamus & Chemicas destillationes varias, quibus nostrum seculum præprioribus sibi gratulatur. Posthæc etiam ipsi manuum operationibus se exerceant, luxationes, vulnera, fracturas, ulcera curanda suscipiant, & medicamenta ægris adplicare exhibereque nihil vereantur. Novissime ad Baccalaureatum ac sacra illa admisi, quæ βεβήλοισι communicare nefas est, & sub Magistro in reliquis etiam artis operibus aliquandiu exercitati, supremo utriusque Medicinæ titulo insignes, universam artem cum laude & emolumento mortalium profiteantur.

Hæc inquam nisi reducantur ad pristinum morem, non est quod speremus optatum Clarissimi itidem Hornii, aliorumque votorum successum. Quæ non eo a me animo proponuntur, ut ita fieri postulem, aut velim: Quam enim ab hac ratione alienus sit genius seculi, haut equidem ignoro. Longe sane alius est animus illorum, qui Reipublicæ negotiis præsunt, (abs-
d 3 que

EPISTOLA

que quorum tamen ope talia fieri non possunt, imo forte nec cum hac quidem,) quam ut huc se demittant: longe aliæ eos cogitationes exercent, quam quibus pacis artes ac studia, & medendi in his ratio queat promoveri: alias in facili foret, alio quoque modo, & forte minori negotio Chirurgorum nostrorum collegia in ordinem redigere, ipsorum ignorantia afferre medelam, & arti istam denique partem temere avulsam restituere. Quid enim impedit lege cavere, ne quis deinceps puer, nisi linguarum, Latinæ Græcæque mediocriter gnarus, ut legere bonos auctores atque intelligere queat, ab iis instruendus recipiatur, non quisquam, nisi rigoroso Medicorum examine probatus, & Doctoris Chirurgi dignitate ab ipsis publice ornatus, in eorum recipiatur collegium: vicissim & Medicis interdicator, ne ad examina altiora, & universæ Medicinæ ambitum admittant, nisi qui minimum per annum, vel aliud præstitutum tempus sub tali Doctore Chirurgo profecerit? Sic sane & illi præstantes Chirurgi, & Medici minus ignari forent, quam nunc passim sunt, in operationibus Chirurgicis dirigendis: ut alia emolumenta reipublicæ & mortalium hinc expectanda silentio involvam.

Ve.

AD LECTOREM.

Verum enim, hæc latius prosequi, tam est ab instituti, quam temporum quæ vivimus conditione alienum: prorsus tamen intacta ea transmittere nolui, in gratiam eorum, quæ in Microtechne de his Cl. Hornius disseruit, cujus apud me & memoria, & desideria in pretio sunt. Quin ergo nunc potius, quid me ad conscribendum hoc de tumoribus compendium impulerit, aperiam.

Annus est & quod excurrit, cum Chirurgiæ primordia ut concreditæ mihi juventuti traderem, muneris publici quo defungor, ratio a me exigeret. Cumque jam in eo essem, Vir longe celeberrimus, amicus meus, & cujus apud me magna solet esse auctoritas, suadere cepit, ut Synopsis Chirurgicam, quæ M. A. Severini, summi viri præ se fert nomen, in id eligerem. Respondi, me, ne quidem esse Severini hunc factum legitimum, existimare, nec satis esse ad hodiernam studiorum rationem aptatum, etsi non indoctum istud opusculum: periculum tamen me facturum. Verum enim vero, cum stare promissis, & ipsam synopsis in manus sumere aggrederer, facile pervidi, majorem in refellen-

dis

EPISTOLA

dis aut in meliorem partem vertendis deterioribus ac falsis sententiis, quam in tradendis veris, operam ponendam fore. Et cum nemo alius esset, qui e dignitate, & ad praxin accommodate hæc tradidisset, ipse aliquid in usum juventutis componere, & eliminatis Galenicis istis quatuor principiis, quæ non sine causa seculum repudiat, verioribus & ex ipsis artis operibus repetitis eadem superstruere.

Qua in re quid præstiterim, & num quid in his quoque excoluerim artem, alii judices sint; id tamen reputantes secum, me non opus perfectum, sed breve compendium affectasse, quod in prælectionibus meis tuto & sine tædio sequi liceret: posthæc emendandum etiam, ubi quid erratum esse, vel prætermisum deprehenderim. Neque in his subsistere animus erat, sed vulnerum, ulcerumque etiam doctrinam ad recentis medicinæ leges refictam, adnexam dare: quæ tamen, cum alia inciderent, omittere coactus sum, una cum appendice de Excrescentiis, quam forte in altera editione adjiciam.

Methodum autem ingressus sum novam
qui.

AD LECTOREM.

quidem, sed fortassis non incongruam tamen. Scilicet in morborum historia tradenda iisdemque describendis id cumprimis danda est opera, ut eam seligamus viam, quæ & arti faciendæ utilis sit, & sine tædio ac confusione ad eam ducat volentes. Duplex autem talis extat potissimum, quarum altera communem multorum rationem sequitur, altera singulos pressius persequitur. Ut enim in terrarum partibus describendis præmittere non pauca, quæ omnibus vel plerisque regionibus pernoscendis inserviunt, deinde certa serie singula istis propria exponere opus est, sic in his quoque post illas, quæ in institutionibus tradi fas est, notiones nominum (debebant enim esse isthæc loco definitionum mathematicarum, ex quibus demonstratur,) bifaria ratione versari licet: Una est, quæ ad ipsam eorum naturam, causasque intendit oculos, quam secuti sunt illi, qui sub quædam summa genera eos referre conati sunt: quæ quidem ad leges analytices efficta, primum locum meretur, sed propter multiplicem morborum varietatem difficilis & salebrosa est:

EPISTOLA

Alia vero, quæ strictius insistit singulis affectibus per partes corporis ordine se diffundens: Præmitti vero altera semper debet, subsequi isthæc, siquidem bene succedere doctrinam, & per indicationes omnes, quas Medicus unice in oculis habeat necessum est, recto tramite ducere velimus ad praxin candidatos. Nam duplices sunt & illæ: Principales ac primariæ, ab ipso morbo, ejusque natura, causis, & symptomatibus petendæ; & secundariæ, minusque præstantes, illa ostendentes quæ alias coindicantia in scholis dicuntur: a parte quæ laborat, temporum conditiene, temperamento ægri, consuetudine, idiosyncrasia ejus, aliisque, quæ extra morbum quidem sunt, sed intra causarum, symptomatumque circulum comprehensa, medendi rationem performant vel varie immutant. Ex his autem postremis omnium præclarissimæ sunt, quæ locus suggerit affectus. Cum enim talis sit effectus quilibet causarum, qualem materia, in qua editur, permittit; cum talis porro sit in partibus humor, qualis vel ibi fit, vel utcumque colligitur, tales item morbos se gerere

AD LECTOREM.

rere oportet, quales sunt partium structuræ & proprietates. Et hinc specifica hodiernorum, & illa cephalicorum, stomachicorum, & reliquorum nomina unice sunt nata, cum specifica minime sint, sed remedia huic secundaria indicationi respondentia: quæ ratio, nisi ex proprietate partium ostendatur, vere sunt, quales a Galeno nuncupantur, Empirica, ceu in opere de Demonstratione Medica olim perspicue sum ostensurus.

Hanc ergo præcipuam ex secundariis indicationem secutus, per partes corporis eundo, tumores singulos exposui, eosque primum simularium, tum dissimularium, & qui pluribus sunt communes: qua in re & Institutionum scriptores, ubi de morborum divisione peragunt, auctores habeo, & rationem ipsam consentientem: credibile enim, similes cum simplicem habeant naturam, simplicem etiam curandi methodum admittere, & esse compositis illis notiora, magisque universales propositiones suggerere docentibus. Sed etiam rectius sic consuli discentium memoriæ arbitratus fuerim, quam si obtorto collo ad qua-

EPISTOLA AD LECTOREM.

tuor humores invita natura omnia rapere, & ineptis explicationibus gratiam Musis ingratiis ipsis conciliare allaborassem. Præterea ex ipsis earum natura remedia promptius invenientur, adeoque ad medicinam feliciter faciendam quoque hæc methodus conferet.

His frui, Benevole Lector: si quid humani passus sum, in novis conatibus, nec aliis trita via, boni id consule, & si non displicent ista, ut annos, vires, animum, ceteris pertextendis hujus doctrinæ partibus largitur, Deum exora. Nos autem horum desinamus, & quod nunc instat agamus.



DE



GVNTH. CHRISTOPH.
SCHELHAMMERI
De
HVMANI CORPORIS
TV MORIBVS.

SECTIO PRIOR

De lisdem in uniuersum.

I.

Tumor quid sit, sensibus facilius quam quavis descriptione cognoscitur: totus enim oculis patet. *Hippocrati* & antiquioribus Græcis *ἰδνμα*, alias etiam *Φύμα*, ut *Fallopium* docet, *Arabibus* Bothor, id est, Apostema, teste eodem vocatum est: cum tamen & *Φύμα* & *Ἀπόστημα* certo cuidam tumorum generi denotando alias inserviant, imo & Bothor, si Tagaultium audias. Marcus Aurelius Severinus, summus vir, & Chirurgorum nostri seculi Aquila Abscessus vocabulo usus est, dum eruditissimo suo libro ti-

TV MOR
Quid sit?

IV. Aph. 34.

L. de tum.
p. n. init.

A

tulum

tulum fecit : *De recondita abscessuum natura* : cum in illo de omnis generis tumoribus agat. Etsi vero hujus, ut omnium illorum, quæ incurrunt in sensus, definitiones tradere, & difficile, & vix sit operæ pretium, tamen, ne a recepta consuetudine recedere videar, aut aliorum diligentiam silentio meo tacite damnare, explorata prius illorum natura, eandem idoneis limitibus circumscribere, postea tentabimus: Interim rudius describi tumor potest, quod sit, *quando pars aliqua corporis, vel etiam totum, in molem præter naturæ consuetudinem attollitur.* II.

*Lib. de tum.
cap. I.*

Non enim omnis illico tumor in corpore morbus est, aut medicam postulat manum, sed is demum, qui præter naturæ accidit leges, adeoque vel molestiam nobis creat, vel prorsus impedit operationes partium. Quapropter nonnulli *triplex* recensent *genus*: *Naturalium*, ut humeri, capitis, mammarum, ventris, articulorum prominentias; *Præternaturalium*, de quibus hic agetur; & inter hos *mediorum*, quales sunt venter mulieris gravidæ, mammillæ ob generationem lactis, vel etiam aliàs magis quam pro natura turgidulæ. Qui tamen si ultra consuetum terminum exsurgentes, protuberent, nemo tamen eos præternaturales dixerit, cum maxime secundum naturæ ordinem contingant. Consuli hic meretur Galenus.

III.

Nec omnia, quæcunque in corpore altius exsurgunt, aut prominent, ad tumores referenda, sed ea demum, quæ non excedunt partis circumscriptionem. Nam quæ extra eam porriguntur, rectius *excrecentias*



tias appellaveris : ut Exostoses , sarcomata , polypus ,
fungos , cornua. Hæc adeo a multis morbis in nume-
ro adscribuntur : perperam vero. Cujus enim nihil
est simile in corpore secundum naturam constituto,
illius non potest in numero excessus esse , sed totum
abundat, ipsaque substantia peccatum est : neque ad
partes respicere licet , talia enim partes vocari vel ha-
beri nullo jure queunt. Verum hæc ad nos nihil
nunc attinent : id tantum volebam , non esse excre-
scencias tales cum tumoribus confundendas : neque
enim ex iisdem causis oriuntur , neque , ut istorum
multi , discuti ac dissipari volunt , sed excindi , atque
exedi , & hinc peculiarem sibi locum merito postu-
lant.

IV.

De his autem qui vere & ἀληθῆς tumores di-
cuntur , quædam in universum notanda sunt , quædam
in singulis eorum generibus spectanda. Et in univer-
sum quidem , quibus contingat , & qua parte , & quotu-
plici modo , & ex quibus causis , & quid sit quod cutim
extollat , quæve materia subsit ; quid denique de iis
sperandum , & quomodo vel inhiberi eorum incremen-
tum possit , vel extirpari , aut disjici quod intus est , quo
ad pristinam reducatur figuram , modumque , determi-
nandum est. Itaque de his singulis primo loco di-
cemus.

V.

Sunt itaque tumoribus præ primis obnoxia im-
pura corpora , utpote quæ omnis generis materia pra-
va abundant. Hinc *Marcus Aurelius Severinus* , mo-
do laudatus , *Una est cachexia* , inquit , *quæ veluti fons*

*Lib. de Re-
cond. absc.
nat. 11. c. 9.*

*uber, solet plerumque materiam subministrare creb-
rum abscessum.* Deinde illi, qui violenti quid pati-
untur, aut aliquando passi sunt: Ut quidem omnis
contusio, ictus, vulnus, luxatio, fractura; quin & pres-
sio fortis, illico tumorem habet pedisequum: quoni-
am his vel conquassantur, vel distorquentur, vel cor-
rumpuntur plane, ac subsident tubuli, per quos latex
vitalis transitum habet, ut cogatur subsistere. Quæ
causa est etiam, cur veteres quoque, & olim factæ læ-
siones quotannis memoriam sui iteratis doloribus ac
molestiis renovant, vel etiam defluxiones ac tumores
criticos aut sponte ortos, haut infrequentes in se re-
cipiunt ac sustinent. An & addendus his est ex *Seve-
rino* tradux a parentibus Character? Ni forte ad pra-
vitatem humorum in universum hoc referas, non as-
sentior, sed si quid tale observetur, casu potius quam
a tali caractere provenire arbitror. Vti quidem ne
unum exemplum, quibus alias non destituitur, gravis-
simus autor adducit. Sufficit itaque quod ante expo-
situm est: nunc quibus partibus competant tumores,
considerandum.

VI.

Alii eorum universales reputantur, totum corpus
occupantes, quales fere sunt, qui a nimium turgen-
te crassoque & extra vasa sua aberrante sero eveni-
unt, *Leucopblegmatia*, *cachexia*, & ex parte etiam *hy-
drops*; alii particulares: Qui rursus vel integram
partem organicam affligunt, ut *caput*, *ventrem*, *pedes*,
manus; vel non compositis, verum simplicibus parti-
bus singulis, quas similes vocant Philosophi, familia-
res



res sunt: vel denique non partes ipsas obsident, verum
his medii sub cute, vel inter musculos seorsim latent.

VII.

De modis quibus tumores fiant, dici non potest
prius, quam de causis eorum certius constet. Vt au-
tem in tumorem assurgat corporis quæcunque pars,
materia opus est, quæ eam extollit, & proximæ causæ
meretur nomen. Hanc plerique vulgo quadruplicem,
ad quatuor humores corporis respicientes, constitu-
unt. Verum hæc doctrina ad Galenicæ potius hypo-
theses quam naturæ normam vel usum videtur efficta,
quod mox clarius exponemus: Nunc verius ita statui
posse arbitramur. Subesse nonnunquam tumoribus
flatum, ut in tympanitide, Bronchoceles aliquo genere,
& Hernia ventosa, hausto etiam veneno, ubi totum cor-
pus intumescit: Quales tumores, si occupent exiguum
spatium, *εὐφυσήματα* appellantur. Exemplum notabile
Severinus recenset loco citato. Alias, & quidem frequen-
tissime, ex humore subtus fermentante, aut stagnante
tumor est, sive is sanguis sit, ut in Aneurismate, in-
flammatione, Apostemate, sive serum, ut in glandularum
quarundam intumescencia, & in œdematosis; (Nam
quia pituita est serum coagulatum, hoc autem coa-
gulatum non est, pituitosum dicere hunc non pos-
sum) seu denique ex hisce ac aliis combinatis va-
rieve alteratis ac subactis novus & toto genere præ-
ter naturam tumor exsurgit, ut in meliceride, aliisque
id genus plurimis. Postremo ex solido etiam tu-
ment partes, vel in corpus admissio, ut telo, globo plum-
beo, & aliis infinitis; vel intus succreto, ut in steatoma-

*II. De Absc.
rec. Nat.
cap. 3.*

te & scirrho partium, aut fungosa carne; quin etiam elapsis ex corpore ipsis partibus, ut in herniis accidit, formatur.

VIII.

Quibus cognitis accuratiorem forte tumorum, si quis eam desideret, definitionem hanc licebit dare: *Morbus in conformatione, quo totum corpus, aut aliqua ejus pars, aut pars partis a contento subtus humore, vel solido, vel spiritu, in majorem quam pro naturali habitu, molem attollitur.*

IX.

Nunc, quomodo hæc colligantur in partibus, & singula ista tumorum genera producantur, porro dicendum est. Vt autem flatulenti tumores rari sunt, ita & pauca de iis possunt vel debent commemorari. Flatum nempe fieri, ex versa in tenuem halitum serosi laticis particula, peritiores hodie non amplius fugit, quæ dum inclusa est in angusto loco, & inter membranas (uti plerumque fit) hæret, expandit eas, haut aliter ac aër inflatus vesicam facit intumescere. Quod autem pertinaces sint tales & diu subsistant, mirum videri non debet, nihil enim impedit, quo minus per annos perstent, si nulum per quem elabantur, inveniant exitum; cum primis si recentem amplectamur sententiam, flatus ex tenaci & viscida pituita generari, quæ meo tempore a Francisco de Le B. Sylvio primum Lugduni publicata, nunc ubique applausum invenit: etsi non videam, quæ sit hujus dogmatis necessitas, cum tenacitas, si in libero aëre flatus expandendus sit, necessaria quidem videri posset, at in corpore, ubi alienis terminis includitur, nulla

la prorsus sit opus, & vel solus aer calore attenuatus ita elastica vi propria panditur, ut etiam metalla diffingat. Sed videmus id quoque ad oculum, solam aquam in Aeolipila ignis ope in flatum converti: Itaque etiam in corpore serum sola aquae naturali, & consimili proprietate, nulla peregrina visciditate admista, expandi posse, nihil repugnat, etsi an ita etiam sit, & num humor omni tenacitate carens in corpore detur, quæri possit, ac forte non sine ratione negari. Ceterum novam rationem flatus tumorem efficientis vide apud Severinum.

X.

At de illo, qui humorum soboles est tumore, difficilius est expedire omnia, quamvis sollicitos admodum ea res post veteres medii ævi scriptores habuerit. Illi Causas horum vel in parte sensim coacervari statuebant, quod vocabant *συναθροισμὸν*, *congestum*, *congestionem*, vel per *πνευματισμὸν*, *affluxum*, *fluxionem*, eo confestim tendere: & per congestionem quidem frigidos, quod Guido addit, per fluxionem calidos tumores fieri: In hoc genere describendo per totum librum suum II. *de Recondita abscessuum natura Chiron ille Neapolitanus* occupatus est. Est autem illis *συναθροισμὸς*, quando propter imbecillitatem partis successive aliquid in eo colligitur, salvis alias humoribus corporis. Quod putabant fieri, quoniam illa alimento coquendo impar multas cruditates cumulet, tanquam excrementa tertiæ coctionis. In *affluxu* vero, seu *πνευματισμῷ* partem mandantem & recipientem æstimabant, persuasi providam & nobiliores conservandi cupidam naturam facultatem illis dedisse, quâ quod

III. de
Rev. Ab
nat. 3.

ipsis

Vide suc-
cinctè hæc
exposita
Galen.
Meth. M.
XIII, 3. &
Rolf. Med.
Comment.

ipsis molestiam facescit, & nominatim humores peccan-
tes, ad ignobiliores partes deponerent: quæ ipsa
etiam nunc Helmontianorum, substituto saltim in na-
turæ locum Rectore quodam ignoto, sententia est. A-
mittente igitur fieri *ἄσιν*, a recipiente *ἐλξιν* trade-
bant. Trahere autem ad se cum dolore tum
calorem, natura parti afflictæ spirituum & sanguinis
copiam tanquam in auxilium submittente, quo possit
adversus hostem peregrinum tanto felicius depu-
gnare.

XI.

Lib. I. de
Nat. Deor.

Hæc ab illis ita sunt prodita, & passim hodiernum
quoque docentur. De quibus forte, quod Academi-
cus *Tullius* de omnibus assertionibus asserit; idem opti-
mo jure licet dicere: esse in iis multum veri, cui fal-
sa adjuncta sint, tanta similitudine, ut difficilis sit judi-
candi & assentiendi labor. Tametsi enim negari ne-
quit, aliquando paulatim & tractu temporis materiam
tumorum colligi, aliquando confertim, (*ἀσφράδης καὶ
βίαιως*) in partem irruere, illamque haud aliter ac ho-
stilis exercitus oppidum per tumultum oppressum in-
sidet, occupare: concoctrix tamen illa facultas debilis,
vel expultrix ferri non possunt, cum ne nutrantur
quidem per appositionem partes, ut ego alibi sum pla-
nissime demonstraturus, nec expellant excrementa, si
quid igitur in illis imbecillitatis est, id omne in poro-
rum & fibrarum laxitate quærendum erit. Multo minus
illud credi potest, attrahi a parte quod influit, aut a
mandante aliqua alia submitti, cum perpetuæ circula-
tionis legibus hoc manifesto adversetur. Nam omne,
quod

pretium fortassis faciemus, si originem collectionum istarum paulo altius repetemus: sic enim apertius de his constabit. Itaque remotas etiam, ex quibus fiant tumores, causas exponam.

XII.

Sunt autem illæ fere, quotquot vel materiam, pravosque succos in corpore augere, vel collectioni eorum & subsistentiæ corrumpendo fibrarum tubulos, quovis modo occasionem præbere possunt. Augent materiam vel suppeditant affectus alii graves, qui non satis exhausto malo aliquid pravitatis in corpore relinquunt, & hinc sæpe abscessus vel critici vel maligni incommodant convalescentes, quod in morbillis per est frequens. Laudatus toties auctor in phthisicis quoque observavit, multos tuberculis circa pectus erumpentibus infestatos, idemque etiam ex vitiis interiorum ossium seu brachiorum seu crurium accidisse refert, latente intus materiæ copia ad exterius horum partes extensa: ne dicamus de febribus, lueque Venerea atque pestifera, quæ quales soleant producere fructus ex maligna radice, sat est notum. Addere tamen his licet a parentibus traductum non characterem quidem, sed simplicem humorum pravitatem, qua de re jam antea monuimus.

XIII.

Subsistendi vero occasionem præbent & trans-euntem sistunt, de quibus egimus numero V. læsiones externæ, omniaque illa, quæ in partibus arctius inhærent. Ex quibus est, quicquid in corpus advenit penetratque, ut vel spinæ exemplo patet: nec multum

ab simili ratione ipsamet humorum crassamenta, dum cum sanguine advolvuntur, subsistunt in minimis poris, & reliquum morantur: quod in apostematibus de sanguine manifestum est, de lymphâ in glandulis: quam sæpe existimo in iis, exhalantibus partibus subtilibus, concretam indurari, unde lactearum est scirrhus, pueris familiaris. Quemadmodum contra aliquando solo humore turgent, ubi serum vehunt, ut salivales, aliæque pancreaticæ, quamvis in scirrhum & has verti, animadversum sit. In visceribus eadem manifesta est ratio, quoties in iis vel sanguis, vel crudus cum eo appellens chylus, ut in liene, vel biliosa pars, ut in hepate, vel aliud crassamentum, ut in renibus, alibique subsistit.

XIV.

At maxime omnium externæ læsiones, contusiones, pressiones, teneriorum cumprimis & delicatarum partium, ut mammarum, aliarumque glandulosarum, primum humores calore expulsis vel per angustias pororum sensim transmissis tenuioribus particulis sistunt, deinde subsistentes & incrassatos retinent. Iuvare porro & promovere coagulationem aliquando solet frigus, quod serum coagulat, ut in salivalium intumescencia patet: dein & potus intempestive assumtus, si circa fauces fiat, item excretionis & adsuætæ sanguinis evacuationis intermissio.

XV.

Verum illi, qui solidi quid continent, ut solida sunt maxime diversa, sic a variis causis originem trahunt. Si partes corporis subsint, ut in herniis, ruptura &

& laxatio membranearum partium accidit, aut luxatio forte osium, vel excrescentia eorum in causa est: sin vero omnino præter naturam quid hæreat, nonnunquam ex humoribus corporis alteratis ac varie. digestis conflatum est. Non raro & plus quam humana vi in corpus per incantamenta immittitur. Nam præstigias esse artificis Satanæ, & oculis captos adstantes eludi, ubique causari ineptum est, cum dolor ægri, ipseque non visus modo, sed tactus adstantium aliud suadeat, sensuum autem testimonium, plurium certe, & si a multis adstantibus, in objecto & organo bene habente, & congruo, & in distantia idonea fiat, repudiare, stolidi est, & præ nimia sapientia insipidi hominis. Multo vero insolentius est dicere, hæc in corpore nasci posse, cum sæpe non metallica tantum sint, verum & in figuram certam artificialem, naturæ nunquam præstandam efformata, ut acum, clavi, glomi filorum, & instrumenta artificum certis usibus destinata: Nisi quis cum delirante Paracelso, omnia quæ sunt in macrocosmo, etiam in microcosmo existere, & posse fieri ab Archeo principe, statuere velit: is vero non refutationem sed risum omnibus mereri haut dubie, & quidem merito videbitur.

XVI.

Cognitis tumorum causis, de signis dicendum est, cum curationis initium ex naturæ morbi cognitione petatur. Tametsi vero plerique tumores oculis pateant, tamen aliquando difficilius cognoscuntur: ut si valde prolixus sit, maioremque partem membri locive occupet. Tum vero, si dubitatur, collatione par tis

tumentis, cum suo compari, vicinisque locis deprehenditur. Si internus tumor est, indicibus opus est, quibus ille se prodat: Admovenda itaque manus est, si forte palpari possit. quod si negatur, dubia sæpe & incerta est conjectatio, sentiet tamen æger proxima viscera vel uri, vel premi gravarique, vel in angustias redigi, motumque si quo gaudent, inhiberi: sed & ex dolore, illoque tensivo, pungitivo, continuo, vel remittente, item actionibus læsis, & consideratione situs partium causarumque, & ab ægro facta relatione, certius de eo constare non difficulter poterit. Ex quo facile patet quam sit necessarium, anatomico studio strenue operam Medicum dedisse, nisi in his tam abstrusis & intra corpus abditis hallucinari velit.

XVIII.

Quid autem tumori subsit, ex partis extuberantis mollitie duritieve, renisu, colore, atque dolore cognoscitur. Mollis enim tumor, tactuique cedens humorem indicat, durus & renitens, si cum impetu talis, flatum, nisiensus ab aquis vel foetu incluso venter fiet. Vbi vero ne digitis quidem cedit, neque resilit, materia quædam solidior in eo latitare intelligitur. Porro si mollis tumor, rubicundus & floridus est, sanguinem; si albus, lympharum copiam, complectitur, præsertim si digitorum impressa vestigia insuper servat. Flavus, nisi in percussis contusisque post dies aliquot, vix occurrit. Si vero ingruat, sanguis corruptus vel acri sale coagulatus substitit, ad putredinem brevi, nisi eximatur, perventurus; & illud quidem maxime, si livor permixtus aspectum foedet,

det, & latius se diffuderit color: tum enim omnimoda etiam partis ac sphacelosa putredo metuenda. Dolor quoque materiam indicat, qui si tensivus, pituitosam vel solidam; si pungitivus, serum acre; si maximo cum ardore affligat, idem acerrimum, & partis affectæ adustionem perniciosam; si nullus, ejusdem morticinam & interneccionem, pro ratione tumoris ostendit: Pro ratione inquam tumoris: quam alia signa ostendunt, quæ si absunt, bene est: Sic exostosin observavi ex lapsu prope genu perpetuo extuberantem, citra ullum etiam dolorem, quia extensum semel os quiescebat, neque vel compressione vel acutie lædebat partes adjacentes.

XVIII.

Quid futurum sit de tumoribus, & quem exitum sint habituri, etiam cognoscendum est: Omnis tumor præter naturam (excipias eum, qui solidi quid continet, quod nec digeri nec consumi potest,) vel sponte evanescit, ut bubo, vel per insensilem transpirationem dispellitur, resorpta in vasa humore, vel suppuratur, vel in putredinem vergit, membrumque corrumpit, vel in scirrhum induratur, vel permanet etiam, dum vivitur. Quodnam autem horum eventurum sit, ex materia quæ subest, ejusque natura, crassitie vel tenuitate, benignitate vel malitia deprehendimus. Molles & sanguinei præ aliis facile obediunt, serosi magis sunt rebelles; qui vero ex materia nova aut ex naturali plane mutata compositi sunt, difficillime dissipantur, duri & scirrhusi inveterati potissimum, raro vel nunquam; cancrofi etiam interimunt, ut & maligni & pestilentes, si introrsum tendunt. Venercus bubo quoque venenum su-

um in humores deferret, totum mox habitum inquinaturum. Ad hoc & locus, ipsiusque partis affectæ natura & conditio, ætas, robur vel imbecillitas, & constitutio totius corporis, seu, ut planius dicam, sanguinis, est spectanda, in magnis potissimum, & qui a majori causa pendent, ut Venerei. Hernia in pueris facile sanatur, in adultis ægre, magisque id, si inveterata est. Tumores in capite, vel ad oculum, vel labia, non sine præcautione sunt tangendi, cancrosi neutiquam.

XIX.

De curandi ratione tumorum in universum pauca doceri queunt, cum pro existente in iis materia plurimum variet: quod paucis observatum video, plerumque enim, dum de omnibus aliquid expectas, eos tantum enumerant, qui a quatuor vulgo sic dictis humoribus, proveniunt, de ceteris nihil monent. Est autem fortassis hæc tumoris omnis una & communis indicatio; Quod intus latet, quocunque tandem modo exturbandum esse: sed qua id fieri vel debeat vel possit, non una ratio est. Plerisque manuum opera salutaris est, sed non sine medicamentis, non sine exacta ratione obtinetur sanatio, quoties in humoribus simul est vitium: Hinc videmus apud auctores toties legi, Præmissis universalibus, operationes instituendas: Quod non modo in id necessarium est, ut aliò derivata scaturigine, mali fontes exarescant, sed etiam ut vulnus, quod plerumque faciendum, a pravis symptomatibus tutum præstetur, & sine mora & impedimento, sine affluxu rursus consolidari queat. Licet tamen aliquando ea omittere, sed non sæpe.

XX. Sunt

Sunt & variæ tumorum naturæ ex causis, quibus ortum debent, cognoscendæ. Si enim in morbo contagioso & pestilente erumpunt bubones, aliter longe sunt curandi, quam si ex ætatis ratione, vel alia leviori de causa eveniant. Si a scorpionum ictu, aut morfu serpentis, vel alterius venenati animalis, pars intumescit, periculum conjunctum habere, nemo non videt. Scilicet non aliunde quam ea causa benignus vel malignus humor dijudicari potest: Sive ea nata in corpore & eo mandata, sive ab alio externo transfusa & injecta fuerit.

XXI.

Quæ ut distinctius percipiantur, illud cum primis notandum venit, in aliis tumorem, tanquam morbum, unice esse spectandum, in aliis causam præ ceteris, pro ut hæc vel influens adhuc est, vel jam stabilis aut fixa hæret. Si tumor solus tollendus, id quod intus latet, vel dissipandum, vel educendum venit. Sic in flatulentis, discuti flatum sufficit, si id fieri non potest, perforatis tunicis educitur. Eadem est ratio in solidis, ut Ganglio, Natta, & quotquot folliculis includuntur. Nam quavis via eduxisse, sat est, eo enim peracto, tumor concidit: At ubi cum tota cruoris massa adhuc communicat tumor, & exinde recipit quibus fovetur, non hæc tantum, sed alia quoque in auxilium adhibenda sunt, quæ indicare tum tempestivum erit, ubi ad singula accedemus: Nunc sufficit monuisse, universalium ejusmodi non una esse: Præcipua sunt, quæ alvum movent, vel leniter, qualia in fluxili & tenui humore adhiben-

hibentur, & ubi vires prostratæ jacent, vel potenter, quæ in rebellibus & pertinaci tenacitate locum inveniunt. At quia non una humoris natura est, aut corporis conditio, etiam alia adhibentur cum fructu. Sudor movetur commode in malignis & contagiosis humoribus, aut seri copia; diuretica in acribus, saleque fixiore scatentibus; incidentia, in tenacioribus: Neque iis tantum pugnandum, quæ eliminant, sed & derivatione aut revulsione aliquando opus, tum sanguinis, tum seri. Ille per sectam, ut dictum modo, venam, & cucurbitulas revocari potest; hoc per fonticulos cum primis, dein setacea, vesicantia, & ἀποφλεγματίζοντα, quæ singula suo loco, dextre & cum selectu usurpanda sunt. Sed & alterari posset sanguis: At quia hoc potissimum ad vulnera & ulcera pertinet, tum illa referam cum aliquando his addere ista licebit, nunc autem quod propositum est, id unum prosequar.

XXII.

Prima itaque cura sit, cum fiente adhuc tumore, an facto, tibi res sit scias: In illo divertendus a parte est, vel uno ex dictis modis revocandus influens humor. In facto, si qua cum humoribus conspiratio & commercium; adhuc intercedit, non minus id necessarium, si nihil prorsus, ipse solus adoriendus. Tum itaque expendendum est, quæ potissimum ratione id queat fieri; Quarum prima est, discuti si possit: quod aliter fit in flatulentis, aliter in humoralibus, & ex his aliter in sanguineis & calidis, aliter in frigidis, & ex sero coagulatis humoribus. In flatulentis carminativa interna & externa officium faciunt. In sanguineis

neis statim spectandum est, num liceat repellere: ad hoc vero septem conditiones Galenus requisivit, quas enumerat *Hieron. Fabritius Aquapendens*; quamvis hæc in compendium redigi queant & facile ad pauciores restringi. Ubi vero hoc non licet, vel nihil profuit, discutientibus proprie dictis utendum est, mitioribus tamen, quippe cum fortia non modo nihil promoveant, sed etiam insigniter possint nocere. His quoq; nihil proficientibus, ad suppurantia veniendum. Sed de his quidem omnibus qualia sint, agemus suo loco, ubi de inflammatione, qui præcipuus est sanguineus tumor, instituemus sermonem, id unum nunc addentes: in frigidis & crudis calida, in calidis frigida maturantia adhibenda esse. Hic v.g. Ol. rosaceum cum vitello ovi sufficiet, illic crocus & styrax, & mel accedere possunt, aliaque: quod latius disputat *Severinus Lib. I, III, 16.*

*L. de tumor. cap. 2.
Vide Gal. M.M. XIII. cap. II.*

XXIII.

Verum in frigidis, id est serosis tumoribus, ubi destitutum tenuibus particulis, inter fibras subsistit, crassescit & coagulatur lymphaticus humor, paulo fortioribus utendum, & si forte duriores & inveterati sint, aut solidiorem substantiam includant, solidissimis, vi quadam insigni pollentibus, & valde solventibus acribus, salinis, resinosis medicamentis opus est. Exemplum est in salivali humore subsistente, ubi solum emplastrum diachylon, de meliloto, &c. sufficit, in œdematosis balinea discutientibus herbis, & sale lixivo imbuta præstant; In extremis vero thermæ, & confictæ ad earum imitationem balneationes, ex sulphure, nitro, alumine, muria, halecum

C

potis-

potissimum , acetum , vitriolum , urina , herbaeque ac radices acriores unice conducunt.

XXIV.

Non autem ad solos humores, vel id quod includitur, respexisse sufficit, sed & Partis conditio consideranda venit, quæ itidem est varia: Primum est imbecillitas, quam tonum corruptum hodierni quidam vocant, eo nomine laxitatem fibrarum denotantes, quibus robur conciliandum est: Hoc potissimum fit terreis ac leniter adstringentibus, & in viscerum tumoribus dispellendis maxime habet locum, unde in Hepatis inflammatione tam sollicitè commendantur: eadem vero ratio est Lienis, aliorumque si forte morbus illa insederit. Verum & aliis externis partibus conducunt, quamvis fortiora, & sub alia forma adhibenda: ut in tumoribus laxi pedum scorbuticis, vel aliis quoque thermæ Aluminosæ. Secundum locum meretur natura partis & temperamentum, cui semper velificare oportet, ita ut humidioribus partibus minus, siccioribus magis sicca & exsiccantia applicentur, prout *Galenus* docuit, in *Meth. Med.* Quin & ex eo esse, quod actu frigida repellentia iis admoventur, quæ non multum caloris habent, ut oculis, faucibusque, cum in aliis, quæ valde sanguinea sunt, & hinc calida, sphacelum inferant, extincto subito calore, existimandum est: hæc enim innituntur axiomate methodi Medicinæ, Similia similibus conservanda: Si enim similia similia conservant, contraria destruunt. Neque minus hic sensus partium curationi leges scribit. Cum enim aliæ eum exquisitum habeant, neque ferant acria & irritantia, alia vero obtusorem,

Meth. Med.
L. II. cap. 3.

siorem, ab illis abstinendum in prioribus. Hujus vero rei iterum oculus esse exemplo potest, cui acria maxime inimica sunt: Verum & nervis, tendonibus, ligamentis, & reliquis nervosis vulgo dictis: quamvis cum hæc interna sint, potius ulceribus hæc cautio, quam tumoribus debeatur.

XXV.

Hæc medicamentis peragere licet, quæ ubi nihil proficiunt, quæ illa non sanant, ferrum sanare, meminisse oportet. Itaque, si humor ad maturitatem his perveniat quæ suppurantia appellantur, cutisq; crassior sit, quam ut eam perumpere pus queat, aperiendus tumor est scalpello myrtiformi, quem Lancettam dicunt, vel alio commodo. Si vero nec discuti, nec suppurari possit, si item extet atque promineat nimium, ut Natata, resecandus novacula. Si nec discuti possit, nec colligi in purulentum & prominentem abscessum, nec excindi, ut ubi latius se per partes diffundit, scarificatio profundior prodest: ut levior & superficialia alio casu, pro re nata nonnunquam sufficit. Igne etiam favire tum licet, cum primis si corruptus humor partis corruptionem videatur minari; vel cathæreticis, huic succedaneis, avertere discrimen. Quæ omnia dextre esse adhibenda, & cum judicio, quilibet videt: Nam exæresis & aphæresis medicinæ sunt generosæ, quæ non nisi omnibus prius tentatis, & expensis cunctis, in auxilium venire debent.

XXVI.

His ita de tumoribus in universum expositis, de singulis agendum fuerit. Quod fiet, postquam prius

Lib. de tu-
mor.

de ordine cum hactenus usitato, tum a me servando, dixero paucis. Quotquot in hunc diem de tumoribus aliquid commenti sunt, ad quatuor humores supra nominatos tanquam ad quatuor classes, illos retulerunt, *Galenum* in hoc secuti, qui in *Methodo medendi* potissimum, tum & alibi, eos vel flatuosos fecit, vel humorales: hos rursus in sanguineos, pituitosos, biliosos, & melancholicos dispescuit, prout solebat cuncta ad quatuor qualitates primas, & humores totidem referre. Et quamvis aliqui etiam alia addiderint, hos tamen tanquam basin, nunquam non retinuerunt. At vero hæc Galenica tumorum divisio partim lubrico nimis fundamento innititur, partim ad ea genera quosdam refert, ad quæ commode referri non possunt; imo nonnulli locum in ea prorsus non inveniunt. Nam quod ad primum attinet, notum haut paulo accuratius nunc quam olim, naturam humorum corporis nostri innotuisse: ut hinc ab illa Galeni doctrina, (rigido præsertim sensu, quo nonnulli proximis post renatas literas seculis viventes eam tradidere, & in præsentī maxime negotio solent accipere,) in haut paucis liceat deflectere. Et quamvis neutiquam sit probandus recentissimorum quorundam conatus, qui successibus suis turgidi, & plus quam Vatiniano in veteres odio flagrantēs, nullo discrimine eorum omnia ad orcum vellent detrusa, nullam adeo cavillandi occasionem prætermittentes, cum hæc talia commoda interpretatione facile mitescant: [Quid enim prohibet, tenuem, & ad φλόγωσιν promptas particulas foventem sanguinem biliosum vocare, melancholicum crassum & adustum, quomodo illum ipsimet antiqui

tiqui non semel describunt, & per atram bilem, ipsis experimentis id iubentibus, acidissimo succo corruptam intelligere; in pituitæ vero censum serum, quod tenue illi vocari solent, admittere? quo pacto omnia fortassis erunt in vado, & posito omni metu ac trepidatione, licebit ad eorum lectionem accedere, quos omnino nihil in his vidisse, perpetua in praxi viventes, cum scripta eorum, præ quibus isti in suis, instar puerorum balbutiunt, summum in iis ingenium viguisse, abunde ostendant, absolum esset statuere] Præstiterit tamen, forte, meliora doctos suo jure uti, & scapham scapham dicere, sanguinem sanguinem, serum vero serum, quid enim, attinet veritatem anhelantes per ambages ducere ad finem, & sententiis dimidia sui parte falsis medicinam difficilem quærere, cum maxime sanis uti citra periculum liceat.

XXVII.

Ex quibus jam alterum apparet: Nam tumores a bile cum enumerant, præter erysipelas & herpetem, vix quenquam in exemplum audent nominare: quorum prius suo quidem sensu bene habet, etsi sine omni bile proprie dicta accidat: At Herpetis non tam ad inflammationem pronus sanguis causa est, quam acris potius, & salibus suis foetus, quam constitutionem ad nullum ex quatuor istis licet referre: nam falsam, vocare pituitam nimio forte illorum amoris foret indulgere; cum serum acre a blenna differat. Sed quando jam scirrhum & carcinoma ad atram bilem, vel melancholicum humorem referunt, plane aberrant a janua: hoc enim a sero acris, & exedente, illum a stagnante

te incrassato sanguine, vel lymphâ coagulata esse, & hinc partes indurari, quæ sæpe etiam substantiam instar lardi præ se ferunt, autopsia docet, ut in ipso opere monetur: Verum & glandularum tumores a sero stagnante ad pituitam referre, durius forte fuerit, cum serum & pituita sint res diversissimæ, etsi una ex altero, mutata substantia fiat.

XXIII.

Sed & imperfecta est hæc enumeratio, nec omnia tumorum genera complectitur: Quorsum enim illos referas, quorum tamen & ipse Galenus meminit, quos anomalos appellat Severinus, & qui solida vel saltem duriuscula continent? Item illos, quibus vel partes aliæ corporis subsunt, ut Herniis, vel etiam talia, quæ in corpore inexistere per leges naturæ non possunt, ut glomi filamentorum, vermium, aliaque plura, varii omnino generis. Vnde etiam est factum, quod laudatus supra Severinus illos qui solidi quid continent *anomalos* appellaverit, alios vero *noviter observatos*. Verum & hoc incommodi est, si eam sequaris divisionis formam, quod eundem affectum in diversas classes reponere opus sit. Nam bronchocele modo carnosæ & solidi quid offert, mædo & flatum, quod idem in herniis & hydrope etiam alias observatur.

XXIX.

Quæ cum ita sint, nemo mihi vitio vertet, si relicta illa veteri, & recepta divisione a quatuor humoribus petita, novam tradere mihi indulgeam, cum res ipsa eam efflagitet. Quemadmodum vero triplex occurrit

currit morbos dispescendi & in suas classes digerendi ratio, una, quæ ipsam essentiam eorum spectat; altera, quæ causas, qua essentiam ingrediuntur, seu ut apertius dicam formam & materiam; tertia vero, quæ partes quibus inhærent sequitur, lubet jam postremam eligere, cum pars affecta alteram indicationum partem compleat, adeoque hæc futura in praxi maximæ sit utilitatis.

XXX.

Cum autem tumores fecerim Vniversales & particulares, & hos rursus, vel singulas partes similes, vel integram organicam obsidere dixerim, nunc quidem non esse nostrum arbitror de his pariter omnibus agere. Nam de universalibus tumoribus, cum a vitio humorum sint, eaque constitutio turgescencia potius corporis cacochymica, quam tumor appellari mereatur, de iis potius inter morbos universales practicis disceptandum est. Neque quascunque protuberantias partium ad nos arbitrabimur pertinere: aliæ enim ex his non habent primam rationem tumoris, sed alterius sunt naturæ, ut Herniæ, quarum prima ratio in prolapsu constituitur, tumor autem potius est symptoma: unde nec eandem quam reliqui tumores, curationem suscipiunt. Cujus rei ille imperitus apud *Marchettum* documentum dedit, qui testiculo in inguine delitescente, tentata diu suppuratione, incidere eum volebat: ubi manifestum, tumorem illum apparentem symptoma fuisse, qualia propriam considerationem non exigunt. Ejusdem generis sunt & illi sive flatulenti sive humorales, qui integros ventres implente materia

*Obs. Chir.
LXXII.*

ria apparent. Nam & hic tumor est secundo loco, & inter symptomata, primario affectu ad cavitatum morbos pertinente. Sed etiam ecchymosis illud genus, quam dicit Sennertus in tumorem non attolli, inter affectus nostros haut apparebit: nec erysipelas, quod potius ad inflammationes, adeoque morbos intemperiei remittendum esset, satis commode huc refertur. Cui tamen ne quid omisisse videamur, nimiumque innovationi dedisse, nunc quidem locum inter illos relinquemus.

XXVIII.

His igitur remotis, quæ supersunt, in suas classes asserendi sunt. Existimamus autem, eos commode sic partiri: Tumores *cutis* sic dicti particulares, vel similes occupant partes, vel organicas seu dissimiles, integraque membra, atque ea varia, vitiant. Quæ similes, vel *cuti* insident, (cujus partem esse cuticulam, anatomia me docuit, & facile omnes docebit, qui recte attenderint), vel sub cute latentes, eam attollunt tantum, vel *carnes* occupant, vel *glandulis* infesti sunt, vel *arteriis*, vel *venis* accidunt, vel denique *ossibus* inhærent. *Cuti* veruæ & clavi familiares sunt, itemque ecchymoma, seu suffusio ab externa læsione. Eidem *subjacent* Ganglion, Atheroma, Steatoma, Meliceris: ad quos Natta pertinet, Talpa, Testudo, & si quæ alia ejus generis occurrunt, & quicquid denique folliculis includitur, item Glandulæ sponte subortæ, quæ tamen, præterquam in strumis, vix merentur a nobis attendi. *Carnibus* familiares sunt Furunculi, Paronychiæ, carbones, Oedemata, Sarcoma.

Quodsi

Quodsi Gingivas ad carnes referas, etiam his sui sunt. Verum ipsæ *Glandula* variis tumoribus opportuna deprehenduntur: & **CONGESTÆ** quidem (inepte conglomeratas vocant) *salivales* tam superiores, in Parotidibus, nomen retinentes antiquum, quam inferiores in Defluxionibus: verum *tonsillæ* etiam, in isthmo oris sitæ, & uvula, etsi hæc potius spongiosa sit, quam glandulosa; & denique Faucium Buccarumque. Scrophulas ad salivales quoque retulerim, Bronchocele ad thyroidem. Nam etsi hæc etiam alia fiat ratione, tamen hæc potissima est. **SINGULARES** vero & globosæ, Bubonales præ ceteris, tum illæ quæ sub alis sunt, solent intumescere. *Arteriæ* patiuntur Aneurisma, quod est vel tumor arteriæ, vel ex arteria, qua de re videbo deinceps. *Venas* habent tortuosi varices. An huc etiam hæmorrhoides cœcæ pertinent? *Ossa* spina ventosa infestat. *Quæ vero dissimilariibus, integrisque accidunt organis*, iisque plurimis, hæc sunt: Inflammatio, Abscessus, Scirrhus, Cancerosus tumor, Gangræna, quam tamen perinde ac inflammationem huc potius refero ex communi sententia, quam ut vere esse tumores existimem: Hæc enim ad intemperiem manifesto pertinet, illa vero cum sit corruptionis ac destructionis omnimodæ principium, intumescit quidem nonnihil pars: hunc vero tumorem symptomatis quoque rationem habere potius quam morbi, nequit dubitari. Sed quoniam difficile est, aliam inter morbos ipsi sedem invenire, & ita consuevit interim fieri, ad ultimum locum, admittendum existimavimus. Et his forte tota tumorum historia absolvitur.

Quibus in universum notatis, nunc ad singulos transibo, & eo ordine quo recensiti sunt, eorum naturam, quantum ad curationem notitia ejus est utilis, strictim præmittam, tum istanc exequar. Incipiam vero ab iis qui similaribus accidunt, utpote simplicissimis, compositarum multisque communium considerationem ad calcem rejecturus.

SECTIO ALTERA,
DE
TUMORIBUS SPECIATIM,
PARS PRIOR

De iis quibus similes partes intumescunt.

I.

Præcipiunt alias Philosophi, ab iis ordiri disciplinas, quæ nobis sunt notiora, quoniam ab his ad ignota, & abstrusa facilior via patet. Quod, tametsi de principiis rerum & universalioribus traditionibus potissimum intelligi æquum sit, tamen & in iis locum invenire potest, quæ particulatim de rebus singulis agunt: ubique enim & memoriam juvat, & intellectum ipsum secundat facilis ordo. Placet ergo oculorum ductum sequi & ab extimis ad ea progredi quæ interioribus occlusa sunt. Neque enim similes nunc summo rigore dictas intelligo, sed eo sensu, quo alias

alias in latitudine sua accipimus nomen. Itaque primum locum nunc occupet statim

II.

CUTIS & CUTICULA; quæ ut in anatomicæ seorsim exhiberi par est, sic ubi de eorum morbis agitur, cum unam, ut supra jam monui, partem organicam componant, earum tumores separari non debent: præsertim cum cuticula nullo prorsus modo possit intumescere, quippe quæ tenerrima & exsucca sit, etsi pingui exhalatione vel illinitione mollescat. Maculæ enim quæ apparent, sub illa sunt, non minus ac tota Æthiopum nigrities, quod Medicorum nostri seculi politissimus, ad oculum demonstravit. Tametsi enim negari non possit, aliquantillum plerumque his quæ subsunt, eam attolli & asperiores quoque fieri, neque tamen tubercula, neque tumores hæc merentur vocari, pertinetque ad Cosmeticen potius hoc omne, quam ad Chirurgicam. Itaque de his sollicitos ad Laurembergii Pasicompsen, & alios amandamus.

Nic. Pechlin. Anato. Æthiop.

III.

Neque cutis tam tumores sunt obvii quam tubercula potius & pustulæ: quod ejus natura propter texturæ rationem, qua sibi fibrillæ ex quibus constat, arctius innexæ sunt, tumores intra se non admittat. Appellare vero licebit forte pustulam melioris doctrinæ gratia, quando cuticula a substrata cute, abscedens attollitur, humore subtus hærente: tuberculum vero, si ipsa cutis leviter intumescat & in acumen emineat. quamvis Cornelius aliter hæc tradat, qui in iis

minus quam pro more accuratus est. Ejusmodi pustulæ in scabie humida obviæ sunt, albicantes vel leviter flavescentes, ex quibus sectis, vel acu punctis, proflit album pus, quo facto subsidit cuticula, & cuti sponte iterum agglutinatur. Tubercula vero majori numero obveniunt in sicca scabie, prurientia, rubentia, acuminata. Et ex horum numero ingenti quidem ipsa scabies sicca componitur, ut humida ex his & pustulis invicem subnascentibus.

IV.

SCABIES. Provenit autem scabies ex acri, crasso & impuro sero cum sanguine calidiore, & infantibus, quoniam tali præ reliquis ætatibus abundant, familiarior est, de-
quid in juvenibus, raro in iusta ætate constitutis infesta. Nonnunquam Sirones subsunt, minutissimum pediculorum genus, quod per mediam cutim procedens, veluti cuniculos agere consuevit. Vnde Germani *Reitsteßchen* appellarunt. An etiam fermentum malignum statuamus? certe contagium id videtur ostendere, & præcipue maligna ac venerea scabies, & quod serpit, inficitque vicinas partes. Et hinc est, quod difficilius cedit externis ac vulgatis remediis.

V.

Curatio. Curatur variis modis. Et sigillatim quidem pustulæ, ruptis iis, & expresso pure, ut dictum; tubercula vero pertinacius resistentia vix solis externis cedunt. Purgandum corpus, & diluendum acre serum, fermentum vero sudore excitato dispellendum est. Si Sirones lateant, eruendi, tum sanatur sine pure tuberculum quod habitaculo erat. Cedunt tamen & acribus,
 ut

ut Laurinis baccis, & similibus. Humida præterea scabies siccantibus indiget, unde sulphur laudatur, cui adduntur istæ, & quo dolor ex pruritu mulceatur, oleum. Hæc & similia ungenta in præsens aliquid possunt, sed non tollunt principium mali; itaque fermentum extinguentibus etiam pugnandum. Nonnunquam & universalibus prius memoratis opus est, & decoctis lignorum vel eorum essentia, ac si rebellior est, emollientibus, arcano & efficaci remedio. Fumaria, agrimonia, cichoreum, capillus veneris, buglossum, borrago, scabiosa, malva, althea, glycyrrhiza, polypodium, lapathum, & ex purgantibus Senna, Helleborus, Rhabarbarum commendanda. Balnea sulphurea, si in vicinia sunt, optima: cui medicata possunt substitui. Sal culinare, exsiccando excellens remedium se præbet. Plumbea quia edulcant & siccant potenter, non contemnenda: Lithargyrium præsertim, quod certò eam curat, sed nescio qua malignitate simul insidiatur, ut repulsa scabie, periculum inferat: caute itaque tractandum. Omnium potentissime dein juvat Hydrargyrum, certius quam Luna humoribus dominans, unde cingulum & unguentum Mercuriale in usu est, sed non sine circumspeditione usurpandum.

VI.

PHLYCTÆNÆ nominantur pustulæ seu vesiculæ, **PHLYCTÆNÆ** quales a fervente aqua vel ab igne admoto exsiliunt, sero **CTÆNÆ**. naturali & non mutato in pus, sed tenui & flavescente refertæ. Quo differunt a pustulis in scabie humida observandis: itemque illo, quod acrior inflammatio eas circumstet, unde moleste urens, rupta cuticula, super-

venit dolor: crustam etiam duriores relinquunt, quam igneus, veluti pruna, margo circumstat. Noctu potissimum assurgunt, & infantibus frequentius contingere solent, & quidem familiariter in cruribus. A fervido humore provenire necessum est, cum ab uno igne, idem effectus conspiciatur. Alia curatione opus non habent, quam refrigerante & demulcente dolorem medicamento: ad quod empl. de spermate Ranarum, vel unguentum aliquod infrigidans, lilior. alborum, albi cocti, de lithargyrio vel aliud simile, potest sufficere. Parietariae folia singulariter laudantur.

VII.

PAPULAE. Ut Phlyctænæ humidæ scabiei pustulis, sic siccae tuberculis **PAPULÆ** videntur respondere, neque differre, nisi quod sint singulares papulæ, cum alteræ, dum se scabies magis diffundit, universim corpus occupent. Cum autem pus non fundant hæc rubercula, intus tamen humorem habeant, non aperiri, sed dissipari amant, quod emplastro vel unguento simili, dum calor reprimitur, fit facile, quin omnia hic repellentia videntur convenire. Hic obmutescant jam methodi per contraria cavillatores, & vel in minimis agnoscant stupiditatem erroris sui. Quis enim his, atque illis similibus, calida potentiâ audeat adhibere? aut per solam discussionem spondere sanationem?

VIII.

VARI. *Var. 1.* Græcis, **Sinnen** sunt nostratium, tubercula dura & parva, faciei & proximis partibus propria, aliquando cum levi dolore, quia calor circumstat, aliquan-

quando hoc & dolore expertes, pruritu semper. Plerumque, ut facile oriuntur, sic sponte evanescent, id quod fere intra triduum accidit: Hinc Celsus pane ineptias esse, curare varos, & lenticulas, & ephelides, pronunciat: sed nonnunquam pus continent, & assurgunt altius: illud igitur exprimendum est. Has non tam abigendi quam præcavendi ne fiant, causa, medicus consulitur: nam quibusdam molesti admodum sunt, & prope perpetui. His nihil utilius, quam diæta est, vitatis enim acribus, vinoque, non facile redeunt, nisi singularis iis sit dispositio: quo in casu nihil præstantius expertus sum quam lac virginis.

L. VI. c. 5.

IX.

Cum similes pustulæ sunt perpetuæ, & rubedo nasum GUTTA ac faciei integram partem occupat, vocatur GUTTA ROSACEA ROSACEA, quæ tam pertinax aliquando, ut nasus excre-scat in majorem molem. Cujus exemplum Sennertus *in praxi.* vidisse se ait, tam grande, ut in legendo hominem suum impediret, ita ut frustula illius excre-scentiæ amputare, coactus sit. Hoc plerumque strenui potatores præmium reportant: raro enim sobrie viventibus, & sponte accidit: nec facile tollitur. Repellentia & frigida aliquid valere creduntur, sed perparum id est, nec adstringentia multum profunt, vel camphorata, tota enim cutis jam plane mutata est. Vulgo ab hepatis temperamento calidiore esse, persuasum habent: quam vere, facile judicatur, cum ne bilis quidem, nisi perquam *καταχρησµός* sic vocata, accusari possit. Si nondum plane confirmatum est malum, & juvenis sit æger, diæta potius refrigerante, quam medica-

men-

mentis corrigenda: at in adultis omnis labor frustra impenditur. Posthæc de epinyctidibus, sudaminibus, terminthis, non opus est agere, cum præsertim obscura sint, nec satis intellecta hæc veterum nomina. Effere vel fora, cum totum occupet corpus, ad particularia tubercula quoque non pertinet. His itaque relictis, sequatur nunc inflammatio cutis, seu

X.

ERTSIPE-
LAS

quid sit.

V. Galen. id
docentem
Meth. Med.
XIV. cap. I.

ERYSIPELAS. Tametsi enim, ut supra monui, commodius ad intemperiei morbos quam ad tumores referatur, tamen cum fieri nequeat, ut in inflammatione ubi subsistit sanguis, in tumorem pars non attollatur, levem licet, ad istos referre medici non dubitant, in eo aberrantes, quod Symptoma potius quam morbum spectant. Interim tritam nos insistemus viam, & quoniam hic alias recenseri solet, ne quid omisisse videamur, de eo pariter agemus. Est igitur *inflammatio cutis potissimum* (etenim neglecta, vel admodum gravis, nonnihil etiam subjectæ carnis occupat.) *ex tenui & ad phlogosin disposito sanguine, subsistente & aestuante, intra ipsam producta.*

XI.

Causa.

Hanc affectionem biliosæ fluxionis sobolem esse vulgo docent. Pro qua sententia, etsi Galeni auctoritas videatur militare potius quam ratio, adeoque ipso auctoris nomine hodiernis novatoribus eadem valde sit exosa, neque negandum sit, bilem potius ex nimia adustione & calore fieri, quam a bile calorem, tolerari tamen facile potest, si biliosas particulas eas intelligas, quæ potentia bilis sint, sive in eam, caloris excessu facile

cile vertantur, hoc est inflammabiles, vel, ut uno verbo dicam, pingues ac tenues, nulla viscedine involutas, quales in vini spiritu apparent: tales enim tenues sunt, mobiles valde, adeoque facile alicubi hæsitantes exardescunt. Ceterum ipsemet Galenus ex sanguine tenuissimo erysipelas fieri, Lib. ad Glauconem. fatetur, & Hier. Fabricius inquit: *Si Icterus & Erysipelas fiunt ab una & eadem bile, qui sit ut hi duo morbi tantum a se invicem differunt? Existimo igitur Erysipelas fieri semper a bile alimentaria.* Est autem illius ævi bilis alimentaria, vel prorsus vana, vel illarum particularum copia quam diximus.

XII.

Erysipelas aut fit, aut factum est: & præterea gra-
 du differt, non autem causa. Nam quod erysipelas
 phlegmonodes, œdematosum, vel scirrhosum statuunt,
 inane est, & commentum ingenii Galenici, nimis accurate & ad normam a se excogitatorum humorum omnia expendentis. In solis externis partibus spectatur, nam in visceribus si sit, a phlegmone quid differt? Hic nescio cur Aquapendens ut plurimum circa nates & in facie putet excitari, cum in aliis partibus æque observetur, licet hoc certum sit, semel ad locum aliquem impetu lato humore, eo frequenter reverti, & potius ibi quam in alia parte consistere. Itaque Aquapendens forte plures in facie laborantes quam alibi vidit: verum hoc casu potius, quam ex necessitate rei evenisse credendum est.

XIII.

Cognoscitur ex colore florido, qualis est arterio-

E

Signa
Diagn.

si sanguinis, quem cum tetigeris, subterfugit, rursusque illabitur, cum sensu caloris manifesto, & dolore ten- sivo, & pungitivo: qui & usum partis tollit, illæsis licet motus instrumentis. Crescit etiam ac serpit, & vici- nas partes occupat. Aliquando & febris conjuncta est, Porgn. sed non magna. Vacat ergo periculo, si rite instituat- ur curatio, & in tempore accedas, dum adhuc fit: estque unius fere diei, aut bidui. At si neglectim habeatur, aut irritetur temere, in facie quidem existens, in phre- nitidem aut anginam potest abire, alibi vero in gangræ- nam & sphacelum: cujus rei indicium est, si ingredo quædam, & pustulæ appareant. Nec non aliquando ad suppurationem perducitur, de quibus Hippocratis A- phorismus est, VII, 20. *Ἐπὶ ἐρυσιπέλασι σηπεδὼν ἢ ἐκ- πύησις, κακὸν.*

XIV.

Si adhuc fit erysipelas, fluxionem avertemus: quam in rem si magna metuatur, Venæsectio ex Celsi & Pauli præscripto locum habere poterit, præsertim si circa caput aut collum eveniat, sic enim non imminue- tur duntaxat confluens sanguis, sed & revelletur ea- dem opera. Vacuationem autem totius corporis fieri, quæ Galeni est ratio, raro necessum est, nisi in confir- mata, quamvis aliquando alvus clistere possit sollicitari. Sed præstat, omissis his quoque, diaphoreticum adhi- bere, qualia sunt ex plantarum genere sambucina, ex animalium C. C., ex metallicis Si calx, & sudorem, prolicere. Præcipua enim indicatio est, discutere. Adjuvanda vero plerumque est eadem intentio exter- ne applicatis topicis, quæ temperata, vel primo gra- du

da calida esse oportet. Caveamus vero a refrigerantibus & repellentibus, ex prima cautione Galeni, ne scilicet calor partis extinguatur. Quod & monet Hippocrates *Apb. XII, 25*. ἐρυσίπελας ἔξωθεν μὴ εἰσω τρέπεσθαι, ὅτι ἀγαθόν· εἰσω δὲ ἔξω, ἀγαθόν. Hinc nolim cuiquam esse autor, ut sempervivum, lenticulam palustrem, umbilicum Veneris applicet, aut humida alia, aut frigida: funesta enim exempla testantur, facile abire in sphacelum. Multo minus adstringentia admiscenda sunt, uti id ostendit perspicue Aquapendens: nec emollientia, ut decoctum malvæ, probantur, cavendum enim a suppuratione, quam damnat Hippocrates. Laudantur vero pulveres, temperatissima indole sua poros apertos tenentes, quo discutiantur, & ex illis evaporent particulæ igneæ, nimii caloris auctores. Talia sunt farina hordei, milii, fabarum, aut lupinorum, quæ cum melle miscebant veteres: sed quia oblinunt poros, omitti potest, & ista sola applicari: addi potest & myrrha, cerussa, Camphora, Liquiritia, quod Ludovico in more est, item creta. Possunt quidem & humida, sed ex discutientibus aquis destilatis constantia adhiberi, & quidem calide, quæ Sydenhamii est methodus, apud quem reliqua extant. Verum & hic solus spiritus vini, & camphoratus & theriaca, maxime si ad gangranam ne transeat, metus sit: Crocus etiam, sambuci cortex, & similia ex vegetabilibus alia commendantur.

XV.

Erysipelas omnium periculosissimum in facie est, unde non solum topicis, sed etiam victus ratione &

internis adversus illud pugnare jubet Hildanus, & enemate alvo subducta, sanguinem ex brachio lateris dolentis detrahi, & quidem copiose, ne inflammatio in Gangrænam transeat. Verum & alias diæta accedat commoda oportet, nam & cibus & potus, & aer, & animi corporisque motus nocere possunt. Si exulceratur erysipelas, ut ulcera reliqua curandum: si in gangrænam abit, ut posthæc dicetur. Sed etiam præcaveri desiderat: quod venæ sectione repetita fieri potissimum consuevit. Ceterum ut veteres erysipelas sanaverint, Celsus docet *V, 26.* etsi potius ut inflammationem vulneri supervenientem in cute, quam affectum peculiarem ibi illud consideret.

XVI.

HERPES
quod sit

Ut ex sanguine puro fit erysipelas, ita ex eodem acri sero perfuso HERPES: qui quoniam non in una permanet sede, sed vicinas partes sensim occupat, nomen a serpendo tulit. Avicenna eleganter Formicam dicit, etiam ad speciem reflectens animum, Paulus ignem sacrum cognominat, quod nomen Celsus etiam ei tribuere creditur, quod mihi vix fit verisimile. *Est autem cutis cum rubore* (quod cur omittunt vulgo?) *extuberantia*, non ut in erysipelate, æqualis, sed *aspera*, & in *tubercula elevata*. Quidam duas ejus faciunt species, Miliarem & ἐρυσιανέων, Galenum secuti: quidam tres, Miliarem, qui summam cutim exulcerat, & qui profundius serpens, totam. Hujus differentię Aetium auctorem habent. Miliaris ad tumores, alter (qui gradu solum differt) ad

ad ulcera solet referri. Sed ut erysipelas exulceratum eodem loco solet expediri, sic & herpes potest.

XVII.

Describit eum Celsus demum, sed exulceratum & exedentem tantum, atque ita, ut malignior fuisse videatur suo tempore: Ego qualem viderim, dicam. Primum genus rubra est macula, in suprema cute, aspera, & minimis tuberculis constans, nullum tamen pus in se includentibus, sed arida, serpendo progrediens, & nisi obstiteris, tandem totam in qua sunt, partem occupans: Germani *Slechten* appellitant, Galli *des Tartres*. Hoc non exulceratur, sed prurit & mordet, tenditque cutim, atque in vulgus notum est. Alterum genus in puella observavi acri sanguine prædita, itemque in viris consistentis ætatis, in femoris parte interna maxime: in illa serum limpidum effluebat erosa cuticula, & parte rubente; mox etiam maxima acris serî copia continuo effundebatur: quod si exsiccantia valideque stringentia applicantur, crustam ducit, sed invalidam, & mox iterum copia humoris destruendam. Non quidem exedebat intimam cutis partem & ad carnes penetrabat, sed latius tamen se diffundebat, & magnam femoris occupabat partem. Qualem autem describit Celsus, rarior est, & nobis ignotus: hinc ego malui quod viderim narrare, quam, ut ceteri faciunt, ex aliis quidvis describere.

XVIII.

Causam utriusque esse acre sal, in priori siccius, in Causa altero sero permistum & fluitans, in propatulo est. Hinc veteres non bilem tantum solam, sed pituitam etiam

mistam accusabant. Videntur vero illic in cutis summo hæere particulæ, hic, erosæ & læsæ glandulæ intercutaneæ effundere serum, in postremo genere, ubi pus vel aliquid inter faniem & pus medium exit, malignius fermentum sanguinem quoque infecisse, vel in cute hærens, influentem inficere.

XIX.

Curatio.

In herpete igitur indicatio præcipua est, acre corrigendum esse. Quod fit evacuatione, dilutione ac topicis, præsertim quia in loco etiam peculiaris causa hæret, sive fermentum sit, seu vitiosa quædam dispositio appellanda. Purgandum itaque corpus, ubi grave est malum & studendum dein edulcationi, nisi simul scarificationi & venæsectioni indulgendum videatur, quibus tamen vix opus est. Edulcatur vero diluentibus acrimonia: decoctis lignorum, herbarum, insipidarum, aquearumve, & radicum fructuumque dulcedine pollentium, emollientium. Quo Celsi monitum pertinet, potionem magis liberalem esse quam cibum debere. Reliqua cura in externis posita est. Veteres repellentibus uti jubent, & adstrictivis, terram præsertim Lemniam, Cimoliam, Solani succum, malicorium: deinde medicamenta ex plumbo, & acetum & myrteum oleum, & thus, atque alumen commendantes, cornua quoque animalium. Sal fossile laudat Aetius, & Misy, quod atramenti sutorii genus est, æque ac Chalcitis. Nitrum porro, Sulphur, calcem, & alia multa: hinc aqua calcis vivæ nobis emergit. Ad miliarem sufficere aquam thermarum, quæ brevi tempore eam sanet, Hier. Fabritius testis est, cujus defe-

defectum aqua marina vel salita alia, addito sulphure & alumine, compensat. Lanam succidam ustam præ ceteris laudat in Esthiomeno Taranta, sed hoc non ex suo est, didicit ex Aetio, & Aegineta. Nihil præstantius mihi compertum est Argento vivo, in varias formas transmissio: cui soli, si miliaris sit, herpes obsecundat. Vidi tamen rebellem alterum, sero manantem, neque huic cessisse, & non nisi salivatione instituta cessasse. Oleum Tartari plurimum etiam valet. Denique præparato corpore, & lota parte aqua malvæ, multos brevitæporis spatio se curasse, asserit Scultetus, superimposito præstantissimo Nicotianæ cerato, in Pentateuch. Chir. Aquapendentis descripto, Vide ejus observ. septuagesimam.

XX.

IMPETIGO Latinorum, Celso excepto, qui papulas vocat, Græcorum LICHEN ab Herpete miliarum parum vel nihil forte differt: ad quam Mentagram Plinii quoque referunt: Nam ex falsis & acris corporis succis itidem originem accipit. Eadem quoque apud auctores descriptio est, nisi quod hic pruritus, illic doloris meminerint, & quod Herpes a bile esse præsumatur, nullo rei indicio: Eadem igitur vel similis erit curatio. Præter superiora vero & oleum ovorum, & Camphora, atque hinc ungu. album camphoratum, Myrrha, borax, creta commemorantur, siccando, vel corrigendo humorem, vel acrimoniam, vel fermentum absorbendo & enecando agentia. Ubique vero diætata est præscribenda, ex qua omne falsum, atque acre exulet; Non enim idem valet sal cum cibis assumptum, & externe

IMPETIGO
feu
LICHEN.

terne illitum : illic adjuvat, hic destruit morbum, atque tollit e medio. Ad Lychenes etiam Marrhubii folia ex aceto illita laudantur.

XXI.

SUFFUSIO.

Ad hanc classsem etiam effusio sanguinis, qui in cute vel sub eadem sistitur, referenda venit. Ad eam vero non semper remedium petitur, sed si levis est ac simplex, hoc est intra ipsam cutim, sponte evanescit, vel remedium non magno vincitur, eoque repellente fere. Ut notum est tumori ex illusione capitis infantibus orto in albumine ovi conquassato cum aqua rosarum a matribus medelam quæri, vel etiam ipsam pelliculam ovi internam ab albumine adhuc madentem imponi, vel quodvis denique frigidum metallum. At graviores contusiones vinum juvat cum primis, dein acetum quoque laudabile, cui radices & herbæ commodæ incoquantur, Symphiti, Sigilli Salomonis, Rosmarinus, dein Flores Chamomillæ, præcipue Romanæ, Thymus, & præstantissimus Hyssopus. Testis de hoc Riolanus senior, Galenus, S. Pauli, & Boyle, qui vidit viri femur calceo equi gravissime contusum solis Hyssopi foliis butyro mistis intra paucas horas sanatum, ita ut non modo dolor cessaret, verum & livor dispareret in cute. Vini spiritus quoque camphoratus juvat, cui accedere potest Crocus, si fortius velis, & alia. At si maxima sit contusio, verendum, ne citius putrescat sanguis quam dissipari possit, aut inflammatio superveniat, quæ metum incutit Gangrænæ. Hoc autam præcaveri potest, si manum operi admoveas, & secto tumore, vel aperto, evoces copiam grumosi sanguinis. Inflam-

ma-

mationi autem defensiva occurritur, quæ ex adstringentibus conflata sunt. Neque tamen calida humida sint, sed discutientibus mixta, illa enim sola, gangrænæ viam aperiunt. Dissecto tumore fit vulnus, quod ut reliqua, quibus contusio juncta, consolidandum est: unguento scilicet Ægyptiaco admisto digestivis, emplastro resolvente & a putredine defendente, conservando calorem partis nativum.

XXII.

Quæ supersunt cutis vitia: exanthemata, papulæ, phlyctenæ, epinyctides, vari, lenticulæ, sudamina & maculæ cujuscunque generis, ad cosmetice, ipsius Celsi, Hippocratis Latini, consensu rejicimus. Itaque iis relictis nunc quæ cuti universæ ubique locorum contingere queunt, ad particulares ejus tumores, id est eos advertemus animum, qui in certis tantum locis reperiuntur, ut sunt verrucæ & clavi potissimum.

XXIII.

Sunt autem ejusdem fere ordinis, & sub nomine verrucarum ambo possent non inepte collocari. Hæ nomen habent a protuberantia, suntque nihil aliud quam parvi tumores in cute prominentes, veluti monticuli, ex ipsius cutis substantia, ascenduntibus & elatis ejus partibus, vel in squamulas facessentibus, & materia crassa in poris subtus turgente indurata: In triplici sunt differentia: sessiles, quæ vulgares sunt, *μυρμηκία*, pensiles, *ακροχορδόνες*, & Thymi: qui rariores.

XXIV.

Verrucæ, in manibus frequentius quam ceteris Quales & ubi.
F parti-

partibus apparent, vulgares maxime: raro etiam in pedibus, facie, vel aliis corporis locis conspiciuntur, potissimum post primam infantiam, colore nigricantes, sæpe eminente pilo longiore ex summitate ejus foedæ. Hæ profundius inhærent cuti, inde difficiliorese præbent, nec facile tolluntur. Acrochordones contra faciliores, nec renascuntur abscissæ, ut ceteræ. Thymi ab herbæ ejus nominis flore sic dicti, altius prominent, in summitate facile finduntur, & tactæ leniter, illico cruentantur: genus dolorificum valde, ut vulgare est indolens.

XXV.

Curatio.

Tolluntur *verruca simplices*, vel plantarum acribus succis, ex radice dracunculi, ari, cyclaminis, chelidonii, lacte ficus, tithymali, allio, quod non semper succedit; vel rodentibus metallicis, auripigmento, calce viva cum sapone, &c. quod itidem fallit: Oleo denique vitrioli, aqua forti, & causticis aliis, quod certius, sed magis molestum quam pro morbi magnitudine remedium est. Extrahuntur quoque forcipibus, vel rasorio radicitus excinduntur; neque hoc tamen sine molestia & dolore est. Expeditissimum remedium ego inveni, si acus immittatur per mediam verrucam, donec sensus eam ad fundum penetrasse testetur: hæc ad candelam incalescat quousque ferri potest, idque tertia vice. Sic radix exurit, & verruca sponte excidit: Levis inflammatio solet accedere nonnunquam, sed cito iterum cessat, si emplastrum refrigerans adhibeas. Quæ ratio longe præferenda est Fallopiianæ cum Δ e, quam Sennertus recenset. Ruta inter duos

Præx. L. V.

25.

fi.

filices contusa, certe eas sanari dicitur. Vide *de iis Gal. M. M. XIV, 17.* Exemplum vero Obs. a Mœnichen Cultr. An. subjecti XIX. Sed & ad fornacem calidum, per dies aliquot subinde attritæ, solent recedere. Hæc de vulgaribus sufficiant: nolo enim nodos ad numerum verrucarum nexos, & gutturniis tectorum superstitione religione suppositos, aliaque anilia memorare. At *pendula* vel solo filo serico, successive magis magisque adstricto excinduntur sine molestia, nec alio remedio est opus, nisi ex radicibus repullulent: quod ubi fit, cauterium actuale, vel potentiale dictum terminum ponit excrescentiæ. *Tbymion* vero magis rebelle est, quod ego molestissimum, sub unguibus prominens, oleo tartari infuso feliciter soleo reprimere. Verrucas in facie potissimum fert ægre delicatior sexus. Hic nihil expeditius, quam oleo Oli eas tangere, verum per calamum impositum comprehendere ita vult verruca, ne ceteræ partes lædantur: uti quidem memini in fronte eminentem haut longe ab oculorum cantho a parente meo olim hac ratione sublatam.

XXVI.

Alia ratio est clavorum, qui in pedibus prominent. CLAVI. Horum ortus est ex calceis angustioribus, quibus digiti comprimuntur: & quoniam ossa subsunt, quæ cedere non possunt, compressione illa excluditur nutritius succus, arescente cute quæ hinc ita incrementum capit, ut crassissima reddatur. Quod si magna pars ejus super pulposam carnem vim patitur, eadem pari modo crassescit, sed quia periostium non premit, nullum exquisitum, nisi excedat, dolorem infert. Tum

*Tetrabib.
IV. 2. 82.*

late diffusum hoc malum callus audit, uti, si particula rotunda, clavus, a capite clavi quod refert. Hic excindi postulat usque ad punctulum nigricans, quod in medio est, imo donec cutis rubra & mollis sese subtus ostendat: Sic tollitur, sed non omnino, facile enim renascitur. Nonnulli exustoriis medicamentis utuntur, quorum exemplum Aetius suppeditat notabile. Chirurgum felicissimum, Guernerum Rolfincium, memini mihi puero præcipere, ut lardum imponerem, sic enim sequacem fore, ut cultro excisorio promptius obediat. Hoc consilium secutus, citra excisionem liberatus sum, & clavus sponte evanuisse visus est. Vidi Anglum, linteo aceto imbuto, in quo prius cepa contusa macerata erat, verrucam fovisse, deinde excidisse: post sectionem emplastrum emolliens imposuit per aliquot dies, quo ad annos aliquot æger liberatus est. Verum non opus est tot ambagibus ad exsectionem, vel enim extemplo institui potest. Quod si quis reformidet, etiam citra illam liberari datur, si pediluvio clavus mollescat, & sic cuticula una post alteram tollatur, quod fit nulla violentia, nam auferri sic sensim potest. Sed in eo difficultas est, ut ne redeat, efficiamus. Omnium primum est remove ea quæ comprimere arctius antea solebant. Celsi consilium etiam optimum: Clavum subinde deradere, nam sine ulla vi sic emollescit, ac si sanguinis quoque aliquid emissum est, sæpe emoritur.

XXVII.

*SUBCUTANEI
TUMORES.*

Ex cutis tumoribus evasimus: Ad eos igitur qui carnibus sunt familiares, accedendum foret: nisi se-
offe-

offerrent sub ea proxime advoluti & inter has illamve vel etiam ossa medii interjacentes quidam, qui tamen neque ad alterutram, neque ad alias attinent partes, minime vero omnium ad glandulas, cum in locis glandulis prorsus destituti oriantur, sed suo folliculo inclusi, eoque tanquam amiculo induti sunt, quibus ipsa cutis supra naturalem terminum attollitur. Hi omnes fiunt per congestum, successive, & quotidie magis ac magis apparent. Cyrtomata Hippocratem eos appellasse, existimat Marcus Aurelius, quod sublata a carnibus cute, gibbosin quandam varicibus similem referant. Sunt autem illa potissimum quatuor numero: Ganglion, Atheroma, Steatoma, Meliceris: etsi enim vulgo Ganglion huc non referatur, tamen ejusdem naturæ esse cum ceteris patet, nisi quod in hoc uno differat, quod reliqua tubera venis gaudeant suis, & nutriri existimentur, hoc iis careat. Hinc etiam Celsus videtur *Lib. VII, 6.* permotus, ut uno eodemque capite de iis agat, quem libenter sequimur. Omnia autem ista hæc habent communia, quod ex parvulo incipiunt, & diu paulatimque increscunt, & tunica sua includuntur, ut idem etiam docet: in eo interim reprehendendus, quod capitis tubercula vocet, fateatur vero mox, & in cervice, & alis, & in lateribus oriri: quod de tribus postremis capiendum, ganglion enim in articulis potissimum manibus, & ubi ossa proxime subsunt, quantum me observare memini, solet exsurgere. Quin & a ceteris nullum corporis locum immunem esse, modo laudatus Chirurgorum maximus interponit fidem. *Marc. Aurel. Sever. III, 7.*

Communia
eorum.

Cum itaque eadem specie appareant, eadem opera de iis peragi etiam æquum est; antequam vero ad singula perveniam, quædam adhuc de universis notabo, & quibus differant, potissimum exsequar, cum internis contentis, tum externis proprietatibus. Hic primum occurrit, quod nullo sint colore alieno, sed quia nec sanguinem, nec alium coloratum liquorem continent, cuti suus etiam maneat: est autem ad tactum quædam eorum diversitas. Quatuor nimirum duritiei gradus proponi possunt, quorum primus est Meliceridis, mellis tenuitatem habentis: proximus Atheromatis, pulticulæ similis, ex farina coctæ, quæ Athera Græcis appellabatur: Tertius Steatomatis, adipem in se continentis. Ubi dubium movet Aetius, dum tactus mollitudine a prioribus dicit differre: qui enim cedens pulticula melleve est mollior? itaque sic interpretor: quod digitorum apices facilius admittat, eorumque servet vestigia, nec ut priora, iis renitatur, molliorem ab ipso dici, hoc enim adipi est proprium, cum tenuiori materia tensus folliculus & fortius resistat, & resiliat pressus: ut videmus in vesica quolibet fluido impleta: Quartus vero & summus duritiæ gradus in ganglio deprehenditur. Est autem illa ipsa durities, quæ curationis rationem magna ex parte mutare jubet, quod in singulis nunc ostendendum est.

XXIX.

ATHEROMA
MELICERIS.

Atheromata & Melicerides in eo conveniunt, quod in folliculo fluctuet humor. Descripsit ea omnium optime Aetius, quare & eum potissimum sequar.

Athe-

Atheroma dicit, esse tumorem figura oblongum, & sublatum, qui ad compressionem digitorum ob humoris crassitudinem tarde cedat, tardeque iis ablatis revertatur, a quo meliceris differat, quod & rotundior sit, & humoris essentia tenuior & hinc ad digitorum compressionem celerius cedere, & celerius etiam reverti: cum quibus exacte Celsus aliique veteres consentiunt. Non autem hæc ita videntur posse discerni, ut certo omnia affirmare liceat: quin potius, quid intus habeant, ut conjectura prælagiri possit, sic ex toto cognosci, nisi cum ejecta sunt, non posse, Celsus monet, quod tamen non propter humorem, sed alia quædam simul ibi contenta ita fieri apparet: ait enim, in his quæ renituntur, aut lapillis quædam similia, aut concretos confertosque pilos reperiri. Quæ ad Atheromata refert Aetius, & in pultaceo humore existere dicit: addit etiam, alia tanquam sulphuris ramenta, & alia velut mansa Gallinarum ossicula offendi; quin Philoxenum animalia eruisse culicibus aut muscis parvis similia. Ossiculorum recentius exemplum est legere in Ephemeridibus. Nec minus notabile quod *Petrus Marchettus* in Meliceride se vidisse, ipse testis est: in ejus nempe folliculo alium ejusdem generis tumorem, sed minorem delituisse, sua & ipsum membrana inclusum. Vbi quis cum ranis *Æsopi* apud *Phædrum* exclamandum putaverit:

Quid futurum est si creavit liberos?

XXX.

Steatomatis non multum diversa est ratio. Quod, STEATOMA, qua vel auctoritate vel experientia ad solas glandulas per-

Lib. VII, 6.

Terrabibl.
III, 7.

Ac. N. C.
Leop. XII I.
134.

pertinere vir quidam doctissimus, hodie perhibeat, cum nemo usque adhuc idem affirmaverit, perinde scio atque illud, cur Celsus Capiti velit esse proprium. Hoc ut reliqua sensim exoritur, nec nisi duritie ejus quam includit materiæ, ab iis differt: sed tactu lene est excedens. Plerumque ampliores basin habere consuevit, imo latissime patet, resolvitque totam cutim superpositam, sic ut ea labet, inquit Celsus, cum in ceteris sit adstrictior. Nec minus a Struma, quam reliquis mollitudine differt, quæ durior utique, & nullam a digitis compressionem admittit, sed iis resistit fortiter, nisi forte ipsum hic Steatoma pro struma sit: Nam etiam in collo oriri, cum reliquis, eidem Celso fides habenda est.

XXXI.

Priusquam curationem tradam, de causis illud monendum habeo: plerumque citra manifestam causam sua sponte oriri, sed aliquando tamen externæ deberi violentiæ. Nam & Moniales quæ genubus jugiter positæ preces suas recensent, melicerides in his auferre; & ex equitatione incommoda steatoma militi in perineo enatum, meminit Etmullerus. Ex quibus hoc quidem rarius est, apparet tamen partium attritionem malo ansam dedisse; illud autem ex laxata cute ortum est: cum enim sub tendinibus in unum concurrentibus magna pinguedinis copia soleat adesse, hinc facile fieri potuit, ut illa pariter cute ac tendinibus læsis, excreverit. De dignoscendis quoque his a ceteris Tagaultius nos instruit, indicio esse dicens, cysti inclusum tumorem si mobilis sit sub cute; si vero fixus, carnibus.

busque & cuti adhærens, nullum esse ei integumentum: quod apprime notatu utile est.

XXXII.

Duplex hæc curandi modus est: discuti enim possunt, & excindi. Quorum hic ultimus longe est potior; Nam & rectius multo, & promptius etiam opus succedit. Modus operandi hic est: Aeger ad commodam sectionem compositus, & si ex re est, in sella collocatus, quiescit, cutis reprehensa manibus, ut in setaceo ponendo fieri solet, cultello acuto cujus dorsum obtusum sit, acie sursum spectante, inciditur, & folliculus hoc pacto ab omni læsione tutus, in circuitu scalpello, subtus vero digitis vel scalpelli manubriolo separatur, ubi id cavendum sedulo, ne vel intempestiva violentia rumpatur, & Atheromatis vel Meliceridis humor effluat, vel etiam, si vasa ad eum tendant, aut nervi adjacentes innectantur, læsionem accipiant, nam ex hoc sensus aliquis posset perire vel motus; ex istis vero ingens profusio sanguinis solet imminere: hinc & anatomes peritia, & industria non levis ad hæc requiritur. Peracta separatione, radices ressecandæ, sique vasa sint, prius illa liganda sunt, sicque folliculus eximendus: cujus, si humorem continebat, isque effusus est, difficilior fit a subjectis partibus separatio: nisi vero totum excindas, metus recrudescentiæ est, novo per easdem vias humore in inane spatium confluyente. In Steatmate vero ex quorundam mente ipsa quoque folliculi tunica incidenda, quia non facile a subjecta carne separatur:

Celsus c. l.

Veruntamen Severinus & hic totum exemit, & per plures annos conservavit incorruptum.

XXXIII.

Hic vero duo adhuc notanda: primum, hæc tum habere locum ubi latior basis est: si enim ex angusta propendeat tumor, nulla opus est separatione, sed totum steatoma brevi manu a basi rescindendum, hic enim chirurgiæ modus expeditus est, & sic ulcus parvum & planum fiet, & curatio compendio transigetur. Alterum, quod etiam supra tetigimus, quosdam folliculos exertos esse, & in superficie, quosdam altius insedisse; in quibus caute agendum: solent enim nervi & vasa esse proxima, nisi inserantur plane, unde superior cautio hic est observanda.

XXXIV.

Exemto folliculo, committenda vulneris ora, & si plus æquo laxa cutis ex magnitudine tumoris est reddita, pars ejus rescindenda est. Deinde suturis committitur, vel, quod salutare Aquapendentis Fabritii est præceptum, glutino, quod istum semper sequatur inflammatio, hoc facile evitanda. Quod si folliculus totus non extractus sit, venam subjectam, unde incrementum alimentumque ad eum pervenit, transversim incidamus, sic enim arefcere & exire reliquias necessum est. Sed & digestivis licebit rem tentare, & si crassior forte membrana est, cathæreticis. Vide in hoc P. Marchetti obs. XXXV. Dehinc superponendum tamen defensivum est, ad præcavendam externam inflammationem, & puris generationi studendum, ut in aliis abscessibus fieri solet. Exempla

meli-

A tius.

*Cap. de
Bronchoc.*

meliceridis sectione curatæ vide quoque March. Obs. XXI. & XXXI. Atheromatis vero XXXIV. & Ioh. Sculteti Obs. LXXXVIII.

XXXV.

Atheroma, si in capite extiterit, exempto folliculo, pericranium secari jubet Sennertus, & calvariæ radi, ne radix ulla mali relinquatur. Idem monet Fabritius: uterque ex Aetio habet. Exemplum exacti Atheromatis vide iterum apud Sculterum, Obs. LXXXIV. Steatomatis feliciter resecti historiam reperies apud Hildanum, Cent. IV. Obs. XVI. & XVII. ex qua cautelam licebit petere: neque enim omnes ejusmodi tumores resecandi sunt, Vide tamen & II, 79.

XXXVI.

Et sic quidem chirurgica manu tolluntur hæc. At enim pauci sunt, qui sectionem non reformident. His discutientia & suppurantia commodare jubent, sed raro succedere posterius arbitror, prius etiam rarissime. Suppuratio enim, quæ solis abscessibus carnosus debetur, in tali humore, heterogeneo & crasso vix succedet, deest enim calor, qui pus concoquat: multo vero difficilius credi potest, discuti in folliculo membraneo, imo nerveo contentum humorem, eumque crassum, & ad solidam proxime accedentem materiam. Fortassis antequam folliculus perficiatur, disjici potest materia: Nam Tagaultius recentes & tractabiles discuti seu resolvi posse, duros vero & jam inveteratos nequaquam, optime videtur monere.

XXXVII.

Tamen nihil non tendandum, incertum licet, si

certa operandi ratio locum non invenit. Consultius interim esse arbitratus fuerim, caustico aliquo aperturam moliri, adeoque viam facere humori ut exeat: Quod idem placere video Aquapendenti, atque aliis, qui fatentur aperte, Atheroma non obtemperare discutientibus, quia materia solvi in halitus non potest: septicis igitur agendum esse. In quo, ut recte sentiat ille, non tamen audiendus, ubi Arsenicum & Auripigmentum miscet: Rectius acida & salina in usum veniunt, vel Barbette unguentum, mox describendum: Si quis tamen insistere velit blandioribus illis, Aetium adeat præprimis, qui magnam horum copiam conscripsit, ut quilibet habeat quæ possit eligere. Commendantur autem maxime etiam emplastra ex Gummi Ammoniaco, Galbano, Terebinthina, adipe anseris, resina, oleis Liliorum, Chamæmeli, succini, sulphure: Oxycroceum porro, & de ranis cum Mercurio. Barbette se aliquot curasse Balsamo Peruviano affirmat: commendat & unguentum Aegyptiacum cum Chalcantho & Æruginē. Balsamum sulphuris Ethmüllerus laudat, & laminam plumbeam argento vivo illitam, quod tamen ex alio didicit.

XXXVIII.

GANGLIA,

Ganglion superest, quod durissimum ex his diximus. Γάγγλια, Γάγγλαι, Græca sunt nomina, Latinum Lupia, quod instar parvi Lupini sint, si credimus Vidio, sui ævi scriptoribus dicuntur. Tubercula sunt Nuci avellanæ magnitudine plerumque paria, ubi cuti tendines, nudaque ossa substernuntur, conspicua, specie glandularum, doloris expertia; seu
brevius

brevius ex Philagrio, Paulo interprete, *Ganglion est nervi nodosa coactio & tumor, ex plaga seu labore subortus, raroque sponte proveniens, manuum juncturas & talos frequentius occupans, rarius cubitum, & caput.* Quo tamen, locorum quibus fiat amplitudinem non plane exhaustit: nam & in medio metacarpi, alibique in extremis artuum, ubi nullæ sunt juncturæ, sæpe oboritur. Celsus, ut dixi, ad capiti propria refert, nescio quo errore, quem Aetius corrigit, & rarius cubitum & caput occupare, rectius perhibet. Quo pacto oriatur, non liquet: Ex succo nutritio nervosarum partium fieri, Klopston Havers, nuperus scriptor conjectat. Videri posset lymphaticus humor, qui partes nervosas alluit, nescio quo spiritu Gorgonico afflatus, congelari, nisi sensim excresceret, & post labores ac vim factam oriretur, ut retuli modo. Itaque apparet, per appositionem novi liquoris quotidie augeri, ubi sensim cepit, & subtilioribus evaporatis, indurari. An vasculum lymphaticum supra modum expansum, membranam constituat, ubi vel ictu, vel alia violentia illata urgetur humor qui intus vehitur, non patet.

*Quomodo
fiat.*

XXXIX.

Non est magni momenti hic tumor: hoc enim habet beneficium, quod rupta membrana evanescat. Ad hoc expedite Helvetius, inter Batavos celebris, utebatur malleo ligneo, corio obducto, quo percutiebat tumorem. Hinc etiam forti manus allisione ut oritur, sic & tollitur. Non opus igitur admove-
re scalpellum, & velut in ceteris, excindere. Nec

Curatio.

Art. II.
subj.

NODI.

emplastris tædioſo labore reſolvi poſtulat: Emolliri vero poteſt, dein vi diſſipari externa, a chirurgo ſubito compreſſus, quam elegantem rationem apud Aetium videre licet. In eo reſolvendo quid Hydrargyrum valeat, *Iob. Loſſius* mirabili eventu expertus eſt ut libro de podagra perhibet: ubi emplaſtrum addit a Zacuto Luſitano ſibi communicatum, quod **NODOS** podagricos quoque diſſolvat. De quibus ſi quis ſit ſollicitus (constant autem ex iiſdem, ex quibus Ganglia, & quaſi raſæ cartilagini ut cum Celſo loquar, ſimile quid contineant) is vel ſolus optime ſatiſfecerit.

XXXX.

TALPA,
TESTUDO,
NATTA,
BOCIUS,
LUPIA.

Sed quid de illis dicendum, quos recentiores chirurgi, Barbaro-Latini Sennerto vocati, nobis memorarunt: Talpa, Teſtudine, Natta, Bocio, Lupia, & glandula? Bocium bronchocele eſt, Lupia & glandula ganglion, teſtudo & talpa idem ſunt, & quia ad ſaniem plerumque tendit, Vido ſi fides, forte incipiens eſt meliceris, aut quid ſimile: Mirum interim a noſtratibus non obſervari. Nattam vero, num ad ſteatomata vel alium folliculo contentum tumorem referemus cum vulgo? Ignoscant mihi Sennerti aliorumque manes, cum non ſatis penſitaſſe rem, verum ab invicem exſcripſiſſe dixerō ſuos actuoſes. Ille ſane ſe prodit liquido, cum ſeorſim conſiderari dicit, quia privatim capiti accidunt; mox ſui oblitus, in dorſo, & humero quoque erumpere tradit, Celſum in utroque ſecutus. Dicit autem Guido Cauliacus, aliquando cyiſti includi, nonnunquam in carne eſſe infiltratam, hoc

hoc est altius radices agere. Ex quo patet, illam huc quidem pertinere, hanc vero esse corpus extra cutim propendens, carnosum, vasisque ac glandulis suis instructum, paucis, id, quod Carcinoma nostratibus audit: non ergo ad tumores, sed ad excrescentias referendum, de quibus si tempus & otium id permittent, agemus in calce. Dicit hoc Guido aperte: In quacunque corporis parte provenire, & esse *carnosam excrescentiam*, sub forma cucurbitæ, aut melonis, aut naticæ; in quo reliqui, nominatim Tagaultius, & Vidius Vidius consentiunt.

XLI.

Iis jam expeditis, quæ intra cutim carnemque apparent ad hujus ipsius tumores animus applicandus est. In his *Furunculus* primum locum occupabit: Quem Celsus tuberculum appellavit, ego tumorem optimo jure dici posse arbitror: Enimvero est tumor acutus cum inflammatione & dolore. Nostro idiomate dicimus *einen Blutschwehren* / quia non sincerum pus, sed sanguine permixtum ex aperto effunditur. Furunculus vero fortassis, quia dolor, dum in pus vertitur, & tendit cutem, acerrimus est, & quasi cum furore pulsans. Nostrates ajunt: *Es quurt und wühtet*. In iis quibus impurior est sanguis, & calidior tamen, erumpit: sive coagmentetur serum crassius & minus coctum, sive relinquatur aliquid ex morbis gravioribus acutisve, ut post variolas frequenter accidit. Familiarissimum infantibus est malum, deinde juvenibus, & ex his iis cumprimis, quibus crudior, & cocturæ diffi-

CARNIS
TUMORES.

FURUNC-
ULUS.

Subiectum.

difficilis cibus in victum cedit: his enim ubi aliquid indigestæ materiæ inter musculorem carnes hæret, Sistitur sanguis & calorem concipit. In eo nullum est periculum, etiamsi nulla curatio adhibeatur, præsertim si minor sit, & superficiem musculorum sub cute leviter occupet: si vero in adultis apparet, sitque major, dolor efficit ut medicina expectatur, quæ maturius liberet. Ea talis sit, ut quam citissime tumor suppuretur: Far triticeum vel panis cum butyro masticatus & impositus facile vulgi remedium est, his addi possunt radix Altheæ, ficus, & cetera emollientia & in pultis formam redigi, calideque imponi: sed commodius emplastro res peragitur: diachylo, vel tetrapharmaco Galeni, quod ad omnes abscessus commendat Chirurgus expertus Gualtherus Ryffius, vel simili: Proprium ejus medicamentum esse Galbanum, Celsus prodidit.

XLII.

Non autem semper Carbunculi abeunt in verum statim pus, neque expectandum est in adultis ut sponte rumpantur, nam plerisque in locis cutis obstat densitas: ergo cum mollior apparet tumor, & cacumen altius elevatur, digitoque admoto, in eo pus fluctuare percipitur, scalpello aperiendus est: tum sanguineus pure mixtus ichor prodit, sequitur mox verum pus, ad quod promovendum unguentum digestivum adhibendum est: Pure dein evacuato, sponte consuevit evanescere.

XLII.

Hæc de furunculo: Ecquid vero est Phyma & Phyma

Phygethlon? Hæc aliud sunt apud Celsum, aliud apud Chirurgiæ scriptores reliquos: hi enim omnes, Galenum secuti, glandularum tumorem interpretati sunt, Cornelio autem abscessus furunculo major & rotundior est: nam utrumque parum inter se, & a furunculo differt; ut Galenica illa cum bubone concidunt: nisi propter magnitudinem ad abscessus veros quis malit referre: Quicquid sit, nulla hic tradi debet nova curatio, cum seorsim hodie illa non considerentur, & sub istis nominibus ignota sint.

XLIV.

Furunculo *Paronychia* a me subjicietur, cum nihil aliud videatur esse, quam furunculus circa extremitates digitorum enascens: haud sane apparet in ceteris ab eo diversus, cum & calor & dolor, & subsequens pus, & reliqua quæ in furunculo adsunt, omnia compareant, & tantus quidem dolor sit, ut non ipse modo veluti cum furore quodam sæviat, sed & illos quos affligit, pene faciat furere. Nec causa diversa est: nisi quod acrius paulo serum; vermem enim subesse, vulgi est fabula: etsi semel deprehensus unus Iohanni Agricolaë memoretur. Hinc ex aperto postea, perinde ac illinc, pus albicans cum sanguine erumpit. Quod autem dolor fit sævior & quasi intolerabilis, ex loci est conditione, cum periostrium sit in propinquo, multo quam carnosâ fibra magis sensibile. Sed nec multum carnis hic loci apparet, verum substratas cuti, cum primis articulum versus, glandulas anatomicas oculus detegit, sat magnas, globosas, pellucas; quas dum con-

PARONY-
CHIA.

Obs. I, 97.

Prognosis

*Chir. VII,
c. 19.*

*Pract. Lib.
II, t. An-
not. ad Pan-
dolfin. pag.
279.*

spiciunt in ulcere imperiti, malignum esse & hoc aliquid præter naturam autumant: Et vero illud est quod vidit Guilielmus Fabritius, cum incipiente malo abraderet cutim. Hæ glandulæ pulpam digitorum componunt, & fibris nerveis arctissime connectuntur: Est etiam in dorso unguibus substratum subtegmen coccineum reticulatum, nondum ab Anatomicis descriptum, ex quo color per unguium cornu perlucet: quod ut in febrium accessu horrore ingruente, lividum fit, sic forte itidem hic inflammatur, & dolores conduplicat. Observatur autem, eos maxime, qui manuum operam collocant aliis, & vulgum hoc malum infestare: quippe quibus facile hic aliquid contunditur, & extra vasa erumpit. Huic si spatium subsistendi concedas, immanem ciet dolorem, & nisi exitus detur humori, os ipsum rodit & corrumpit, ut articulum rescare haut raro necessum sit, quoniam sanari nisi osse correcto vel exempto, ulcus non potest. Quod partim acredini humoris adscribendum, partim loci angustiae, statim enim ubi diffundit se, periostrium tangit, & hinc cruciatus, quin & inflammatio augetur, & manum, totumque brachium occupat: Ex dictis liquet: Paræum falli, dum ab osse initium ducere hoc malum autumat. Nam & Fabritii observatio, & curatio ipsa, & omnis morbi historia contrarium evincunt. Quod si tamen unquam os corrumpitur prius, ut in Vigonis affectu, & doctissimo Merklino annotata historia factum videtur, ad spinam ventosam pertinere, non Paronychiam, non est ulla ratio ambigendi.

Curatio itaque non tam magna, quam prompta Curatio.
 requirit auxilia, eaque talia, quæ cito adigere tumo-
 rem ad suppurationem possunt, qui deinde prompte
 (quod palmarium) scalpello adacto, aperiendus est:
 Sæpe mansus cum butyro panis huic rei suffecit: & su-
 bit equidem Sennertum atque alios mirari, qui in
 levi, acuto licet, malo per venæsectionem, purgatio-
 nem, repellentia, atque alia longius petita ad suppu-
 rationem procedunt: cum Chirurgus quilibet vel
 intra paucos dies uno emplastro & unguentulo cum
 eo transigat quod citra periculum factum vidi fre-
 quenter, nec unquam male cessisse memini. Est tamen
 & alia in principio illud curandi ratio; quando inci-
 sa cute, prius nonnihil emollita, feri limpidi exigua
 portiuncula, quæ unam aut alteram guttam non ex-
 cedit, evacuatur, essentia postmodum theriacali, vel
 vini spiritu cui theriacæ nonnihil admixtum est, cum
 linteo applicata: cujus methodi auctor est Hilda-
 nus. Verum hoc non sine dolore efficitur: nec Obs. 1, 97.
 methodicum est, cruda evacuare, sed cocta: Itaque
 potius emplastro diachylo vel alio pus movendum,
 quod intra biduum, vel promptius succedit, vel etiam
 cataplasmate utendum iisdem facultatibus instructo,
 emolliente scilicet & digerente. Nulla deinde mo-
 ra, ut dictum, cutis incidenda: facit enim abscessus
 exilitas, puris paucitas & cutis durities, ut inde erum-
 pere sponte non queat: effuso pure, digestivo & mun-
 dificantibus ex terebinthina, melle rosato, Aloe, Myr-

rha, thure, aliisque paulo siccioribus, qualia serum quod peccat, & glandulæ supra memoratæ sibi postulant, ulcus curandum & sarcoticis occludendum est. Tertia ratio, eaque facillima est, si in principio statim cum theriaca allium contundas, vel ejus misceas cum illo succum, & imponas: sic discutitur, & redit in circulum lymphæ, ut nec opus apertione fiet. Idem etiam aperto ulcere, ubi chirurgi imperitia sordidum ac carne luxuriante spongiosaque plenum apparet, (ita ut fit) miraculi instar uno die morbum sustulisse novimus.

XLVI.

CARBO. CARBUNCULLIS etiam in carne apparet: qui sphacelosa ejus corruptio est, a maligno humore veteribus credita: Recentes, ut solet ævum esse oculatius, & quod illi per transfennam, apertius videre atque discernere, ab acido acerrimo sanguinis purpuram everti, & non sectis ac caustica faciunt, exuri carnes, experimentis evincunt. Dicitur & Carbo, quod illum colore refert: quippe cinerea, vel prorsus atra, crusta contextus est: ceu pix ac bitumen splendere solet: sensus omnis, ut in sphacelatis accidit, extinctus est. Duplicem esse, simplicem ac pestilentem, auctores volunt: quamvis vix alius quam pestilens occurrat, altero pene nobis ignoto. Medicamenta a Galeno illi destinata vix satisfaciunt, multo minus missio sanguinis usque ad animi deliquium invenit locum, sed Alexipharmaca intus exhibenda, & ad unctionem veniendum est, de qua Celsus: nihil melius esse ait, quam protinus adurere: neque id grave,
cum

cum non sentiat æger, quoniam ea caro est mortua: Tum crusta idoneis medicamentis adhibitis, levatur, & fit ulcus, curandum sicut reliqua ulcera, mundantibus, sarcoticis & epuloticis.

XLVII.

Hæc secundum illum: quod si unctionem ægrotus reformidet, ut sunt nostrates homines meticulosi, & minus efficacibus remediis adsveti, neque cucurbitæ, nec vesicatoria, nec bufones, (incerta) nec sapphirum, nec hyacinthum (vana) nec simpliciter acria attrahentia (nociva) laudaverim, sed attrahentia cum theriacalibus, spiritus confortantibus & gummatibus mista, vel tale, quod & Diemerbrock expertus, & Barbette laudat: ℞. Rad. consol. maj. sic. Herb. Scord. a ʒij. Rad. Alth. farin. sem. lin. tritic. a ʒ℥. M. F. pulv. subt. c. ▽ comm. coquendus ad pultis Crassitiem. Add. mel. tereb. Ung. Apost. a. ʒiij. Pic. liquid. Ung. Basil. a. ʒij Vitell. ovor. nō. j. Croci ʒj M. Vel Mindereri: ℞. But. Ung. ros. popul. anodyn. ol. Lil. alb. Cham. add. Ferment. vitel. ov. Vel Emplastrū quod in Barbette chirurgia legitur: quæ remedia sæpissime renovanda sunt, quia vehementer carbunculus exsiccat; vel Empl. Arsenicale magneticum ejusdem Barbetti. Sunt qui Cauterio potenti utuntur, vel circumscribunt carbunculum Butyro Antimonii; quo potissimum illud obtinetur, ne serpat per vicina malum: quod si fit, sæpe in longum protrahitur curatio. Posthæc levanda crusta, atque, ut dictum, mundificandum ulcus & consolidandum est, ubi bals. ʒis, Ungv. tetrpharm. vel empl. Apostol.

liquatum, vel Aegyptiacum, vel fuscum Wurzii cum putredini resistantibus adhibenda: tum ciccatrix ducenda qua fieri potest, minus deformis.

XLVIII.

OEDIMA.

Hæc ex sanguine originem ducunt: Nunc qui sero debetur exponendus venit. Hic fit, illo in mediis carnibus subsistente, & proprio nomine *Οιδημα* hodie vocatur; Hippocrati vero, qui tumorem quemlibet præter naturam eo solitus est notare, cum adjuncto: *Molle*. Veteres, quibus nulla feri & pituitæ fuit distincta cognitio, Pituitosum pronunciarunt & frigidum, ut contra sanguineos omnes calidos non sine causa habuerunt. A Celso nullibi ejus mentionem fieri mirum est. Et videtur post demum a Galeno hoc nomen ipsi attributum, propriumque redditum, cum quatuor humorum imperium stabiliret, quem ceteri pro more e vestigio sunt secuti. Non est vero existimandum, oedema tumorem esse quales reliqui consueverunt, qui definito certoque gaudeat ambitu, Nam intra carniū fibras se continet quidem, sed ita, ut modo majus, modo minus occupet spatium, seseque varie diffundat, nec limites agnoscat præscriptos, quibus contineatur: Sed præstat eum accuratius descriptum dare.

XLIX.

Quid

Est ergo intumescencia manuum potissimum, vel pedum: raro alibi visitur, & si totum corpus aliter aliterque occupet, *Αευκοφλεγματία* appellatur, quam ad Hydropem referunt nonnulli. Articulos ta-
men

men aliquando obsidet: uti quidem non in genibus modo, sed etiam in carpi regione illum observavimus, valde notabilem ac pertinacem admodum. Fieri fere solet, quoties vim patitur, ut per arterias influens in partes, remeare totus sanguis non possit, si-ve comprimantur, si-ve alia quacunque ratione per spatia intermedia advenientem tardidus ægriusque transmittant: Sic enim accidit, ut proprie sic dictus, solus per venas refluat, relicto post se glutinoso & crassiore sero. Quod ita fieri, cum ipsa laborans natura aliquando manifestat, tum vinculis constricta & coacta prodit. Non enim aliunde est derivandus pedum in prægnantibus tumor, (rarissimum, quod nuperus scriptor chirurgus memoriæ prodidit se vidisse, ut totum corpus occupet) quam quod rami Iliaci ab utero comprimuntur: quod si, ut in modo allato exemplo, universum inundetur corpus, sine dubio ex ipsa cava idem passa id evenit. Imbecillibus quoque contingit hoc mali, ut qui ex febribus Chronicis convalescunt, & Phthisicis ad extrema reductis. Quod si experimento etiam discere illius rei rationem cupias, venam quandam ex majoribus ligato, pauloque post, partem ex qua illa reducit sanguinem, incidito: videbis inde non sanguinem, sed aquam promanare. Est igitur *Oedema*, seu potius *oedematosus tumor frigidus*, (hoc est præternaturali calore carens) *mollis, a sero in interstitiis fibrarum, carnearum potissimum, stagnante proveniens.*

L.

Signum ejus est caloris ruborisque absentia, & quod

Signa.

quod vestigia recipiat digitorum, quod in illo qui carnem spectat, pathognomonicum est. Nullus adest dolor, nisi tensivus: quod si est acre serum, fibras tendinosas pungere, doloresque excitare solet: & tum vocant nonnulli tumores scorbuticos. Laxum hunc tumorem omnes statuunt, & mollem, quia digitis cedat: frustra tamen, nisi fallor; ubi enim magna copia in maximam molem attollit membrum, non sane mollis est, sed durus, tenditur enim cutis vehementer, omne vero quod valde tensum est, renitet, adeoque est durum; & licet digitis cedat, non tamen id fit citra fortem compressionem: Interim hoc verum est, omnem digitorum vestigia aliquandiu servare, & ita laxum illud explicandum venit. Accidit nonnunquam & supervenit aliis affectibus, Phthisi, ut monui, hydropi, febribus quartanis diuturnis, & quibus menstrua rite non fluunt, cujus rei causa in aperto est.

LI.

Prognosis.

Oedema diuturnus morbus est, periculo tamen vacat, sic omnes loquuntur medici & sentiunt: ego distinctim pronunciandum existimaverim: Nempe, ex quacunque corporis dispositione præternaturali sit tumor oedematosus, eo sublato, & ipse cessat: ut prægnantium, & qui post febres demum advenit tibiis, nam is quoq; remediis non adeo difficulter cedit: Qui vero sponte, nulla ex manifesta causa, apparet, diuturnus esse & magis rebellis assolet. In senioribus sæpe incurabilis est, deficiente natura: in florente vero ætate obsecundat: & aliquoties a me, etiam ventre
jam

jam intumefcente, adeoque hydropis ostendente se initio, feliciter sublatus est. Si simplex est, recedit, resorbent enim serum venæ & aliorum abducunt: si vero depravatum illud sit & crudum ex indigesto chilo, sæpe diu affligit, & difficulter cessat, & in scirrhum quandoque degenerat, perraro etiam suppuratur. At scorbuticus dictus tumor, qui non insipido, sed falso sero solet scatere, correcto hoc ipso, & mali fonte exhausto, demum cessat: ut mos est symptomatum, vel eorum qui ex alio pendent morbo. Quod enim in foro suo solent Icti monere, id etiam in foro medico locum habet. Accessorium sequitur suum principale.

LII.

Hinc etiam in curatione ad causam, ut fere semper, alterum oculum intentum habeat medicus: Si sui juris sit morbus, & a feri copia, ejus per alvum studendum est educationi, successivæ tamen potius quam simultaneæ, quæ potionibus commodissime instituitur. Diuretica quoque, & quæ incidunt salia fixa urinosa, & composita, uti & diaphoretica, egregia sunt, decocta lignorum potissimum, sed tardius auxilium ferunt. Si vero & viscera labem suscepisse suspicio sit, & hinc crasfiorem lympham stagnare ex cruditate, accedant alia, quæ debilem calorem ventriculi ac sanguinis excitent, viscera roborent, & tonum ipsis restituant. Hoc præstant plantæ quamplurimæ, Agrimonia, Chamædrys, Fumaria, flores Genistæ, Rorismarini, Epithymum, & ejus generis alia: sed & metallica quædam, Chalybeata maxime, liquores martis mitiores,

& ejus vitriolum; illud aromata, itemque plantæ floribus verticillatis odoratæ, & ex utroque genere parati cum sale Ammoniaco spiritus volatiles oleosi. denique omnia in cachexia usurpari solita, uti Absinthii summitates: si scorbutici quid subsit, strobuli pinastri (nam pinum natura negavit Germaniæ) semen urticæ, ipsiusque minoris succus, radix graminis, germinantis frumenti herba, & similia vulgata, sæpe reliquis nihil valentibus, præter spem ægrum levarunt. Externa vero etiam necessaria sunt. Galenus spongiam cum poscæ expertus commendat, cujus rei rationem explicare nititur Aquapendens: fasciis quoque usus. Quem imitatur Barbette, apud quem elegans quoque extat infusum. Mihi unguentum Aragon, de Arthanita, & ex emplastris Nervinum, de Baccis Lauri, admistis aliis pro re nata discutientibus, auxilio fuit. Thuri, myrrhæ, sulphuri, nitrosis etiam locus in balneis; Liquor volatilis oleosus externe adhibitus egregiam operam mihi nonnunquam præstitit. Aquam in qua calx restincta sit cum vini spiritu, alii commendant, spongia vel lintea imbuta eo imponi jubentes. Euporista pro pauperibus optanti stercora caprilla, vaccina, columbina ex usu esse possunt, quæ insigni discutiendi vi pollent. Lixivia quoque satisfaciunt, quibus herbæ incoqui possunt. Quod si in scirrhum degenerat oedema, plerumque desperatum est, membrumque ut inutile abscindendum: raro enim tunc sola externa afficiuntur, sed glandulæ omnes mesenterii, aperto cadavere indurataeprehenduntur: quales & sæpe in non scirrhosis solent apparere. Sed de his postea agemus.

Sui generis carnem esse gingivarum substantiam, spongiosam scilicet, & mollem, (nam duriuscula videtur, quoniam ossibus substratis arcte inhæret) glandulis intertextam, recentium constat examine: Hanc quoque tumores suos pati, nemini credo, ignoratur. Etsi vero plerumque non magnum habeant periculum, non tamen semper ex omni parte expectit esse securos, sunt enim duplicis generis: Vnum est eorum, qui ex quocunque circularis sanguinis motus impedimento accidunt, & facile evanescunt sponte, quale quid nemini non aliquando accidit, nulla manifesta de causa. Nec magis metuendus est, qui ex dentium dolore, cavorum maxime, cieri solet, non gingivam modo proxime occupans, sed etiam genam, ejusque infernam vel supernam partem, pro situ dentis, ita implens, ut pendere videatur: est enim hic affluxus humorum, qui calide adhibitis remediis exsiccantibus & discutientibus cedit, gingivæ vero tumor, si modo ex dentis dolore est, adeoque *ἰπτιγένημα*, facile eo recedente subsidit, nam & ab externo quodam intra dentem cavum hærente compressa idem patitur, & eo remoto, illico cessat. Est vero præter hoc aliud genus, quod ad ipsam proxime spectat, ubi accedit inflammatio, tumor, & abscessulus ab acri sero stagnante, & incluso in ventriculo quodam, ut Aetius loquitur alibi, quod cum non sit contemnendum, proprium sibi commeruit nomen, ut Græcis *παργαλίς* nominetur, de qua & cognato malo epulide doctissimam legere li-

GINGIVA-
RVM TV-
MORES.

cet inauguralem dissertationem elegantis ingenii, mihi-
que amicissimi Georg. Frid. Franci a Frankenau, in il-
lustri Leucorea nunc Professoris publici, ubi accura-
te omnia exposuit: Hæc cum magno & insolito dolo-
re conjuncta est, eoque ab altero genere discernitur,
tumet quoque & calet vehementius, & instar furun-
culi sævit: quam si sinas, ne maxillam erodat, & acri-
monia sua fistulas excavet, valdopere est metuendum.

LIV.

Eorum cu-
ratio.

Huic igitur promta adhibenda sunt remedia: ne-
que tamen a reliquis abscessibus, ad quos tandem ac-
cedit, degenerans, multum diversa requirit, nisi quod
loci conditio non omnia medicamentorum genera,
formulasque admittit. Repellentia hic, cum adhuc in
fieri est, adhiberi quidem possunt, raro tamen pro-
sunt. Discutientia præstantiora sunt, quæ simul atte-
nuando, humorem disponunt ut resorberi possit. Fi-
ant itaque gargarismata ex Salvia, Mentha, Calamin-
tha, cum Plantagine; imo spirituosæ etiam addantur,
ipsaque vinosa destillata adhiberi licebit. Quibus nihil
juvantibus, emolliendus tumor venit, & si cesset per-
rumpere materia, ferro secandus. Emollientia
tum gargarismatis forma possunt admoveri, tum ve-
ro ficus soli sufficient, per medium secti & imposi-
ti: evacuato pure unguentullis ex melle rosato,
additis exsiccantibus, ulcus mundandum est, pri-
mum sanguine Draconis, Rosarum floribus, Balaustio,
tum Tormentillæ radice, Sabinæ pulvere: nam par-
tis humiditas fortissima postulat. Quod si non cedat
foetor, & corruptus humor appareat, balsamus Peru-

vianus

vianus egregie juvabit, dein flos æris, alumen, Chalcitis, adstringentibus admistis, interponi possunt. Sed forte omne absolvit punctum Chalcanthi spiritus, qui in Venereis etiam, aliisque pustulis solo attactu omnibus expectationibus satisfacit.

LV.

Hic jam forte expectari a me posset, ut etiam de Sarcomatis, seu excrescentiis carneis agerem, utpote quas carnosas esse, adeoque ad carnem quoque pertinere, ipsum indicat vocabulum. Sed in memoriam revocandum est, me in primordio statim monuisse, tumores & excrescentias distinctim esse considerandas. Cum autem tales propendeant extra cutim, merito his potius quam illis ac censenda sunt, præsertim quum non vera constent carne: est enim caro congeries fibrarum tendinosarum, molli & spongiosa substantia, a perfluente sanguine rubente vestita; cum hæc sit massa quædam incondita plerumque, ex fibris membranaceis, nervosis vulgo dictis, sine ordine dispositis conflata, substantia varia, & cum carne nihil habeat commune præter tomentum simile, sed inordinatum, suis vasis (unde etiam rubet) instructum, cujusmodi substantiæ, licet carnosæ dici possint, tamen vera caro reputandæ non sunt, cum compertum sit, ex cute etiam excrescere, quod prudenter advertit Clopton Havers, discursu de accretione & nutritione. Agemus ergo de his suo loco forte in calce operis. Pergo jam ad Glandulas.

GLANDU-
LARUM
TUMOR-
RES.

Gal. M. M.
XIV, II.

SALIVALI-
VM INTV-
MESCENTIA.

EXTERNA-
RVM INFE-
RIORVM.

Hæ quidem non modo turgente proprio humore extuberant, sed crescunt etiam & incrementum capiunt, nec tantum substantia, verum & numero augentur; denique & inflammantur, ut herpetis instar, sub cute rubentibus pustulis, malum serpat. Et turgere quidem, cum singulæ, tum gregatim positæ, & collectæ in unum pancreas, quos veteres corpora glandosa appellabant, consuevere. Quod si internis in partibus accidit, & circa viscera, ut plerumque ignoratur, sic caret nomine hoc vitium nostratibus, nisi quod mesenterii glandulæ scirrhosæ post mortem, ubi aperto cadavere, patent, communi nomine appellantur. Sunt autem hæ veræ veterum, Galeni potissimum, strumæ, ut deinceps patebit. Alibi num idem contingat, hæcenus nos latet, cum profundius delitescant, & careant sensu exquisito, adeoque dolore nequeant se prodere. In iis vero, quæ sub cute proxime collocantur, ut sunt potissimum salivales, & manifestior est turgiditas, & sua gaudet appellatione tumor.

LVII.

Sunt autem duplicis generis glandulæ salivales, externæ, quæ tangi ad collum ac pone aures possunt, & internæ, in ore ac faucium isthmo latentes. Illæ rursus inferiores, Maxillares dictæ, & superiores, Parotides. Supernæ, si turgent, servant quod inditum est nomen; internæ, utpote antiquitati omni, excepto Galeno, tantum non prorsus ignoratæ, ne-
qui-

quidem affici, huc usque existimatae sunt, licet nihil sit nobis familiarius quam sub maxillis tumor: quem ubi sentiunt nostrates, ad tonsillas referunt, & cum eas vulgus a similitudine amygdalas vocet, dicere consueverunt, amygdalas intumuisse: *Die Mandeln sind mir geschwollen.* Cum illae non sub cute, sed intra oris hiatus ad paristhmia collocentur. Qui error tolerari amplius non potest: Etsi enim haut negandum sit, non raro & illas simul tumere, cum totum palatum atque universa membrana pituitaria in graviori malo humore ut spongia implere soleat, tamen neque perpetuum hoc est, & eo loco tonsillae sunt positae, ut digitis palpari, quod illi fieri persuasi sunt, non queant. Sed haec ὡς ἐν παρόδῳ; ad affectum ipsum revertor: Qui levis est, sed non Prognosis semper patitur se contemni.

LV-III.

Igitur si non magna est affluxio, facile dissipatur, idque vel solo calore: Cum enim ab externo frigore coagulata sit salivalis lympa, contraria qualitate in pristinum fluorem restituitur. Fit scilicet coagulum, quoniam sola cute vestitae sunt, & raro veste quantum sat est, muniuntur: unde frigoris intensioris vim praeter ceteris sentiunt, & stagnat in adstrictis acinulis humor congelatus, novoque affluenti vias occludit: resolvitur igitur calido quod frigidus erat concretum: cui rei vel ipsum Sal culinare linteolis involutum & admotum nonnunquam sufficit. Quod si vero pertinacius haeret, emplastrum emolliens & Curatio discu-

discutiens applicadum est. Eo nomine lippis tonso-
ribusque notum De Meliloto pene solum in usum
venit: quo tamen Diachylon simplex haut raro est
utilius, præsertim si calor & inflammatio accesserit,
vel magis induruerit materia: fortius enim resolvit, &
minus est calidum. Possunt vero etiam unguentis oleis-
que discutientibus ungi, quæ mox nominabo. In
applicatione emplastri illud observandum, ut paroti-
des etiam complectatur: communicant enim inter se,
neque prorsus istæ immunes esse solent, utpote &
ipsæ frigori expositæ. Quod autem minus frequen-
ter tumeant quam maxillares, capilli, & velamenta
capitis in causa sunt, quæ maximam earum partem
obtegunt, & a frigore eas defendunt.

LIX.

SUPERIO-
RUM PA-
ROTIDES.

Hoc pacto inferiores glandulæ intumescunt, cu-
ranturque. Parotides vero suppurantur, modo in
secunda valetudine, modo post febres eo propulsa
materia: quale exemplum vidimus post tertianam
in honestissima foemina, pravis succis repleta. Quod
etiam in acutis, imo & pestilentibus aliquando acci-
dit critice: verum quandoque & symptomatice. In
sanis primum experimentum reprimentium est, ut
loquitur Celsus: reliquis inimicum hoc, maturarique,
& quamprimum aperiri commodius: quod Galenus
etiam docuit. Sed difficulter obsecundant, quia sero-
sus quem separant, humor obsistit. Hinc sæpe no-
lentibus Medicis, recedunt, & evanescunt. Conve-
niunt autem cumprimis, quæ emolliunt & laxant,
quod

quod! promptius locum apertum invenit materia: Oleum Chamæmelinum, Irinum, Anethi, quibus simul dolor mitescit. Tum suppurantia & maturantia admovenda: Radix Althææ, Lil. alb. Melilotus, Chamæmelum, Malva, Cæpa, ficus: semina Lini, Fœnu Græci, Crocus, tandemque aperiendus abscessus ferro: non enim ut sponte rumpatur, expectare semper licet: periculosum autem si recedat. Vide Hildan. I, Obs. 39.

LX.

De Externis actum est: internæ nunc, ipsius oris glandulæ considerandæ: quæ vel in buccarum & palati regione latent, a Cl. Stenone detectæ, vel faucium angustiiis propius admotæ sunt. Illæ non facile intumescunt, vel si id accidit, leviter, nec multum habent molesti, nisi quod inter mandendum buccæ tumidior portio dentium ordini inferiori superiorique intervenit. Negligitur itaque, & sponte iterum cessat, si internum est: ubi vero extrorsum vergit, non spernendum inde malum potest exsurgere. Vidi in verbi divini præcone primario apertum, in bucca ex tali tumore ulcusculum, ad mortem usque summas molestias intulisse: sunt enim ejusmodi in his partibus abscessus ob lympham perpetuo affluentem difficillimæ sanationis, & facile degenerant in fistulam.

INTERIORUM.

Buccarum.

LXI.

In interiori ad fauces cavo non unum genus glandularum residet. Primum tonsillæ, omnibus veteribus notæ, Deinde Uvula, de qua persuasum est, glandulosum quoque corpus esse: quod aliter se ha-

Faucium.

K

bere,

*Vieußens
Anas. cer.*

bere, secanti nuper apparuit in cervino capite, ubi non modo adest, cum in aliis quadrupedibus deficiat, verum & magnitudine sua egregie incurrit in oculos. Vidimus itaque eam in medio musculosam, circumfusam spongiosa substantia, qua tota involvitur: non dubitandum autem & glandulas adesse, ex quibus imbibat hæc spongia humorem, ut proinde ad earum affectiones turgentem uvulam referre, haut fuerit adeo ineptum: propendet enim ex membrana pituitaria, cujus appendicem esse & partem, docuit is qui nuper accuratissime eam nobis descriptam dedit, stupendæ industriæ ac diligentiae Anatomicus Raymundus de Sensu antiquo, cui ad latus utrinque glandulæ suæ adjacent, itidem in cervino capite ubertim obviæ. Sed & infinitas alias exiguas glandulas non modo hinc inde circa gulam dispositas, verum & in linguæ radice, immediate sub membrana ejus latere autopsia me docuit, etsi non in omnibus cadaveribus easdem observaverim, sed in quibusdam copiosius, & inordinate positas, in aliis certo numero, in angulum acutum ad formam literæ V collocatas, eleganter rotundo foraminulo, tanquam oculo in medio earum hiante. Hoc igitur triplex earum genus vel in universum tumet, vel sigillatim unumquodque: Utrumque ut accidat, commemorandum venit.

LXII.

Itaque in universum quidem sæpe salivalibus affectis, immunes sunt faucium glandulæ, aliquando tamen simul cum istis non intumescunt modo, verum

rum & inflammantur: quod ex deglutitionis difficultate conjicitur. Singulatim vero non infrequenter vel tonsillæ præ ceteris, vel uvula laborant. Hæc omnium frequentissime, quod nemo, arbitror, non compertum habet: ita ut nomen quoque indicat, quod non nisi tumenti & pendenti competere, agnoscunt auctores: alias Gurgulio dicitur & Gargareon, vel Columella; ex alio vero affectu Lorum. Ubi intumuit, in longum protensa, descendit, pondere humoris tracta, copiaque turgens. Tunc deglutitionem impedit, & linguam attingens, eandem titillat, eoque tussum excitat: qua depressa, tota ejus longitudo se dat in conspectum. Huic peculiarem operam Chirurgia commodat. Et cum ab humoris serosi fusione & affluxu fiat, ubi opus, recte purgatio lenis admittitur, sed plerumque transigitur minori. Et vero a nimia repletione serosi humoris cum sit, placet Aetii consilium, repellentis facultatis pharmacis opus esse, quæ adstringentia sint, si moderatus sit affluxus, moderate; ubi vero fortius invaluerit, acerbæ etiam adjungenda esse. Hodie placent calida quoque adstringentibus mixta. Et olim quidem decoctis utebantur, nunc exiguo cochleari imposita, illique submissa inflari solent, quibus contrahit se, & in locum naturalem redit. Clarissimus Hornius manubrium ejus fistulosum desiderat, illique etiam exiguum follem vult alligatum: Verum tanto apparatu non est opus, sponte enim pulveres ipsi, dum tangitur, adhærescunt. Commendat is Piper, Alumen ustum, Rosarum & balustiorum, & ligustri pulverem: Celsus vero Alumen

Uvula:

Aet. tetrah.
II. 41-40.

scissile; atramentum sutorium, gallam, myrrham, & misy ex Andronio commemorat: quæ cum fortiora sint, vel melle excipi jubet, vel cum vino in melaginem coqui. Chelidoniæ quoque succum celebrat, multamque pituitam post illum effluere ait: quod si verum est, multo præstantior hæc erit curandi ratio. Tum ex vino calido gargarisandum præcipit, vel aqua in qua rubus & lenticula cocta sit. Huic nostrum diamoron cum aquis destillatis, lippis & tonsoribus notissimis, respondet. Omnium prolixissimus est Aetius, uberrimum penu omnis generis remedium offerens. Sed quid de hoc dicendum est, quod sursum tracto ex pulmonibus spiritu, prehensis simul & attractis in vertice capillis eam attolli credunt? Non est negandum, ita fieri: musculosa enim ejus portio simul fortiter contrahit se, dum aer attrahitur sursum, ut in vivis quilibet inspecto ore poterit deprehendere, verum hoc quia causam non tollit, sine aliis remediis frustraneum est, uvula illico relabente; At cutis in vertice sublatio prorsus supervacanea & inutilis.

LXIII.

Tonsillæ.

Si vero tonsillæ per inflammationem intumescere, etsi non sine consensu vicinarum partium id fiat, tamen & tum illis proprium auxilium debetur. Prius repellendum: quod non semper succedit, nam tanta nonnunquam inflammatio est, ut respirationem impediât. Hic alvus ducenda, gargarisandum decocto ex ficu, liquiritiæ radice, passulis, vel aquis Hyssopi, Prunellæ, feminibusque calidis ac dulcibus, &, si graviter

viter urgeat, etiam externe cataplasmata emollientia ex radice Altheæ, Malvæ hortensis autumnalis, & papaveris erratici floribus, aliisque notissimis usurpanda, oleisque illinenda colli latera, quibus si discuti recusent, suppurentur. Dehinc melle Rosato, detergentibusque, ac vulnerariis constringentibus ruptarum solidationi studendum est.

LXIV.

Hic obiter monere, operæ pretium est, doctissimum Hornium mirari, quod Celsus jubeat induratas tonsillas scalpello excidere: sed non satis expendit, quod induratas dixerit, quo posito, cessat dubium, magnæ esse in corpore utilitatis, hæc enim, si qua est, quæ tamen qualis sit, etiamnum ignoratur, postquam induruerit, nulla amplius esse potest. Huic dubio aliud ex Aetio addi posset, difficilius etiam solvendum, qui non tonsillas sed glandulas nescio quas tonsillis adjacentes, ab ipso Antiades dictas, (quum hoc nomen reliqui auctores tonsillis etiam tribuant) excicare jubet, neque totas, sed id quod in iis supereminet, juxta medium, & præter naturam excrevit; eos qui totas excindunt, periculosæ sanguinis eruptionis auctores fieri monens. Quod sane competit optime ipsis tonsillis: arteriis enim a carotidibus immediate oriundis alluuntur: & cum glandulæ præter tonsillas hic nullæ sint, easdem intelligere eum, necessum est. Itaque cum Celso collatus, dubium solvit: incertum licet sit, quid secuerint veteres. Nobis hæc prorsus hodie ignota affectio est, & proinde totum hoc non sine causa exolevit.

Reliquæ
glandulæ
oris.

Tetr. II, 4.

42.

Quod reliquum est glandularum, in postica oris parte, non sine inflammatione intumescit. Meminisse ejus rei videtur mihi Aetius, nomine oris inflammationum, talis enim vocari potest. Et hinc etiam remedium patet, quod in repellentium virtute quærendum est, suppurari enim & molestum & periculosum foret, cum spiritum vehemens tumor intercludat. Veteres plerumq; hic affrixisse confectiones, ex eodem auctore colligere licet: recentes multo commodius diluunt easdem, & in gargarismata transformant. Abundarunt vero ejusmodi confectionibus pulcherrimis, non ex moro tantum, sed nucum putaminibus, rubi fructu, granatorum succo, musto & Rhoe coriariorum: quas apud eundem auctorem videre, & inde mutuari, etiam in Aphthis licebit. Nobis præter rob diamori, quod tamen ex rubi moris plerumque paratur, & nucum, quo raro utimur, vix quicquam est: ubi ergo opus, veterum illæ ex tempore imitandæ, & cum aquis Plantaginis, Prunellæ, aliisque combinandæ sunt. Quod si vero his non cedat, vel consultius videbitur discutere, uti quidem glandularum tumores, cum ex angustis viarum humores difficulter elabantur, discuti fere magis amant, aqua Hyssopi, Salviæ, & similes in eorum locum succenturientur, quibus tum confectiones illæ antiquæ, compositæ quippe cum croco & myrrha, loco nostratium optime misceri, vel Origanum, Calamintha, eadem Salvia, & similes herbæ decoqui cum adstringentibus, ut bellidis flore, malicorio,

licorio, rosar. fol. myrti, eoque decocto collui fauces commode queunt. Frustra vero etiam his adhibitis, emollientia jungenda sunt, quibus dum laxantur partes, solet humor obsecundare. Exempla apud Forestum occurrent: externe vero omnia ista usurpari queunt, quæ ad salivalium intumescenciam commendavimus. Inunctio quoque ex ol. Chamæmeli & Amygdalarum præstat.

LXVI.

Sed ad alterum genus glandularum nunc pergamus, quas vulgo globosas, & conglobatas perperam nuncupare solent; cum non modo non conglobatæ sed ne globosæ quidem sint, verum plerumque oblongæ, & nonnihil depressæ. Ex quibus illæ potissimum attenduntur quæ ad inguina posuit natura, quia hæ turgent frequentissime: deinde subaxillares, quæ rarius afficiuntur. Sunt omnino illæ quinque, sex, septem glandulæ majores, congregatæ, quæ bubonales nuncupantur, earum vero tumores Bubones. Cujus ratio non patet: quin Galenus non has præ ceteris, sed omnes adenas, sive glandulas, ubi intumescere, bubones vocari asserit. Veteres eorum meminere parcius: & Galenus quidem inflammationem glandularum esse, & ut alias curari, brevissimis verbis docet, ubi & Phyma & Phygethlon ad easdam bubonales refert, nec a bubone differre vult, nisi quod ad suppurationem jam tendant: quem ceteri Græci, Aetius, & Aegineta iminantur, cum longe aliud Phyma & Phygethlon sit Celsi: nempe abscessus parvus quilibet incipiens, ut eum legenti patere

GLANDULÆ MAIORES.

II. Ad Glauc. Meth. Med. XIII, 5.

Phygma Phygethlon.

Cels. V, 28.

Lib. IV, 22.

22.

tere potest. Habent autem Galenus & Aetius pro ma-
lo non magno bubonem, unde & recensuisse, ipsis sat
esse visum fuit, adeoque apparet, neque eum qui Vene-
reus est, neq; pestilentem ipsos agnovisse: meminit ve-
ro hujus Aegineta, & deterrimum esse pronunciat.

LXVII.

Ubi orian-
tur,

Differen-
tia.

Signa.

Intumescunt autem non modo bubonales dictæ
glandulæ, verum & sub alis delitescentes. An etiam
alibi oritur bubo? sic non modo nonnulli ex nostris
tribus, qui etiam in brachio, variisque corporis parti-
bus pestilentem erupisse proponunt, verum Paulus
etiam, *sive femora, sive alas, sive cervicem invase-
rint*, ait. Verum isti quidem nulla auctoritate id fa-
ciunt, & quadam forte petulantia in verbis luxuriant:
nulla enim ratio est, cur abscessus reliquos cum glan-
dularum intumescencia confundamus, cum varia sit
eorum curandi ratio; Huic autem, ubi de glandulis
sermonem instituit, nunquam fere non, & quasi per
consuetudinem femora inguinave in ore sunt.
Rectius ergo Galeni definitio servatur: nec tamen
reliqua ejus, & veterum quos sequitur, prolixitas ad-
mittenda est, qua triplicem faciunt affectum, Bubo-
nem, Phyma & Phygethlon; cum uno nomine potu-
issent esse contenti: sed tamen inter benignum & ma-
lignum bubonem distinguamus, curationis gratia.
Prodit eum locus & dolor, non admodum exquisi-
tus, sed ubi eas tangas, se exserens; tensio inde, &
quod digitis reniteat, aliquando & pulset. Quibus si-
gnis caveri potest, ne, quod imperito barbitonsori a-
pud

pud Marchettum accidit, qui bubonocelen pro bubone Venereo habuit, secuitque, prodeuntibus ex intestinis alvi fecibus. Venereus ex, prægresso impuro coitu potissimum, ceterisque ineuntis luis signis cognoscitur, ut pestilens ex epidemice grassante lue, febrisque vel aliorum signorum præsentia. Simplex, sive sponte ortus, sive post morbum criticus, nihil habet periculi, & non multum requirit curæ, attamen si diutius protrahitur curatio, nec justo tempore aperitur, facile in fistulam degenerat, de quibus Fabritii verbum scitum est, qui ait: *Animadvertendum esse, ut quando ex uno foramine plura incipiunt fieri, bubo festinanter curetur.*

*Petr. March
Obs. LV.*

Diagnosis.

Prognosis.

LXVIII.

Curationem simplicis a Pestilentis Venerei que diversam esse, quivis facile intelligit. Ibi, ut lenis purgatio locum habet, sic non admodum tamen necessaria est, sed solet plerumque bubo sponte evanescere, aut modicis discutientibus & emollientibus superari. Aetius parotidas, aurium; & bubones, inguinum abscessus se solo butyro sæpe perfecte sanasse scribit, puerilibus corporibus ac muliebribus affectis. Galenus cum inflammationem habeat glandularum, quæ extra istos morbos, & in simplici nostris nunquam visa, forte & deinceps non videbitur, repellentibus utitur & adstringentibus: Hinc forte Aster Atticus, qui inde Bubonium vocatur, singulariter a veteribus commendatur, & non solum illitus, sed alligatus etiam, bubonibus auxiliari creditur. Scilicet sponte recedentibus iis, visus est

Curatio.

*Aet. l, i. p.
m. 14. Aegin IV, 22.*

*Vide utrū-
que aucto-
rem cita-
tum.*

hic ejus rei extitisse causa: fallacia etiam nostratibus familiari. At in Venereis & pestilentibus longe efficacioribus opus est remediis. Tribus res absolvitur: Primum affluxus humorum promovendus, ideoque repellentibus nullus locus est: si enim retrocedit, in totum corpus vitium dispergitur. Itaque fortius attrahentia emollientibus commiscenda: Chamame-
lo, Melilotho, Cucumis asininus, Aristolochia, Nastur-
tium, Flammula, Allium, Ceba, Cantharides, Sapo; & in pestilenti Theriaca, & Methridatium: Cucurbitulæ etiam, si rebellis sit, nec justam in mensuram attol-
latur, adhibendæ. Post hæc emplastrum diachylon cum gummatis, pinguedinibus temperatum imponen-
dum est, donec rumpatur, aut, quia hoc sponte non fit facile, aperiendus est potius, idque etiam ante ma-
turitatem. Ubi miror Oribasium & Paulum docere, non statim incidendum esse, sed primum evacuatio-
nem digerentibus tentandam: quod, si de his vo-
lunt intellectum, non assentior, cum mihi sine periculo fieri id non posse videatur. Fiat igitur sectio transversa & oblique descendens in tempore, ut puri exitus pateat. Reliquam curationem docet optime Fabritius Aquapendens, quem consulendum hic præ aliis esse arbitramur. Recedente Venereo, cu-
ratio luis ne differatur, & primo statim tempore in-
stituatur purgatio: vide Barbettum. Monendum tamen & illud: in omni glandularum suppurantium ulcere multo fortiora siccantia quam in aliis requiri, quo-
niam ob perpetuum ex lymphâ madorem, difficillime consolidantur.

Ad glandulosos tumores videntur omnino Strumæ pertinere, de quibus in auctoribus non satis expedita res est, tantaque sententiarum diversitas, ut nulla major esse possit: cum neque veteribus cum recentioribus idem sit animus, neque utrisque conveniat inter se. *Galenus* enim esse tumorem, veluti *scirrhum in glandula*, id est scirrhum glandulæ alicujus, asserit: *Celsus*, tumorem in quo subter concreta quedam ex pure & sanguine quasi glandula oriuntur. *Aetius* sibi plane non constans, carnes subcandidas in membrana contentas, & in summa, glandulas induratas, quæ in collo, sub alis & in inguinibus appareant. Postremum etiam *Aegineta* statuit, & tamen volunt hi auctores membrana includi, ut *steatomata*, & reliqua ejus generis. Hoc veterum dissidium: Recentiores vero plerique tam confuse de hac re loquuntur, ut ipsi quid dicant, videantur nescire, & Bronchocelen cum Strophulis turpiter confundere. Et ex his quidem de Bronchocele alicubi recte sentiunt *Hieronymus Fabritius*, *Franciscus Peccetus*, & *Joh. Langius*: mox tamen, ubi de Strumis agunt, veteri indulgent errori, tantâ licentia, ut postremus etiam non vereatur dicere, cum præstet vivere moribus præteritis, ac uti verbis præsentibus, consuetudine dicendi magistra ita inoleverit, Bronchocelen & Cheradas Strumas quoque appellari, parum referre: Cum tamen non de verbis, sed morbis inter se diversissimis disquisitio incidat, & Bronchocelen ac Strumas veteres omnes sollicite distinxerint, deque iis e-

STRUMÆ
& BRON-
CHOCE-
LE.

XIV. Meth.
M. c. 15. De
tum. 18.

Chir. op.
Chirurg.
Ep. I, 43.

cit. ep. &
HI, 4.

gerint diversissimis in locis. Accedit, quod ille steatomata quoq; impune strumas mox appellitet, adeoque mire turbet limpidos doctrinae fontes. Sane nemo veterum strumas ad Glandulas non referebat, Aegineta & Aetio non negantibus, sed de suo saltem reliqua addentibus, quos iste solos auctores habet: nec plane hunc, sed alterum forte unice. Manifestum autem, sibi istos non constare, adeoque potius errorem eorum rejiciendum esse, quam committendum, ut hinc tanta evagemur licentia. Itaque sic putamus esse statuendum.

LXX.

STRUMAE. Strumæ & Scrophulæ idem sunt. Quod enim Latini strumas Græci *χοιράδες* appellarunt, ἀπὸ τῶν χοίρων, a scrophis, etsi ἀπὸ τῶν χοιράδων Petris ita dictis, derivatum velit Aegineta, vel, ut Manardus vult, a lapillis, qui in maris tranquilli fundo apparent, globosis & lenibus, magnitudine parva. Ex quo ipso vocis etymo manifeste patet, non unam glandulam, sed plurimas, illasque induratas, *χοιράδες* componere, quod Galenus manifeste dicit, quo cum pulcherrime convenit Cornelio: sed quia simul inflammatae sunt & rubentes, quod Galenus indigitat, quando sequenti libro dicit esse *scirrhorum glandularum plegmonen*, credidit Celsus, non esse veras & naturales glandulas, ideoque dixit *Concreta quaedam ex pure & sanguine quasi glandula*, quia scilicet glandulas ipsas inflammari, insolitum est. Et hinc porro fluxit Aetii dogma: *Aliquando ex carne fieri, quæ affinitate quaedam ad strumarum naturam vertitur.* Ex quibus omni-

XIII. Meth.
Med. cap. 5.

omnibus patet, nisi fallor, clarissime, *χοιραδας* vel strumas, esse morbum in Germania quidem incognitum, apud Hispanos vero notissimum, illique populo fere proprium cum vicinis Gallis, qui eum vocant. *Des Ecouelles*. Nempe tumorem in colli latere modo alterutro, modo utroque, non admodum magnum, sed diffusum, rubentem & inflammatum, ex plurimis glandulis talibus confertis conflatum. Quod licet etiam Hippocratis testimonio confirmare, postquam eum ingeniosissima interpretatione sibi vendicavit M. Aurelius, dicentem: *Has ipsas tangenti velut lanas esse positas*, ad quæ ille: *Comparatio enim non est ad molitudinem, sed ad globos lanarum, qui oblongi sunt, coacti, presiores, πιλῆματα* Græcis. Ita enim Hippocratem interpretor, ut nulla jam restet apud ipsum difficultas.

De Nob. abs. sc. cap. 5.

Lib. de Gland.

LXXI.

Quibus sic discussis, altera restat difficultas enodanda, de loco ubi strumæ oriantur. Nam strumas quales a me jam descriptæ sunt, tantum in collo Hispanorum & vicinorum ipsis populorum apparere, comper- tum est: cum Aetius & Aegineta etiam sub alis & in inguine eas oriri velint. Altius ergo, & ab ipso Galeno res repetenda est: De quo jam constat, strumas eum vocasse scirrhum glandularum: cum autem duplex genus earum agnosceret, congestas, & globosas, uti ex *Metb. Med. XIV, 11*. apertissimum est, quarum postremas putabat ad fulcimenta vasorum solum datas esse, etiam in his ortum scirrhum strumam vocandam putavit,

Earum sub- jectum.

De Nob. ab-
sc. cap. 5.

abiens ab Hippocratis, & forte aliorum quoque mente. Hunc isti, ut in more ipsis est, secuti, in alis & inguinibus strumas sunt commenti, quas quenquam vel ipsorum vel posterorum unquam vidisse, ex literarum monumentis, non constat: Neque tamen frustra plane id videntur prodidisse & citra rationem: mox enim ipse quid viderim, commemorabo. Interim *Celsus* quoque non id modo testatur, sed *in mammis etiam foeminarum strumas reperisse Chirurgum Megen*, auctor est: *Marcus* autem *Aurelius Severinus*, nondum his contentus, *omnes prope partes capaces esse strumarum, ubi cava sunt loca, vasisque conferta, & se observasse multas in foeminis & viris*, disertis verbis prodidit. Quæ perfecto assertio ita turbat omnia, ut nihil amplius salvi subesse videatur: cum nec ista cum tot seculorum experientia possint conciliari, nec in tantum virum falsi testimonii cadere possit suspicio.

LXXII.

En itaque filum Ariadneum, quo uno possumus ex hoc labyrintho evadere. Strumas Galeni, quem omnes isti videntur in manibus oculisque habuisse, duplicis generis esse patet. Glandularum majorum singularium; & congestarum minorum, quæ glandulosa corpora vocare eum diximus. In illis scirrhum exortum strumam nominavit: in his vero insuper phlegmonem accedere, quæ in illis nunquam observata est, & ratio dictitat, vasis hic magna sat copia eas subeuntibus, & experientia testatur. Hoc est, quod

quod hodie vocare Gallos *Des Ecrouelles*, apertum est; illud vix unquam observatur. Quod autem perhibet Severinus, rarissimum quoque esse, (quicquid fiat de eo, *se illud sapissime observasse*) vel ex hoc uno patet, quod in istis locis tales glandulas non esse, autopsia & culter apertum faciunt. Necesseum itaque prius ibi novas oriri. Forsan indulsit aliquid sibi vir doctissimus: Nam glandulas oriri in partibus variis novas, novum non est, sed in Achoribus capitis frequentissimum, ubi ad nucham in magna copia, subnascuntur, a nostratibus *Hauptdrüsen* vocatae, id est glandulae capitis: quin Fernelius nonnunquam corpus universum iis scatens deprehendi, monuit dudum: verum indurari has & in strumam verti, non facile visum est, sed solent plerumque sponte disparere: vidit itaque forte has, & pro strumosis habuit Severinus, cum essent simplices: Si tamen vere in strumas unquam versa sunt, ex altero genere strumarum Galeni fuisse, non ex primo, in aperto est. Quod quidem ut rarum sit, tamen aliquando sese offert. An. MDCXXXVI. cum Harcica metalla inviserem, & in pago quodam divertissem, venit ad me virgo quaedam ignota, ostendit sub ala dextra tuberculum, quod cancrum esse, & excindi oportere amici, voluerant persuasum: rogat ut quid subsit quidque mihi videatur, ipsi indicem: nihil invenio livoris, nihil doloris se sentire asseribat, nulla itaque cancri signa: ergo de eo securam huc usque quidem esse jubeo, & nihil potius admoveere, quam se ignotis & imperitis credere hominibus. Erat scilicet ejusmodi struma Galeni, alterius generis, glandulae

Parb. VII,

3.

dulæ majoris & singularis duritiæ: ex quo simul Celsi assertio salva nobis est, & in inguinibus oriri, & sub alis, & etiam in mammis, eruditissimum, ut alibi appellat, Chirurgum Megen eam vidisse: nihil enim impedit, hic quoque aliquam glandulam vel novam talem generari, vel veterem indurescere. Quod vero Aetius dicit, *aliquando ex carne eorundem locorum fieri, quæ affinitate quadam ad strumarum naturam vertatur*, id manifesto error est, ex imperitia anatomica Aetii ortum habens, qui ad collum hic respexit, ubi existere glandulas illas maxillares ignoravit, easque pro carnosissimis habuit partibus.

LXXIII.

Differen-
tiæ.

His expeditis, omnia jam, quæ in auctoribus confuse satis traduntur, enodari ac solvi facile possunt, & simul differentia strumarum patent. Si enim folliculo inclusus humor sit, prorsus huc non pertinet, sed ad id quod bronchocelen nominare receptum est; factum enim contra veterum omnium auctoritatem, quod bini illi Græci posteriores strumas has nuncupare sunt ausi. Si vero simplex glandula, eaque indurata solum, & scirrhusa, est alterum strumæ genus Galeni, quod in collo non facile apparet, etsi ejus quoque rei exemplum memini me vidisse in quodam studioso, cui sub mento tres ejusmodi glandulæ oriebantur, cui etiam ex consilio meo feliciter fuerunt excisæ: sunt autem quas Aetius mansuetas nominat, ut de descriptionem intuenti patet: ut contra maligna ejusdem sunt cum inflammatione conjunctæ & exulceratæ

ta maxillarium glandularum affectiones, strumæ Hispanicæ. Foedum enim hoc genus, ex multis racematim dispositis glandulis, dolens, lividum, versicolor, ut quidem illud describunt Galli, etsi Fernelius quoque cum bronchocelis videatur confundere, prodit enim se, dum addit: *earum materiam acriorem tandem evadere, ad eam ipsum, circumsitam carnem, cutemque exedere. His sæpe ortum esse in cervice, in qua plerumque longa serie dispositæ glandularum modo cernantur.* Quod de his tantum valet, nam quæ bronchocelen constituunt, nunquam exulcerantur acri ex succo, quem nullum continent, ni forte glandulæ thyroides talem aliquando colligant, quod nondum observatum est. Cum Gallorum descriptione & Angli consentiunt, ex quibus unus sit instar omnium Thomas Warton, qui eas perquam egregie describit doctissimo de Glandulis libello, extremo capite.

Fernel. Path.
VII, 3.

LXXIV.

Patebit autem ex his porro, quo usque audiendus sit *Marcus A. Severinus*, dum asserit, omnes corporis partes ubi cavitas quædam est, strumis obnoxias esse, & tales in mammis apparentes sæpe pro occulto mammarum cancro imperitis haberi, & quando cum Celso etiam in lateribus obvias esse tales, sibi que visas, contendit. Qui vir doctissimus, ut in his non fuit falsus, rem tamen expeditam, quod promiserat, minime dedit, etsi scribere non vereatur, sibi primo contigisse Dei favore, ut adverteret, variam esse strumarum naturam. Tametsi enim hoc verum sit, tam longe tamen abfuit a vera cognitio-

De nor. abs.
Absc. c. 5.

ne, ut omnia potius involveret, quam expediret nodos, nobisque potiori jure ea laus debeatur, prout ejus cum his conferentibus facile judicabitur. Erit autem forte ex re, hæc bina, ut reapse distinctissima sunt, sic etiam verbis distinguere, & majorum singulariumque glandularum affectum scirrhum strumas, congestarum vero, scrophulas appellare. quam distinctionem meliorem arbitror, quam Warntonianam, qui Bronchocelen cum his videtur etiamnum confundere.

LXXV.

Prognosis.

Pathol. c. 6.

Constare vero ex dictis potest, ut non eadem natura est, sic non eandem esse strumarum conditionem. Scirrhusæ enim glandulæ majores, ut plerumque præter naturæ ordinem nascuntur, sic vel tolerantur sine magna molestia, vel etiam sponte evanescent, antequam abeant in scirrhum: quod an unquam faciant, nondum me docuit experientia, nec ex aliis satis certum est. Has glandulas absolute vocat Fernelius, & esse id quod Latino-Barbari eo nomine dignati sunt, a gangliis non nisi loci ratione diversum arbitratur: quod tamen ex sua non illorum sententia sic statuit Vir doctissimus. At naturales globosæ, quando indurescunt, & scirrhum admittunt, non modo molestæ sunt ipsæ, sed etiam periculum est, ne in cancrosum desinant tumorem: Scrophulæ vero præcipue fatigant medicos, nec unquam facile vel maturescunt, vel etiam ferrum admittunt. Si enim glandulæ salivales ipsæ sunt affectæ, quis eas auderet excindere? Si vero harum superfluitas, & nova proge-

progenies est, resectæ etiam, tamen juxta cicatrices suas resurgent. Hinc quia vix medicæ manui obtemperant, Regiam succurrere creditur, tum Galliarum scilicet, tum magnæ Britannia Monarchæ. Unde etiam Anglis proprio nomine vocatur *The kings evil*, ut Bronchocele *Wens*: Etsi ad Regium solium quoque qui bronchocele laborant, insigni confidentia, successu tamen non æque felici, quotannis confluant.

LXXVI.

Nec minus quam prognosis, curatio strumarum & scrophularum diversa est. Si enim glandula major singularis molesta est, eaque recens nata, siquidem nondum induruit in scirrhum, ut alias sponte solent hæc disparere, sic danda est opera, ut discutiatur. Si vero in scirrhum abierit sive hæc talis, sive naturalis etiam, tutissimum est excindere, cum scirrhosas emollire difficile sit. Quodsi tamen excindi commodè non possit, aut id renuat æger, tentanda est suppuratio. At scrophulæ quæ in salivalibus radican- tur, ut sæpe sponte suppurant, & pus fundunt, sic difficillime sanescunt: neq; tamen excindi consultum est, cum saliva sit salutaris humor. Optime hæc omnia animadvertit monuitque Galenus: postquam enim distinxisset singulares a congestis, & salivales suo nomine notasset, addit: *Atque hæc quidem cum in scirr- rhuso sunt affectu, non aliter quam cæteræ omnes partes sunt sananda. At qui in medio vasorum con- sistunt, in iis alia curationis indicatio præstatur, qua simul cum vitio etiam pars ipsa* (utpote non,

Curatio.

Lib. XIV. m. m.

II.

magnæ secundum ipsum, utilitatis) tollitur. Est vero duplex ea quoque; nempe vel totum quod vitiosum est, scalpello exscindentibus nobis, vel putrescere id medicamentis cogentibus. Quæ sane ratio & longe alia est quam vulgo traditur, & multo exactior, nisi quod Galenus in illis esse simul phlegmonen, adeoque scirrhum inflammatum, non satis videatur expendisse: quod facit ut multo difficilior hujus quam simplicis scirrhi sit curatio, cum acrem propter, qui hic restat, & inflammationem constituit, tumorem, diluentia omnino non sint negligenda: adhibendaq; externa quidem plumbea, interna vero decocta mox laudanda.

LXXVII.

Strumarum.

His de curatione in genere constitutis, quænam illa sint, quibus vel suppurari glandulæ possint, vel emolliri scirrhusæ, tradendum restat. Cum autem hoc in scirrhi curatione a nobis fiat, non omnia, sed ea tantum commemorabimus, quæ præ ceteris memorabile nomen adepta sunt: nam hoc fieri non nisi præstantissimis subsidiis potest. Purgantia igitur, & ferum corrigentia præmittantur: Vbi præ ceteris pulverem ex partibus æqualibus sacchari, turpethi & Gingiberis Avicenna commendat, quo etiam ipso, & deinde eodem in electuarium redacto, usus cum fructu est *Scultetus*. Tum accerrimis quibusvis opus difficile aggrediendum est: Calcem, aqua nondum restinctam cerato Irino exceptam, sulphuris & Galbani æquales portiones, corticem Mandragoræ, Sandaracæ,

cam, Nasturtium in cerato, pumicem cum aceto, Grossos Caprifici, ostreorum testas, *Aetius* laudat: *Aegineta* Bovillum stercus aceto incoctum, calcis nitri-
que[?] parem quantitatem, cum cardamomo & foenu-
græco, Cucumeris silvestris radicem, Erucam, varias
resinas; denique anguis combusti cineres. Quem
ne putemus frustra laudari, facit Celsus, is enim
quem struma male habet, si anguem edat, liberari,
quorundam rusticorum experimento affirmat. Vide
Zacuti Lusitani Princ. Med. Hist. Addunt his recen-
tes Staphydem Agriam, Bryoniam, Scrophulariam,
olea Myrtinum, Laurinum: unguenta Martiatum, Are-
gon: Emplastrum de ranis cum Mercurio Vigonis.
Nucibus Cupressi se sæpe strumas incipientes coercuis-
se dicit Forestus. Paronychiam folio rutaceo, hoc
est Alsinen tridactyliten Boyle solam in cerevisia stru-
mam curasse perhibet: sed uno tantum exprimento
non est fidendum. Quæ omnia tamen in strumis,
seu glandularum singularium induratione, & Bron-
choceles initio potius quam scrophulis congestarum
convenire, in aperto est.

LXXVIII.

In quibus etiam interna calida, resolventia & Scrophularum
exsiccantia alia possunt usurpari, quorum formulæ a-
pud diligentissimum æque ac doctissimum nostrum
Sennertum videndæ sunt, qui idem & suppurandi mo-
dum perspicuè proponit. His interim si non ce-
dat malum, excisorius paratus culter est, cui succe-
dere posset etiam exedens pulvis, vel liquor igneus.

*De noſo du-
ſtu ſaliſ.
Lib. II. Anthr.
c. 18.*

L. II. c. 8.

Interim & illa quæ in ſcirrho alias utilia deprehenſa, negligenda non ſunt, ex chalybe potiffimum parata: uti quidem Tinctura Martis ſanguinea Gailfuſii pro ſpecifico haberi a nonnullis meruit. Obſervatum enim eſt, non in externis ſolis, ſed etiam internis partibus ſæpe glandulas induratas & ſcirrhoſas ſimul exiſtiſſe, maxime in Meſenterio: quod poſt alios nuper Caſpar Bartholinus nepos monuit, forte ex *Riolano* ſapiens, qui ſcrophulas in corpore nunquam erumpere aſſerit, niſi meſenterium ſtrumofum fuerit: hic vero ex Guidone & Ingraſſia id poteſt didiciſſe, qui idem tradidere. Verum & Regemortius quidam vidit in aliqujus a multis annis ſtruma laborantis cadavere hepar intus forisq; glandulis piſi fabæque magnitudine reſertiffimum: quod narrat Gliffonius de Hepate, quem vide.

LXXIX.

Aliter in Scrophulis Hispaniæ endemiis procedendum: Dum enim inflammatus hîc ſcirrhus eſt, & cancroſo proximus, præcipua ſeri acrimoniæ corrigendæ cura ſit. Quod fit decoctis ſarſæ, Chinæ, & lignorum, eorumque eſſentia, uti & variis vulnerariis diluentibus & leniter ſtringentibus potionibus, item ferratis, & potu Caffæ aut Thee, quem Blancardus nuper laudavit. Interim & pulveres abſorbentes dentur, Antimonii diaphoretici calx, lapilli cancrorum, mumia, crocus Martis, ſanguis Draconis, Cinabaris. Mixtura quoque de tribus, Eſſentia fumariæ, ſcolopendriæ, aliarum vulnerariæ, cum ipsis liquoribus volati-

volatilibus addi possunt. Lacertæ quid valeant, Scultetus te docebit observatione supra citata. Externe, emplastra mitigantia & extinguentia calorem, acoremque corrigentia conveniunt. In his est emplastrum de cynoglossò, quod miris commendat modis *Rob. Sibbaldus prodromi Naturalis historia Scotica scriptor*. Idem unguentum ex floribus vel primis germinibus Digitalis, summæ efficaciam esse testatur. Si efferatus est, plumbea commendatissima sunt: cum primis Emplastrum diapompholygos correctum, amicissimi hactenus Collegæ mihi Wedelii. Quod si ad cancrum declinet, proficuum præ ceteris Diasulphuris Rulandinum est, quod Magnus Rolfincius in Chimia descriptum dedit. Mirificam etiam unguenti, quod Hier. Fabritius Aquapendens describit, efficaciam expertus est non ipse modo, ut testatur, verum etiam Scultetus, in quadam monacha, & puella, quorum illa scrophulas habuit exulceratas in mammis, hæc vero in collo.

I. Pentateuch.

21.

LXXX.

Hæc de strumis & scrophulis. A quibus differt plurimum Bronchocele, quæ illud est, quod nos idiomate nostro vocamus, *Rrops*/Itali Il Goffo, quem alium a Bronchocele, facit H. Fabritius, nescio quod vitium asperæ arteriæ commentus, ut Bronchocelen exponat, nemini mortalium unquam visam, cum res in aperto sit. Est enim ΚΗΛΗ Græcis quilibet tumor. Bronchocele vero non asperæ arteriæ tumor, sed ad illam, ut omphalocèle, bubonocèle, non dicitur a parte ipsa,

Bronchocele
quid.

ipsa, sed a loco ad quem apparet. Ergo etiam Celsus inter cutem & asperam arteriam eam ponit, & Aëtius simpliciter tumorem in gutture orientem: Addit is, frequentissime eum ex partu contingere, cum in vehementissimis doloribus puerpera spiritum violenter detinuerit. Ex quo constat qualis sit; & quamvis dilatationem vasorum ille putet, tamen ex imperitia hoc est anatomes. Quin potius ex ruptione est, unde sanguis effunditur. Exemplo id patet unico in viro annotato; a M. A. Severino, L. de Rec. Abscess. IV. cap. 7. in fine p. m. 28. Ut non liceat, quantum video, de morbi genere dubitare.

LXXXI.

Causæ ejus.

Neque tamen ex hac una causa Bronchocele accidit, neque sola: Nam eadem ratione & reliquæ herniæ species obtingunt parturientibus; & hæc ex aquis etiam crudis, gipseam materiam clam ferentibus & a sole minime excoctis provenit. Quæ causa est, quod, ut Strumæ Hispanis, sic Bronchocele Allobrogibus, Stiria & Carinthiæ incolis familiaris sit. Idem malum grassari in quadam Bergamensis agri parte, Hier. Fabricius fatetur, sed non agnoscit esse Bronchocelen. Aegineta dicit, aliam adipe tumere, aliam dilatatione accidere. Esse itaque eam in universum Tumorem in collo magnum, mobilem, mollem, pendulum, qui non doleat, neque ullam offendat actionem, itaque chirurgia eos curare non esse opus. Cujus pace dixerim, nihilominus non modo molestum esse, & aspectu foedum, sed etiam, si magnum, suffocatio-

cationis periculum inducere, quod Tulpii exemplo patet, in observatione, quam strumarum anatomen vocat. Nec colli actiones nullas impedit aliquando: Vidi ego musculos sternothyroideos & sternohyoideos plane ex tali emaciatos, & membranaceos: Eorum igitur saltem usum impediunt, ne dicam de jugularibus, & aliis quæ comprimunt, partibus. Vide & Ephem. N. C. Ac Leop. XIII, 134. cum Scholio. Adeoque etiam curatione dignus est, etiamsi periculo careat.

LXXXII.

Postquam constitit qualis sit tumor Bronchocele, ex quibus componatur, etiam cognosci par est. Quod non unum esse deprehenditur. Nam modo caro hebes, modo humor aliquis, mellis aquæve similis tunicæ suæ includitur, ut loquitur Celsus: qui & porro addit, interdum minutis ossibus pilos admissos deprehendi, quod inter raro observata in Athromate supra quoque ex Aetio produximus. Vidi ego in cadavere fœmineo glandulas Thyroideas in ingentem molem, sextuplo naturalibus majorem excrevisse, & tumorem excitasse. Hæc forte est caro Celsi, nam valde rubent glandulæ istæ, ut carnem apud imperitos mentiri possint. Aetius omnis generis materiam in folliculo contineri asserit & modo esse speciem meliceridis, modo atheromatis, modo steatomatis: cancrsam quoque deprehendi addit, quod nemo alius notavit; Itaque hic forte cum strumis confundit perperam, etsi non repugnet in scirrhum abire, sicque malignum fieri, & magnitudine ingentem, qualem aggredi chirurgus haut licet. Cl. Tulpi-

obs. cit.

Materia peccans.

us, corpora glandulosa, quæ seminia appellat, in aliqua notavit, etsi strumam vocet hanc bronchocelen. Est autem digna observatio quæ legatur.

LXXXIII.

Curatio.

l. Loc. Aff. 6.

Curatio subnectenda: Cum autem jam antea de tumoribus folliculo inclusis sit actum, non est opus hic multis eadem repetere. Jam dictum, non obedire scirrhosum, & maximum: qui etiam propter vasa magna & multiplicia aliquando formidabilis esse debet. Sed & illum qui ex fortissimo & inconsulto nisu, dum non deorsum sed inconsiderate antrorsum spiritum contentum propellunt, puerperis accidit, incurabilem esse putatur. Sed quid impedit quo minus secta vel puncta spiritum contentum dimittamus? Restat ergo triplex ille tunicatus, & carneus, sive, ut ego interpretor, thyroidis glandulæ. Quæ cum facile in scirrhum abeat & corrumpatur, ob spongiosam substantiam, exsecari omnino debet, si alio modo corrigere non liceat, etsi metuenda hinc sit quædam colli deformitas. Verum hic est potissimum, quod vasa, quæ suscipit ex carotidibus, negotium, factura sunt: Nervi etiam recurrentis viæ in memoria habendæ sunt, ne accidat, quod narrat Galenus de imperito Chirurgo, qui cum eos una evelleret, mutum reddidit ægrum. Et hanc operationem omnium, credo esse difficillimam: inde potius omnia prius tentanda, est enim spes in discutientibus & suppurantibus haut parva, nam laxa est pars, & mollis ac porosa, & resorbere aptas amplasque venas habet.

Dia.

Diachylo quidam amicus mihi addidit ꝛ dulcem, & omnibus ab aliis frustra tentatis, suppuravit statim tumor, & sanitas reducta est. Profuit etiam nonnunquam Emplastrum de Galbano crocatum Mynsichti, aqua calcis ignem non expertæ Vini spiritu temperata in spongia admota, Cataplasma porro ex foliis & radice (quid ni & seminalibus capsulis) cucumeris asinini, cum stercore caprillo: Emplastrum de Caranna cum ꝛ & terebinthina laudat Ethmüllerus. His simul etiam interna jungi possunt; & quidem ex ejusdem sententia pulvis ex Spongiis marinis, Ossibus sæpiæ, Mandibulis Lucii piscis, Lapidibus cancrorum, pipere, Zingibere, Pyretro, testis ovorum: & in potu exhiberi radix scrophulariæ, filipendulæ, &c. Quorum alia exsiccando, alia dissipando, quædam etiam specifica quadam virtute agere credi possunt. Ne quis tamen nunquam exsectam esse existimet, adeat M. A. Severinum toties laudatum, is enim, etsi eam non agnovit, cum huic morbo obnoxiam esse, ego primus ex oculari inspectione notaverim, tamen hanc glandulam omnino exsecuit. Verum alias etiam visum, sed non agnitum hunc tumorem fuisse, non est dubium, & alio ab eodem adnotato exemplo licet ostendere; Hominis cujusdam, ut loquitur, subalpini, qui bronchocelen prævastam multos annos cum angore passus, tandem ab ea strangulatus oppetiit. Quo dissecto, grumos ingentes sanguinis undique circumfusus, cum adnatis quibusdam carunculis offendit. Nam sine dubio hæ carunculæ partes erant Thyroidis glandulæ, præ san-

*De Abcess. rec.
Nat. L. IV.
cap. 6.*

*Extat hoc cit.
loc. cap. 7.*

guinis copia distentæ ac divulsæ in partes, aliis sensim & corruptis, & colliquatis in sanguinem. Et hoc ipsum quoque est, quod doctissimus Wartonus dicit; Si scrophulæ, (sic vocat Bronchocelen, quod notandum est, rubescant, colorem floridiorem esse, minusque lividum quam strumarum. Sed de his, quæ ad superiora pertinebant, nisi differentia strumarum & Bronchoceles fuisset ostendenda, satis.

LXXXIV.

ARTERIÆ
TUMOR.

II. de Tum.
cap. 11. &
Tetrabibl.
III, 10.
Lib. XVII.
cap. 37. 58.

Lib. XII. c. 32.

III. Obs. 44.
Ep. Resp.

Post glandularum ægri-
tudines, Arteriæ tumor refe-
rendus & venæ. In arteria ANEURISMA sese of-
fert, de quo tamen, quid sit, obscurum est, aliis tu-
morem arteriæ ipsius, aliis arteriosi sanguinis in par-
tes effusionem existimantibus. Omnes antiqui, e-
jus mentionem facientes, ruptam arteriam & effu-
sum sanguinem esse tradidere, *Galenus* cum primis &
Aetius, qui tamen falso persuasus est, bronchoce-
len a nisu in partu accidentem esse Aneurisma, quod
seduxit etiam *Aeginetam*, qui ex eo forte excerpfit,
prout ipsum inspicienti patebit. Quod fieri id quidem
potest, sed Aneurisma tamen etiam alibi visitur. Eandem
quam veterum fovere, sententiam, amplectitur etiam
Pareus aliique. At recentium nonnulli de eo dubitant,
existimantes esse externæ arteriæ tunicæ, interna rupta,
dilatationem: in qua sententia etiam est Sennertus no-
ster. Hujus novi dogmatis primum auctorem fuisse
Fernelium, Döringius apud Hildanum it persuasum, &
tamen postea Fallopi-um atq; Vesalium ei adhæsisse tra-
dit:

dit: quæ quam bene conveniant judicent historiæ Medi-
cæ periti. Variis rationibus id assertum videas ab istis, sed
meo judicio parum roboris in illis est; quin autopsia
quoque & experientia contrarium abunde docet,
quam ex *Bartolini singulari libro, Messana edito,*
Hornii subnexa epistola, Walai epistola, Bogdani ob-
servatione, & Severini cit. loc. abunde est petere. *Scul-*
tetus quoque Tab. XLIII idem declarat. Sæpius Ul-
ma accidit, ait, ut ab imperitis balneatoribus, & chi-
rurgi titulo certe indignis pro vena basilica arteria co-
mes aperiretur, unde plerumque vel nimia sanguinis
profusio, vel Aneurisma magnum, quod male cura-
tum, mortem intulit.

V. Sennert, Pr.
& Döring. E-
pist.

LXXXV.

Est itaque *Aneurisma* (dictum ab *εὐρύνειν*, efflue-
re, unde & Galenus Varicem vocat *ἀνευρισμένην Φλέ-*
βα), tumor ex sanguine ex arteria incisa vel rupta
effuso in interstitia carnearum fibrarum, pulsans ple-
rumque, nonnunquam in massam sanguine concre-
scente. Causas, neque anastomasin, nec erosionem,
nec diapedesin esse opinor, sed fere duplicem. Plerum-
que enim ab imperitis chirurgis pro vena secta arteria,
viam ipsi aperire certum est: aliquando tamen ex ruptu-
ra idem accidere, illorum testantur exempla, quibus in
collo, pectore, pedibus, & alibi, ubi non solet ea ad-
ministrari, exoritur. Vide *Hildanum Pareum L. VI,*
& Bourdelotii Zodiacum M. G. in qua licet mul-
ta inepte differit, causas tamen occasionales aliquas
non rejiciendas recenset. Id saltem cave, ne Varices

Quid.

Causa duplex.

Lib. III Obs. 48.
Lib. VI cap. 22.

Ann. III.
Martii.
Obs. III.

his confundas. Nam ex venis quoque exsudare posse sanguinem, & constituere Aneurisma summus ille Chirurgus Severinus putavit, sed perperam, solo ejus pulsu facile refellendus, quo nullum carere Aneurisma, initio saltem, credi par est: etsi deinde cesset, si maximum occupet spatium.

LXXXVI.

Descriptio.]

Est enim omne Aneurisma in principio exiguum, rotundum, potestq; digitis in arteriam rursum impelli sanguis, idq; sæpe non sine sibilo: Paræum confer *cit. loc.* & Bartholinum. At post menses duos vel tres, ubi negligitur, in immensum excrescit. Totum brachiū occupari Bartholinus & Bogdanus; pedem, Walæus & van Horne; pectus Hildanus; brachium ac anteriorem thoracis partem immani prorsus tumore Severinus videre: quæ utrum ex dilatata arteria contingere queant, videant qui eam solam admittunt. Mirum est, carneam massam ex sanguine concrecere cordi similem, pulsantem ut cor. Quod notarunt *Bartholinus, Van Horne Bogdanus, & Bourdelotius*. Mirum autem post hæc non est, (quod obiter dico) carnem in vulneribus absumentam recrefcere.

LXXXVII.

Prognosis.

Neutiquam neglectius habendum est aneurisma: nisi enim obsistas principiis, incrementum sensim capit, donec vel sponte rupto, anima cum sanguine effundatur, ut apud Severinum, vel, si ad collum sit, strangulationis immineat periculum, vel intolerabilis dolor perimat, ut apud eundem, vel Gangræna & necrosis superveniat, ut Pareus monet. Est

au-

autem in principio facile curabile: difficillimum, ubi diffusum & vastum est; Internum quoque difficile, imo incurabile est. Nam & in interioribus corporis visceribus illud observavit *Pareus*, & in his oriri illis præ ceteris pronunciavit, qui inunctione Mercuriali nimis attenuatum reddi passi sunt sanguinem, & plura talia vidit *Dodonæus*. Raro evenit, ut ruptum, sponte desinente sanguinis fluxu, evanescat, quod *Moinichen* advertit.

LXXXVIII.

Curatio itaque, si fieri possit, statim ubi advertitur, instituitur. Tunc vero sola compressione arteria omnis coalescit: quin unico emplastro illud repressit *Hildanus*. Commodissime tamen & tutius id fit instrumento, quod ita formatum, ut unam comprimat arteriam, reliquis partibus vicinis intactis, ne compressione omnimoda æqualiter stringens, sanguinis per venas reditum intercipiat: Exemplum vide *Bourdelotii*, in seipso experti. At vero ubi increvit, ut neque sanguinem in arteriam retro pellere, neque hanc comprimere liceat, tum frustra hoc utaris: nec quid agendum sit, protenus obvium: Fortunatus fuit uterque æger *Bogdani*, quibus post sectionem & alterius insuper unctionem reducta est integra valetudo: sed ista imitari non licet. Veteres arteriam separare supra tumorem jubent, & disseccare. Verum hoc in minori locum habet, in majori neutiquam: præterea nemo hæc ferret, crudelia nimis delicato hoc seculo: & cum tentare ausus esset clarissimus *Ruyschius*, non fuit factus *Voti compos*: qui adeo in minoribus a Chirurgo de

de improvise sectis quanta difficultas operationem comitetur, expertus est. Itaque plerumque tum res desperata est, & in arena consilium capiendum, quod anceps remedium præstat experiri quam nullum: quod si succedit, ut modo allatum, non omnino nihil fortunæ beneficio debebit Medicus.

LXXXIX.

Tumor verus arteriæ

Hic tumor etsi non sit arteriæ tamen quoniam ex ea ortum duxit, nobis hic commode memorari posse, visus est. Est vero & alia arteriæ, veraque intumescencia, quando ampliatur ipsa, ac turget. Quod circa cor ita evenit alicui, Pareo inspiciente, ut pugnam caperet: ex quo tandem malo, rupta eadem, mors consecuta est. Hinc Fallopius duplex Aneurisma facit: unum arteriæ dilatationem alterum ruptionem; Rectissime, sed quia alterum hoc raro contingit, & si contingat, in internis partibus fere apparet, ubi curatio institui non potest, ultimo loco a nobis est expositum. Accidit hoc in majoribus potissimum arteriis ubi obstructio est, ut in cordis palpitatione est frequens: & tunc quoque pulsus percipitur novus, qualem in liene quoque ejus arteria, eadem de causa dilatata, evenisse legimus. Verum huic, ut dictum, remedium malo nullum paratum est, neque si esset, aperto corpore, adplicare liceret. Itaque arteria relicta, advenas transeamus.

XC.

VARIX.

Quod istis evenire, ultimo modo loco diximus, his quoque evenit, fitque Varix, *κίρρος* Græcis Medicis, quam afflictionem describit Galenus, eamque

quæ secuti breviter: *ἀνευρισμένη φλεψ*: Vena dilata-
ta. Hujus causam olim credebant sanguinem melan-
cholicum, qui huc soleat secedere: Unde in excin-
dendis iis maxima formidolositas non paucis, quod
quia legerant in Hippocratis Aphorismo *insaniam*
iis erumpentibus solvi, quibus excinderentur me-
lancholicos fieri crederent, verentes scilicet ne occlu-
so diverticulo, humor inundet cerebrum, spiritusque
involvat; id quod etiam sæpius esse factum, Sen-
nertus ausus est prodere: nihilominus futile esse, &
hic experientiam fallacem, nimis manifesta ratio de-
clarat; perinde atque alterum commentum, quod
ipsum Coum auctorem habet, calvis magnas non ac-
cidere; si superveniant, rursus capillatos fieri. Neque
illud credo, quod *lib. de articulis* prodidit: Gibberem
iis solvi: Cessat ergo metus, Varices, quia ab aliis mor-
bis præservent, & liberent, corrigendi.

XCI.

Verius dixerim, quia non sunt molestæ, vel quam-
diu non sunt, curandas non esse, cum ne morbi qui-
dem tum sint, quippe non lædentes actionem, etsi
morboſi quid præ se ferant. Siquidem varias descri-
ptas legimus: primum simplices, tum cum inflamma-
tione exulceratas, denique prægrandes, & monstro-
sas. Illæ nihil habent mali, non magis quam gesta-
tionis tempore in mulieribus venæ uterî ita turgen-
tes, ut totæ varicosum opus haberi possint. Alia lon-
ge est reliquarum natura: nam inflammatae dolorifi-
cæ sunt: ulcerosæ, id est cum ulcere existentes, im-
pediunt hujus consolidationem: Et notabile est, quod

Lib. VI.
Aph. 21.

An corpori
salutares
sint.

Aph. VI, 34.

Quando a-
moliendæ.

V. Sæbamm.
Mir. Nat.

de Efficaci
Medicina
II, 37.

Severinus habet, ulcere in imo existente, si varices multo sint superiores, ubi excisæ sunt, nil prorsus mali restare. Magnitudine autem conspicuæ, metus est ne rumpantur, & fiat profusio sanguinis cum vitæ periculo conjuncta, qualem vidit Fallopius accidere: duos vero inde mortuos notavit Severinus.

XCII.

Curatio.

Patet ergo, quando tollendæ sint varices, quod etiam expedit Fallopius eleganter etsi prolixius, *L. de Ulcer.* Locum affert doctissimus Severinus, apud quem potest videri: Quod moneo, quia non extat in Francofurtensi Fallopii editione, quæ primo hujus seculi anno prodiit, ut necessum sit, alio exemplari usum Severinum. At quo potissimum modo curatio debeat fieri, maxime controversum videri potest. Veteres Græci, secta cute, separabant venæ partem sanguine turgidam, acu filoque traducto utrinque ligabant, & excindebant varicem. Arabes pungere jubebant, præeunte illis uno Hippocrate: Celsus ante istos etiam urere solitus. Excidit quoque Severinus plurimas, ad veterum morem, qui valde crudelis est, & summis doloribus affligit: cujus tamen operationis, patente sanguinis circulo, necessitatem video plane nullam. Quid si ligatura venam intercipiendo, vel si profundior aut major sit vena, quam ut intercipi profusio sanguinis possit, instrumento quod ad Aneurismata, compescenda commendavimus, eam comprimendo ab hæmorrhagia caveamus, venamque evacuemus, lanceola apertam, deinde colligatam spleniisque munitam

tam, emplastris aliisque constringentibus aggrediamur? Nam & Arabum compunctio talis fuit, quæ nescio cur non ubique locum habeat. Evitabimus vero simul hoc pacto abscessum quem sequi ut plurimum excisionem venarum, Neapolitanus Chiron,isque unus monuit. Quod si hoc non placet, aliud in promptu est certissimum: venam per medium dissecare, & aqua stiptica tangere: Sic enim & via in varicem sanguini in perpetuum negabitur, & hæmorrhagiæ nullum erit periculum. Sic putō: fateor tamen, expertum me non esse, cum Germaniæ meæ id beneficii contigerit, ut quemadmodum a multis aliis, sic ab hoc quoque malo liberos & immunes fere incolas suos præstet. Quod si expertum magistrum desideras, vide Vigonem, qui multa utilia Te docebit.

Lib. IV. c. 6.

XCIII.

Hoc in artubus fieri commode potest, alibi quoque ligacula aptare loco commodo, difficile forte adeo non est. At in Cissocele id fieri nequit. Hinc ad illam trepidari video. Verum nihil est hic opus violenta manu: cataplasmate stringente & discutiente applicito res peragitur, vel catagmatico etiam emplastro, non neglectis internis vulnerariis, quibus remediis levatus elegans juvenis hæc scribenti adveniens, adstat & gratias agit. Quod si hoc frustra est, non tamen magnum hinc metuendum incommodum, & sæpe ipsum tempus, modo abstineas a Venere intempestiva, malum aufert.

CIRSO-
CELE.

XCIV.

Explanatis partium mollium tumoribus, ad dur-

OSSIUM
TUMOR.

SPINAE VENTOSITAS.

Nomen.

ras venio. Ex quibus carilagine nullo tumore affici observatum est, os vero uno, eoque difficili, non re- tantum, sed etiam ipsa denominatione: Vocant enim *spina ventositatem*. Cujus vocabuli ratio satis spinosam sese exhibet investigantibus, & posset ab aliquo Helmontio videri excogitatum, nisi ab Arabum seculis ad nostra constaret pervenisse. Dubitat vero Severinus, an recte translatum sit: quod nobis supponendum. Est autem auctoribus spinæ ventositas, quando ab interna & in osse subsistente causa illud corrumpitur; quo differt a carie, quæ fit ab externa. Ventositatem ergo dictam vel quasi inflationem, quoniam tumor est, cum Pandolfinus, tum Severinus, optimi de hoc affectu scriptores existimant, spinæ vero, vel, ut nonnullis placet, quia sæpius Dorsi vertebrae accidit, vel quia dolor acutus, qualis spinæ infixæ in carnem, conjunctus est. Græci *τερεδών*, teredinem nuncupasse videntur, quod ut vermis Teredo ligna, sic spinæ ventosæ materia ossa perforet: etsi non unum hoc in nostro affectu occurrat, sed facies ei sit varia: ut mox patebit.

XCIV.

Quid

Tametsi vero ad ulcera cum osse subtus corrupto potius quam tumores pertinere rarissimus hic affectus, videri queat, quia tamen in ossis tumore primus est mali fons, unde & ulcerosam affectionem, non ulcus ossium vocat Avicenna, huc potius referendum putavimus. Siquidem existimandum non est, quamlibet ossis corruptionem ulcerosam hic intelligi, sed solerti distin-

distinctione est opus. Aliud enim est ulcus cui corruptio ossis supervenit, aliud quod ab acri sero eroso osse succedit. Spina Ventosa est osis a causa interna, sero scilicet corrupto & subsistente, tumor, cum superveniente ulcere, in totius ossis corruptionem tendens, desinensque, Vide M. A. Severinum.

*De Pedar.
rhr. cap. 2.*

CXVI.

Nunc, quibus potissimum, & qua parte contingat hic osium tumor dicendum est. Dixi ex quorundam opinione dorsi potius ossibus quam reliquis accidere. Verum non video huic asserzioni respondere experientiam, sed frequentius multo in artubus esse obvium: Imo, si audiamus Severinum & Petrum Marchetti, in ipsis articulis, quibus tamen alii jure album calculum negant, & omnia pariter corporis ossa ipsi obnoxia pronunciant. *Josephus Pandolfinus*, Medicus Firmanus, plerosque ejus oppidi pueros afflictos vidit Anno XIV. seculi currentis, & *M. A. Severinus* his tantum non solis contingere putat, unde & pertæsus inconditi illius veteris vocabuli *παιδαρθρονάκη* nominat, quasi diceret malum articulare puerorum: Attamen alii & in adultis observarunt & contrarium plane perhibent, ut Petrus de Marchettis, qui ad vigesimum quantum annum ut plurimum cum viros tum foeminas eo laborasse notat: Ut nulla sit causa cur novum hoc Severini nomen a doctis in civitatem recipiatur. Vide doctissimi Merklini in Pandolfinum commentarium.

Subjectum.

*Vide Mero-
bin. III, 3.*

*Singulari
de hoc off.
libro, Pro-
om.*

Obs. Chir.

*Ad cap. l. n.
26. § ad c.
III, 1. p. III.*

XCVII.

Causa tanti mali non est Menstrui sanguinis re-
O 3
licta

Causa.

*Comm. in
Pand. III,
pag. 114.*

lieta post variolas impuritas, ut statuit Severinus, quem prolixè, & quantum sat est, confutavit laudatus modo Merklin. Et sane cum hoc dogma duplici fundamento superstructum sit: Menstruum sanguinem esse natura corruptum atque impurum, & eundem talem esse materiam foetus; utrumque vero hoc sit falsitatis abunde convictum, facile patet, etiam hoc ipsum protenus omne concidere. Longe itaque rectius, ipso prior Pandolfinus asserit, esse humorem corruptentem, eumque vel acutum (acrem) vel falsum, atque nitrosum, vel aquosum phlegma, vel virulentum. Omnia enim hæc & competere possunt sero, & reapse in hoc morbo observantur. Neque acre & falsum idem esse quis putet, quod ipsum auctor prudenter & ex veterum mente distinxit. Tale itaque serum, quoties cetera sanis unum hoc accidit incommodum, vel sponte sua, & diuturna mora, vel a latente in ipso osse fermento maligno, acrimoniam prævumque morem contraxit: Quodsi vero simul in variis partibus erumpat, in ipso sero jam ante extitisse causam manifestum est: etsi non repugnet, morbum diutinum reliquam seri massam inficere, sensimque corrumpere, quod etiam evenisse videtur binis illis pueris, quos in exemplum adducit Merklinus c. 1. Uti omnia hæc Pandolfinus eleganter, etsi verbis Veterum utens, exponit.

XCVIII.

Mirum est & inter singularia referendum quod Lavaterum notasse legimus: se vidisse in Monasticæ vitæ

vitæ novitio, octodecim annorum, femoris spinam ventosam, ex qua facta sectione, nil nisi flatus exspiraverit, cum ægroti interitu. Hunc sane flatum, si causa mali fuit, valde acrem fuisse oportet, etsi magis sit credibile humorem qui eroderat, quacunque de causa in flatum fuisse versum.

XCIX.

Colligitur itaque sensim hæc materia, vel nulla ex manifesta causa, aut post variolas, aut luem Gallicam, aut post malignos morbos, vel in artubus, vel in cranio & maxillis, vel in vertebrais, vel sacro ileove uno aut altero, vel quocunque tandem alio osse, & sese insinuans, illud facit intumescere, ac rodit, id quod primum obtuso & remittente nunquam cum dolore accidit, mox vehementius redeunte: tum insignis fit, lancinans, ut æger referat, se veluti spina pungi: denique pars altius attollitur, & fit abscessus, id quod fere, annotante Severino, post alterum mensem solet accidere. Qui pure evacuato, tenui humore fluit, & sinum ostendit, quo dilatato, specillo os corruptum deprehenditur. Est autem varia illa corruptio, pro humoris vel erodendi, vel corrumpendi facultate. Nam si lenis & mitior humor, exasperatur fere, & excrescit tantum; si acris, veluti lima vel vermes, ut loquitur Pandolfinus, eroditur; si vero malignus, putrescit. Hinc Petrus de l' Argellata focile (id est cubitum & radius) totum putrefactum vidit. Joh. van Horn calcis os tantum in magnitudinem insignem adauctum, porosque ejus ampliatos, &

Morbi historia.

Vide Merkl.
in Pandolf.
p. 130. seq.
& pag. 217.

Chir. V, 22, 2.
Microsph.

Microtechn.
pag. 186.

mate-

Inst. Med.
III, cap. 154.

cap. VI. Pad.

Ann. ad c.
VI, no. 3, &
4.

materia cartilaginea repletos, colloſaque cruſta obductum os invenit: *Caspar Hoffmannus* pelvis oſſa in puero tam foraminulenta, quam nullum potuit eſſe lignum carioſum, vel putridum: *Severinus* carioſum malleoli os, maxillæ, & pectoris, item os mediæ tibię tumore tentatum vidit. Mihi quoq; in cadavere puellæ quod publice in theatro ſecui, ulceroſum crus reperi- tum cujus & tibia & fibula pene tota erat inſigniter acuta, quam etiam nū mecum aſſervo. Hæc autem tanta diverſitas non ab alio, quam humoris corruppentis diverſitate produci credendum eſt. Neque dubitandum & ante omnimodam corruptionem oſſis attolli carnes poſſe, ulcuſque oriri, & eſſe aliam ſpinam ventoſam in fieri, aliam in facto eſſe; etſi id nolit admittere doctiſſimus Merklin, adeoque Pandolfinum ſuum hic deferat. Nam & poteſt attolli os neque tamen corrumpi, & per poros tranſudans humor carnibus ſe inferre, & abceſſum facere, antequam corruptio ſolidiſſimæ partis perficiatur. Unde & teredinem Græcorum non exhaurire affectus latitudinem, ſed eſſe ejus tantum genus aliquod, puto eſſe manifeſtum: cum omnem ab interna oſſis parte provenientem corruptionem ſpinam ventoſam vocent auctores, eam vero variam eſſe oſtenſum eſt. Inſuper *Severinus*, aliam cum dolore, aliam ſine eo eſſe, aliam etiam cum febre: nonnunquam cum macie totius corporis conjunctam, prodidit, quæ de teredine dici non poſſunt.

C.

CANCER
Oſſis CEL-
SI.

Hic controverſiam movent auctores de Cancro oſſium Celi, cujus meminit L. VIII. cap. 10. an iſ cum
noſtro

nostro affectu sit idem: Primus Clarissimus Tulpus id movit, & affirmavit: negavit vero Hornius, quem rursus refellere tentat doctissimus Merklin. Sed ignorent mihi viri celeberrimi, si non satis intellectum illis Celsum putem excepto van Horne, qui se non satis explicat, brevitatem nimiam sectatus. Nimirum Celsus non loquitur de cancro ossis, sed carniū: Quod ipsum attente legentibus erit manifestissimum, sic enim ait: *Si (extensio) primis diebus omissa est, inflammatio oritur: sub qua & difficile & periculose vis nervis adhibetur: Nam distentio (an distentionem) nervorum vel Cancer sequitur, vel certum, ut diutissime alatur pus.* Hic nulla canceri ossis fit mentio, & loquitur Celsus aperte de Sphacelo, quem cancerum ipsi vocari, evicit Hornius. Quis enim non videt, ab extensione intempestiva; qua non ossibus, sed musculis vis infertur, nihil ossi metuendum, minime vero omnium spinam ventosam, at carni plurimum? Quod & sequentia deinde comprobant: dicit enim articulo ultimo, de communibus curationibus: *Gravius aliquanto est, cum ossis fractura carnis quoque vulnus accessit, maximeque si id musculi femoris aut humeri senserunt: Nam & inflammationes multo graviores, & promptiores cancos habent.* Ex quibus res patet manifeste: itaque frustra excitarunt hanc disceptationem viri de arte meritissimi, & fluctus in simpulo concitarunt, recteque sensit Van Horne, sed præcidit sermonem suum & plus quam dixit, lectoribus cogitandum reliquit. Ceterum ego talem quoque morbum hunc

Observatio
propria.

ris temperaturæ & sedentariæ vitæ quam consortii hominum amantior, conqueritur de dolore pedis, in ejus dorso insigni & lancinante: nihil apparet mali insipientibus. Ego spirituosus & volatilibus oleosis dissipare studens rodentem materiam, nihil efficio: Tandem post mensem dimidium ingens tumor pedis oritur, sine rubore: mox etiam coloris fit mutatio. Ergo emplastro pus movente utitur per biduum, & cum viderem illud ibi fluctuare, sed cutim nondum posse perrumpere, nihil cunctatus, aperire jubeo tumorem, immaturum licet. Fit ulcus, sanatur, neque tamen cessat dolor, sed mox in vicino loco denuo apparet exiguum foraminulem, ex quo tenue serum exprimo. Eo ampliato prius, & mundificato, iterum consolidationi studemus: quæ etiam succedit, verum alibi recrudescit ulcus, & variis foraminulis cutis perforata, sensim apparet: hic specillo immisso ad fundum, os metatarsi quartum asperum & scabrum offendimus, causam mali: quo cognito injectiones adstringentes mundantes ossa, & balsamicæ variæ adhibentur, dilatatur ulcus, etiam facta sectione, ut sat amplum fieret, sed os denudari tamen non potuit, adeoque insanabile hætenus malum, cum excindere totum non videretur consultum, relinquere fuimus coacti.

CI.

Prognosis. Quam difficile vero sit, spinam ventosam tollere, & ad suam integritatem os reducere, partim ex dictis patet, partim ipsa nos ossium natura docere potest, quam corruptam nulla ars restituere in integrum.

valet, sed sola natura: neque tamen hoc prius, quam omne quod corruptum est, auferatur, effectum dabit, cum enim nova calli materia per fibrarum ossearum tectitudinem affluat, ubicunque hæc pervertitur, quod ubique hic fit, tumore poros obstruente, illa permeare non potest. Ex quo patescit, nullum in consummata & vera præter excisionem remedium superesse. Quod si negligitur, non modo ne serpat malum periculum est, sed etiam ubi profusio puris aut feri augetur, & major fit exulceratio, ne cum ta- be committatur ægrotans, tandemque consumtus, in- tereat. Et hoc agnoscit sane, quisquis ipsius affectus naturam satis novit. Ex quibus eminentissimam Chi- rurgorum trigam, *Severinum, Marchetti & Hornium* nominasse suffecerit; quorum ille etiam antiquissi- mum Del' Argellata in testimonium advocat: Petrus ve- ro: incipientem, & minorem ossis corruptionem fa- cilius cedere antiqua, & graviori, nunquam tamen sa- mari ait, nisi remota fluxione, & sublato osse corru- pto vel igne vel ferro: Van Horne totam etiam ti- biam amputavit. Quamvis in incipiente aliquam spem faciant vulgaris viæ sectatores, omnes mor- bos eodem modo, id quod vocant methodice, enar- rantes: In cujus rei exemplum licet fortassis Pandol- finum citare, qui nulla non cumulat remedia, usque ad errhina & apophlegmatismos: quæ etsi in carni corruptione fortassis aliquid possent, perperam tamen quis etiam ad pedes aliaque ossa laudaverit.

CII.

Quamvis itaque ad præservandum hæc possent Curatio.

P 2

for-

De Pedartr.
cap. 20.

Obs. addi-
tam. ult.

Microtechn.
II, 2. 33.

Disf. Anat.
Pl. 6. 47.


Chir. III. 3.

cit. 1.

fortasse commendari, irritam tamen & hanc reddit spem, quod malum in fieri, ut loquuntur, adhuc constitutum, vix animadvertitur, neque adeo de remediis in futurum cogitari potest. Interea quia etiam in constituto assidue nova materia affluit, & viscera perennem, Guern. Rolancio iudice, fomitem suppeditant: neque tum sunt omittenda purgantia, sudorifera, diuretica, & si in capite est, errhina, cum reliquis modo ex Pandolfino memoratis, quorum apud ipsum exempla ubertim extant. Sed præterea etiam vulnerariæ potiones propinandæ, ex siccantibus maxime, ut Scolopendrio, Osmunda, & reliquis capillaribus & reliquis, quæ dulcorant acre serum: item ex Chalybe paratæ, magisteria ac tincturæ aperitivæ, Antiscorbutica quoque, & præ reliquis Lignorum, sarsaparillæ, chinæ, corticis Saccorillæ, ligni Guajaci & aliis balsamicis parata; in quibus est eximium Barbettianum: Angelicæ etiam, Pini, Myrrhæ, Theriacæ essentia, mistura simplex, & viperarum sal, quas supra modum extollit M. Aurelius. Sed Mercurius etiam, fortis ille ichorosæ corruptionis domitor est arcessendus: cujus inunctione, succedente salivæ fluxu, felicissimus Rolancius puellam hoc ipso affectu detentam sanatam memorat: Dum interim externe injectiones ex aqua Mercuriali, Vitriolo, Alumine, Balsamo Peruviano, oleo Caryophyllorum, Hypericonis, & si tanti est, Momordicæ, ac similibus tentanda est mali pertinacia: quæ tamen omnia fuisse frustra, experientia doctus, asserere queo. Itaque potius primo quoque tempore fiat incisio, nullo licet apparente tumore, ait Marchetti, osfis-

ossisque inæqualitas abradatur, si id fieri possit, si vero altius corruptum est, excindi partem cariosam ac putridam necessum fuerit. Si neque hoc fieri potest, ut in manibus & pedibus, juncturis, & magnorum ossium capitibus, van Horne imitandus restat, qui cum agnovisset affectum *in illustrissima Duce de Merode, & juxta consilium Argelata* (ejus verba refero) *non posset os morbosum removeri, necesse fuit, ad ultimam anchoram, amputationem scilicet tibiae procedere.* Non potest autem os removeri, propter ligamenta, tendines, & vasa conferta: Vel Marchetti amplectenda ratio, qui dilatato foramine sectione, spongia præparata, radice Gentianæ, medulla sambuci aut sorgi, cannulam jubet immittere ferream & mox cauterio actuali os inurere quantum perito artifici videtur, cavendo, ne tendines offendantur, metu convulsionis: vel trepano parvo (imo terebra) si internodium affectum est integrum, utrinque perforandum, & medium forficulis affabre, ad hoc paratis media pars eximenda. Reliquum curationis callum promoventibus, sarcoticis & epuloticis consueto more peragitur.

(0)



PARS ALTERA:

DE

Tumoribus quæ pluribus vel universis partibus accidunt.

I.

TUMORES
PLURIBVS
PARTIBVS
COMMV-
NES.



Actenus illi tumores expositi sunt, qui singulis partibus conveniunt; quos qui nunc sequentur, variis, iisque compositis fere solent accidere. Neque tamen omnes istos ad nos jam pertinere arbitror. Leucophlegmatia enim solis internis medicationibus cedere consuevit, & pertinet ad affectus universales, internis tantum non solis cedentes. De œdematosis vero qui totum crus, manumve occupant quidem, sed in carnosarum fibrarum interstitiis duntaxat hærent, jam actum est. Sed nec Herniarum genera tangi a nobis fas est. Ut enim Leucophlegmatia ad solos pertinet Medicos Physicos, quos vocant, ita hæ manuali unice operationi subsunt: Qui igitur tollantur, ex illorum, qui operationes istas tradidere seorsim, libris discenda sunt.

II.

QVI

Quæ autem cum externis maxime medicamentis, tum operationibus levioribus indigent, illi sunt.

In-

Inflammatiō, Abcessus, Gangræna, Sphacellus, Scirrhus, Cancer; & quæ de his participant. Qui, si postremum excipias, omnes prope a priori, inflammatione scil. pendēt, uti mox apparebit: adeoque ad illam possent referri. Sed quoniam tamen aliquando etiam citra eam videntur oriri, atque ita a Medicis fieri consuevit singula seorsim spectabimus.

III.

INFLAMMATIONEM solas carnosas partes pati, INFLAMMATIO.
Galenus L. de Tum. c. 2. memoriæ prodidit; quod secus est: Cum & cuti eam competere, ex Erysipelate constet, & membranis quoque glandulosis atque parenchymaticis partibus, sive visceribus, hoc est omnibus illis quæ sanguinem recipiunt, accidere, experientia testetur. Nam quoties omentum, hepar, pulmo inflammantur? quibus nihil est carnosæ pulpæ: ne quid dicam de Serrumis aliisque innumeris: quin imo nonnunquam ipsa ossa eam contingere fatetur Galenus, & plerique omnes, qui de spina ventosa scripsere, non obscuri auctores produnt. Etsi concedi illud possit, carnem præcipue, & facillime inflammari, quia tota est sanguine plenissima. Vide *Hier. Fabr. de Tum. p. ii. cap. V. plane cum his consentientem.*

IV.

Est autem Inflammatiō caloris naturalis in vehementem, & quasi flammeum in parte corporis conversio. Nam qui ad humores quoque & nominatim sanguinem extendunt morbum, cum contra recepta Quid:
dogma.

Subjectum.

dogmata, & ἀκριβείαν citra ullam rationem peccent, causam cum morbo, morbum cum causa confundentes, institutum suum mihi non probant. Calere enim humores nimium, & æstquare, non inflammari dicendum videtur: inflammantur vero potius solidæ partes & ex eorum occulto igne patiuntur incendium, non flamma quidem, sed rubore manifestum. Hoc enim certum est: ut omnis calor naturalis in sanguine existit, & cum illo in partes influit, etiam hic tanquam in subjecto causæ, calorem in sanguine considerandum esse: quem non semper inflammatio consequitur, alias in omni inflammatione febris adforet comes. Influit scilicet in partem naturæ conveniens, ibique inveniens incendii causam, efferatur in majus: quod quomodo fiat, explicandum est. Interim videri Sennertus potest, qui sanguinem esse inflammationis causam abunde probat. Quod si cui Galeni sententiam nosse sit animus, illam inveniet Meth. Med. L. XIII, cap. 6.

V.

Causa.

Ut vero cum eo facile hic in eandem conspiramus sententiam, ita nec illi nec Galeno adhærebimus amplius, ubi ad proximam causam perventum est: quam sic se habere existimamus. In sanguine esse ignei quid, quod calidum nativum appellamus; etsi enim non ignoremus, quid Dubitatores opponant illi sententiæ, securi tamen de his omnibus, tanquam certum istuc intrepide hic supponimus. Hoc autem motu & agitatione augeri, docet experientia. Non est igitur ambigendum, in partibus ubi fit inflammatio,
mo-

motum auctum esse. Is autem, cum vel intestinus sit, vel externus, quem fluminis vocant nonnulli, ille autem a peregrino fermento ac turbatione (quod novum, sed ineptius vocabulum magis ad palatum est quibusdam recentibus,) hic a corde contingat, facile patet, externum hunc, non intestinum accusandum: cito enim per totum liquorem diffunderetur, ut in febribus fieri, liquido patet. Unde itaque novum hic suscipiat incitamentum, dicendum est. Patrum memoria per affluxum fieri, αἵματος καὶ βίαιας in partem sanguine effuso, existimabatur. Hoc autem dogma cum circulatione sanguinis conglutinari nequit, quantum etiam laborem hic suscipias: Quin contra accidit, ut transmissus placide sanguis ex parte iterum non dimittatur, obstructis vel obsessis vel interceptis viis, quibus itur ad venas. Hinc stagnat ante ostiola, & dum alius continuo affluit atque impellitur per arterias, tumultuatur, & motu illo perpetuo ac præternaturali excitatur inclusus undulanti purpuræ ignis (est enim hoc igni omni familiare ac proprium) augescit, partes pingues & inflammabiles sanguinis rapiens veluti in flammam, sicque inflammationem constituit.

Modus.

VI.

Qua re nihil est planius. Nam ut calida, aromatica, & spirituosa vinosa motusque animi ad inflammationem subeundam sanguinem disponunt, sic vulnera, lapsus contusiones, luxationes, infixæ, & quæcunque tandem tubulatos carnis aliarumque partium fibrosarum meatus corrumpunt, pervertuntque, dispositum

Causæ præcedentes.

positum illico ad incendium invitant: hæc autem omnia ipsi remoram ponunt & circulationem sufflaminant. Quod si citra hæc oboriatur, obstructionem accusandam prodit, quod tumor omnis recens inflammationem mox habet sociam, modo in parte sanguinea excitetur.

VII.

Quæ, cum manifesta sint, nec fermentatione, nec effervescentia, nec salibus ad hæc opus esse, itidem manifestum arbitror. Nam quod nonnulli fingunt, salia obstruere poros partium, id ab iis qua talibus fieri, haut facile monstraverint, per accidens vero, cum terreis juncta iisque incocta, id posse præstare, lubens concesserim, etsi nondum videam, quomodo in magna ac notabili inflammatione hæc potius argui debeant quam crassum & coagulabile ex facili serum; ut illa in minoribus pustulis, scabie aliisque prædominari, ipsis vicissim concedendum puto.

VIII.

Consequen-
tia.

Signa.

Quibus ac-
cidat.

Differen-
tia.

Consequitur inflammationem qua cum calor coincidit, tensio primum, ac tumor manifestus, deinde ex ea dolor, & ubi major evasit, renitentia ac durities, ruborque adest, sanguinis per diaphanam cutim transparentis proditor. Hæc perpetua sunt ejus signa, quibus positis ponitur, sublatis tollitur affectus. Plerumque alias supervenit vulneri, ulceri, & reliquis nominatis: raro sponte & sine causa oritur. Nihil habet ab invicem discriminis: nisi quod a puriore latice suavius rubeat, a corruptiore obscurius:

Com-

Commenta veterum de φλεγμονῇ ἐρυσιπελαϊάδῃ &c.
nemo vel Lynceus cognoscet: nec refert quicquam:
nulla enim hinc curationis resultat diversitas.

II X.

Prognosis meretur attendi, quæ arctissime cum Prognosis.
curatione nexa est & ab illa pendet. Vel dissipatur
enim ac discutitur malum, sive in auras evanescant par-
ticulæ calida, sive resorbeatur quod partem in tumo-
rem attulit; vel in pus vertitur ejus pars, transitque
in abscessum; vel induratur & congelascit in scirrhum
sanguis; vel in gangrænam abit, ex qua dein sphacelus,
necrosis, totiusque partis, imo & vitæ, ni ocys ab-
scindatur, amissio.

IX.

Ad curationem jam animus applicandus est. Ut
vero de causa inflammationis dissentiant immane,
quantum a veteribus recentissimi scriptores, illis af-
fluxum, his detentionem causantibus, & liberum tran-
situm negatum euntibus, sic etiam in curatione ma-
xima horum & illorum discrepantia est, ut rem expe-
dire difficillimum videri possit: præstandum tamen,
nisi cum maximo artis opprobrio vel hanc nihil ha-
bere certi, sed ad ludificandum simplices excogitatam
esse, vel veteres aut recentes turpiter aberrare, & in
curandi ratione protenus deceptos, velimus fateri.
Primum itaque illorum, tum nostratium rationem
exponam, deinde qui possint locum & quando hæc
vel illa invenire, conabor ostendere.

X.

Cum ergo affluxum sanguinis putarent illi in-

causa esse, quippe cum calor & dolor attrahant, hunc quantocytus & ante omnia inhibendum censebant: Distinguere itaque tempora accurate jubebant: In principio V. S. instituere, & affluentem adhuc sanguinem per revulsionis modum abstrahere ad remotam partem; ubi vero ultra principium processisset inflammatio, derivationis ergo eandem fieri in propinquo jubebant. Tum, si impurus sit sanguis (ut fere nunquam plane immunem a labe, existimare licet) etiam purgatione κένωσιν moliebantur. De hinc detensiva ac repellentia administrabant statim, quæ vel refrigerantia humida, vel adstringentia sicca commemorabant: *Herbas Endivia, Solani, Sempervivi, Plantaginis: folia Quercus, flores Rosarum bol. Armen. Balaustia, Sumach, & alia vel aquea vel adstringentia: item amara, ut Absinthium, Agrimoniam: Pentaphylum* huc referebant quoque, vulnerarias sicciores. Non tamen diu solis utebantur, sed antequam extensione dolor oriretur: Id est antequam affluxus plenior, infarcto sanguine, pedem fixisset: Nam hoc facto, statim quæ dolorem compescant, Galenus adhibere suadet, cujus dignum omnino lectu est *cap. 2. Lib. II. Cur. ad Glauc.* Pargorica vero talia commemorata leguntur: *Radices Althea, Lil. alb. Malvam, Sambuci folia, Linariam, Anethum, flores Chamæmeli, Meliloti, Verbasci, semina lini, Fœnugr. crocum, axungias, mucilagines, olea: Galenus ipse mirum in modum oleam Rosatum commendat.* Illa tamen non sola adhibebant, sed cum adstringentibus: Unde Galenus Attalum reprehendit, quod Theageni, Philosopho Cynico, hepatis inflammatione

matione laboranti mera relaxantia (emollentia) adhibuerit. Alii ergo hic, omisſis paregoricis, quæ, ne dolor attraheret, admittebantur, mox discutientibus agebant, miſtis repellentibus, maxime ſiccis, quæ adſtringerent. Discutientia vero illa ſunt, quæ tenuitate partium penetrant & reſolvunt, qualia ſunt fere *Anethum, Abrotanum, Origanum, Meliſſa, Serpillum, Chamamelum, carvi, cuminum & ſimilia*. Quæ deinde augebant ſenſim, ſubtractis repellentibus, ſicque diſcutere tumorem & inflammationem ſolebant, quod niſi ſuccederet, ſuppurantia admovebant, & in abſceſſum degenerante inflammatione, illi proſpiciant methodo deinceps tradenda.

XI.

Ab his recentes ſcriptores recedunt, maxime circa repellentia, & deſenſiva, quorum uſum non modo putant circulationis dogmate protenus deſtrui, verum etiam illa, dum incraveſcent ſanguinem atque inſpiſſent, inflammationem potius augere quam reprimere. Neque venæ ſectionem probant, ſed ea omiſſa, diaphoretica interne exhibent, & ſudorifera terrea, quæ inepte ab iis alcalica vocantur, præ ceteris commendant, ab acido ſanguinem coagulante inflammationes fieri arbitrati. Externe vero applicare ſuadent calida potentia, baſamum ſulphuris, Vini ſpiritum, & ex diſcutientibus atque aromaticis fomenta, Emplaſtrum de ſpermate ceti, & ſimilia. Ut itaque, turbatis plane fontibus, hæreat aqua plurimis, qui non modo quid agendum, redduntur dubii, meritoque

ambigunt, verum & quo se vertant, & quomodo artem nobilissimam a calumniis salvam præstent, nesciant, quam, veteres tam longe aberrare prodentes, haut parum prostituunt. Si enim illi inflammationes inepte curarunt per tot secula, quis credat deinceps asserentibus, se intra paucos annos recte sapere præ illis cepisse, & non iterum falli, si decipi potuerunt majores omnes, quos ingenio & judicio acri longe modernos plerumque superasse, sine præjudicio libros ipsorum legentibus fatendum est. Si vero, quod concedi omnino debet, illi inflammationes, æque feliciter, ne dicam felicius recentibus sustulerunt, quid fiet de disciplina rationali, quam pro se allegant nostrates: cui repugnat & contradicit tot seculorum experientia? Itaque ostendendum est, in quo error lateat, & quid probandum utrinque atque rejiciendum sit, omnibus æqua lance sine ira ac studio, sineque arrogantia aut contemptu expensis.

XII.

Recte itaque in hoc recentiores pronunciarunt, stante circulatione sanguinis, quomodo affluere aliquid ad partes singulares, attrahi atque allici queat, intelligi non posse: hinc etiam nos a veterum dogmate recedere non dubitavimus. At cum pergentes, etiam causam negare, & ad acido inflammationem atque obstructionem derivare voluere, indeque adhibere in remedium alcalica pene unice jusserunt, merito reprehensionem vicissim incurrunt, cum ex falsa hypotheci ineptam curationem instituant. Siquidem, nullum est certum acidi indicium, & quæ alcalica vocant,

cant, talia neutiquam deprehenduntur: præterea acida intra corpus assumpta, ferventem potius sanguinem compescere observantur & congrumatum solvere, externe vero discutere tumores, si suo tempore admoveantur: ut de aceto conpertum est. Perperam deinde sanguinis detractionem prætereunt, vel etiam rejiciunt plane, cum nullum sit promptius aut generosius auxilium, quod duplici indicationi satisfacit: illi scilicet quæ ulteriorem affluxum, sive confluxum impedire jubet, & quæ collectum dissolvere. Nam dum pars effluit, alia quæ urgeretur mox versus locum afflicto, in inane venarum spatium succedit, & eadem opera æstuanti ac hærenti in parte subtrahitur noviter affluxurus, tempusque interim conceditur, ut se expediat, dumque subsequens subtracta sui parte, parcius & placidius illabitur, eluit molliter quod impetuosius ante impegerat. Quod autem diaphoretica interne propinant, externe vero efficaciora excogitant, & discutientia calidiora, magisque subtilium partium ministrant, laudi est, in eoque medicinæ dignitatem augent: utrum tamen his solis rem omnem possint ubique peragere, ipsi viderint, quibus curta supellex domi, & qui vastum illud materiæ medicæ æquor ingredi recusant, parvis navigiis ad littora Chemicorum proxima vagari contenti: unde sola isthæc fere solent commendare.

XIII.

Sane enim dum repellentia plane rejiciunt, falsa argumentatione ducti, non poterunt doctis probare sententiam: Est enim non una inflammationis ratio, sed

sed pro partium quibus contingit, natura diversa. Nemo nescit in oculorum inflammatione maximo cum fructu repellentia, etiam actu frigida adhiberi; imo in illa utramque facere paginam. In cristis ani, puerperis familiaribus, ubi summo & intolerabili dolore inflammatio exeruciat tenerrimam partem, unguenta consueta faciunt quidem officium, at nullum præsentaneum magis remedium quam aquam rosarum, in qua cydoniorum semina mucilaginem suam deposuerunt, linteo intincto, frigide admotam, experimur. Capitis dolor quoque ab æstu sanguinis actu frigidis mulcetur; & aceto rutaceo, rosaceo, & similibus aliaque multa licet comminiscere exempla de frigidis. Scilicet nititur hæc curandi ratio æternæ veritatis regulæ & fundamento Methodi tot evanidis machinamentis quorundam inconcussa: contraria contrariis expelli, ut enim aqua igni, sic frigidum inflammationi & nimio æstui sanguinis contrariatur, illumque extinguit vincitque. In hoc vero etiam decipiuntur, quod incrassare hæc sanguinem & altius impingere putent, non considerantes Defensiva non in parte affecta, sed extra illam applicari suis scriptoribus: quod Aqua pendens illos docere poterat. Deinde non semper actu frigida, nec ubique esse hæc admota, verum calentia: quod, dum a vulneribus inflammationem arcent suo lacte virginis Chirurghi, norunt optime, & semper observant. Sed etiam terrea & adstringentia non impingunt altius quod illi putant, & incrassant hærentem in partibus sanguinem, sed stringendo earum tum poros, tum vasa, impactum exinde, imminuto spa-

spatio expellunt: experientia in ophtalmia atque alias manifestante: etsi non omnibus locis, temporibusq; ut dictum, convenient, sed inter initia, hiantibus adhuc poris, & materia existente fluida, ut possit elabi; uti in contusionibus indeque exsurgente tumore vel sola frigidi ferri compressio juvat. Unde & nosse poterant, si attente legissent veteres, in magnis inflammationibus non facile frigida actu, sed calefacta ad moveri, quo pori aperti sint: & ne aquosæ ac adstrictivæ solæ agere jubeantur, plerumque admistum, aliquid illis fuisse tenuium partium, coagulationi ulteriori præcavendo, oxycratum scilicet, rosaceum, aut vinum, aut ex plantis aliquid: adstringentia quoque partes roborantium nomine usurpata. Sed & ipsi quod verbis negant re comprobant obnitentes: quid enim aliud agunt suis plumbeis, quam repellunt, quemadmodum & astacorum (quos caneros fluviatiles vocant) succum, plantaginis item, solani, sempervivi, aquam de spermate ranarum, concedunt, & defensivis vulgaribus substituunt; Nam quod in his alcali occultum fingunt, ex illis est, quæ cautione Arithmeticorum opus habent: salvo errore calculi: qui in his, accuratius subductis ex arte rationibus, facile ostenditur. Et ne huic soli adscribendum putent egregium, quem ex unguentis infrigidantibus percipimus effectum, sciant me inflammationes tam validas, ut etiam e longinquo adnota manu, ad duorum digitorum distantiam calor sentiretur, unguento Alabastrino & infrigidante Galeni æque ac de Cerussa, aliisque plumbeis plus vice simplici quam optime repressisse, magno cum ægri solatio.

R

XIV.

*Vide Aquap.
de tum. 1.
cap. 5. p. m.
14.*

*Vide Gal.
M. M. XIII,
16. & de
Comp. K R.
I, 4.*

*Lege atten-
te Aqua
pend. c. l. p.
m. 15.*

*Comm. in
librum de
Vitt. ac. p.
m. 381.*

Ex quibus patet, quædam in recentium doctrina esse admittenda, quibus veterum peritiam, (quod eorum erat officii) auxerunt; at non omnia ipsorum æque laudem mereri, sed in quibusdam necessarias esse illas cautiones, non in omnibus. Quod non ignorarunt illi, sed cum repellentibus caute incedere iusserunt, prout quidem septem ex Galeno cautiones in principio primæ partis allegavimus. Itaque distingue loca & tempora & res erit salva. Nam nec discutientia quæ sola atque una commendant, statim in principio convenire, vicissim monent antiqui, sed si subtilissima discutiantur, crassa remanere, & in scirrhum abire, haut immerito verentur. Itaque patet, antiquorum rationem & pleniorē esse, & tutiorem, verum tum demum speratum obtineri eventum, si quodlibet suo loco atque tempore adhibeatur: quæ ex specialibus Methodis addiscenda sunt. Unum adhuc monendum habeo, quod scrupulum injicere possit, de Angina quam nuperus Bontekoei discipulus Gehema, non repellentibus esse tentandam, sed gargarismate ex vini ardente spiritu, quo sæpius se cito eam dissolvissē, sibi ipsi est testis: quod quidem novum ejus experimentum non quidem omnino temere imitari velim, sed nec ausim prorsus rejicere, mēmor ejus quod legi apud Martianum, judiciosissimum Hippocratis interpretem, qui eum nunquam repellentia in angina suasissē, & a Galeno perperam ex methodo universali hæc fuisse præscripta, non contemnendis documentis ostendit, solis discutientibus uti præcipiens.

Quod

Quod etiam veræ methodo optime congruit : ut alias ostendetur. Attamen tot seculorum experientia in contrarium declinans, non est propterea prorsus rejicienda. Videri interim in exemplum curationis inflammationum Galenicæ potest, cum primis Galenus ipse, qui & hepatis, & cerebri, & oculorum inflammationes curare docet accurate L. XIII. Meth. med. capitibus aliquot, & deinde doctissima sub immortalis Conringii præsidio habita disertatio commentatoria in h. l. si ad manum sit. Nos jam ad suppurationem deduximus inflammationem, ad quam promovendam ubi frustra discutientia adhibentur, Medicus properare debet: Itaque & nos eo properamus: Fit autem tunc

XV.

ABSCUSSUS, ab abscedendo, ut Græcis eadem de causa ἀπόσκημα, quia in eo aliquid a reliquis corporis partibus abscedit: differt verò ab ἀποσπασία Hippocratis, quæ, & ἀπόσκηψις, ἀποσκήνυμα, eidem; aliis apothesis & metastasis dicitur: etsi recte dicatur, alium abscessum fieri αὐτομάτως, alium per metastasin. Est vero abscessus proprie dictus & restricta ad suos terminos voce, tumor, sub quo plerumque puris, seu materiæ purulentæ in parte aliqua fit collectio: etsi non repugnet, aliquando & alia ibi reperiri: Plinius suppurationes nominat, ea autem quæ præter pus in iis reperiuntur, admodum varia sunt, & aliquando maxime mira: quæ vide recensita a Sennerto.

II.
ABSCES-
SUS.

Quid.

Prax. V, 1.
cap. 2. & 3.

XVI.

Ex quibus facile patet, non a sola inflammatione Cause va-
ab- rietas.

abscessus esse expectandos, sed a variis etiam aliis causis internis externisque : ex quibus supernaturales minime sunt excludendæ. Etsi enim illa quæ rebus naturalibus similia sunt, ut ossa, lapides, vermes, & quæ alias in corpore p. n. deprehendi solent, non statim ἀπὸ τῶν ὑπερφυσικῶν promanasse, existimanda sint, tamen illa quæ a natura animalium nimis aliena sunt, ut ligna, testæ, carbones, non possunt pro naturæ partibus haberi: multo verò minus artificem manum pro-
dentia, ut acus, & stupæ contortæ cilindri, quos novimus in furas ac femora maximo & sensibili dolore adstantibus nihil ejus cernentibus, intrusos, & chirurgica manu facta apertione inde exemptos. Solent autem talia plerumque abscessus etiam producere, & ruptis iis vel apertis deinde cum pure ex mediis carnibus erumpere.

XVII.

Differen-
tia.

Magnam itaque abscessuum differentiam continens hæc causa & contenta constituit eaque etiam genuina & essentialis haberi debet. Alii videlicet, abscessus sponte sua & αὐτομάτως γινόμενοι observantur, alii per μεταστάσιν, alii per ἐπιγένεσιν fieri: sic enim discernere solertius lubet, ut per μεταστάσιν Criticos vocemus qui natura aliunde admovente materia nascuntur; per ἐπιγένεσιν vero, symptomaticos ex abundantia materiæ præter naturæ institutum turgentis oborientes. Sed spontanei materia rursus diversa prorsus impleri solent: alii scilicet humoribus, alii solida substantia, eaque vel naturali, ut sunt ossa corrupta, vermes,

mes, & similia, vel præternaturali, ut ferrum, glomi filorum, & reliqua quæ apud auctores commemorata leguntur. Sed illi quibus humor subest, rursus boni sunt alii, & laudabiles, exigui illi, rotundi, fastigiati, rubicundi, uniti & æquales, alii mali ac perniciosi, humiles, lati bicipites semirepentes Hippocratis, circa articulos ac tendines orientes: quæ omnia etiam symptomaticis evenire solent.

Diagnosis.

XVIII.

Horum autem omnium licet una sit, in univ-
sum indicatio, quod intus latet, esse educendum, hoc
tamen exequi non uno licet modo. Si enim ab in-
flammatione abscessus est, suppurantibus utendum, &
ut ad maturitatem perductus, vel sponte diffiliat ex-
pectandum, vel ferro aperiendus est.

Curatio

illius qui
ab inflam-
matione.

XIX.

Ubi itaque inflammatae partis locus aliquis ma-
gis intumescit & circa illam dolor & calor augetur, &
pulsatio quasi aliqua percipitur (Teuto id elegan-
tissimo & ex natura ipsa desumpto vocabulo effert, dif-
ficillime aliis nationibus pronunciando: *Es quurt*)
denique attollitur in acumen, ad suppurationem ten-
dere, & ibi collectionem fieri existimandum est. Qua-
re adjuvandus statim naturæ conatus, maturantibus,
& pus moventibus medicamentis: qualia sunt quæ c-
mollunt, mitigantque dolores, sive in cataplasma
seu unguentum, seu denique emplastrum redigere
commodius sit, quorum quod eligendum sit præ ce-
teris situs indicat & natura partium. Nam facilius

Indicans.

obediunt carnes: ubi vero circa tendinae, & articulos, vel etiam in glandulosis partibus pus movendum est, difficilius ac tardius res procedit, valentioribus ergo indiget. In illis igitur althææ, malvæ folia ac radices, Liliorum alborum bulbi, flores meliloti utriusque, Chamæmelum, Lini, Milii, Fabarum & Fœnigræci semen, Hordei, vel ex dictis postremis seminibus parata farina, adipēs, butyrum, olea & similia possunt sufficere, additis caricis, croco, vel aliis: quibus etiam in glandulis salivalibus & tonsillarum abscessu in gargarismatis idoneis cum successu fuimus usi. Vulgus butyro cum pane subacto & imposito solet pus movere; imo novimus qui pice sola omnes tumores calidos minoris momenti, feliciter curabat. In difficilioribus vero & frigidioribus abscessibus gummata & resinæ in auxilium trahenda, ubi empl. diachylon cum gummatis est celebratissimum, quod proinde vocant das Zugpflaster / quia dispersam materiam urget & colligit in unum, adeoque pus movet potenter. Est autem vehementer calidum: itaque in iis ubi moderatioribus opus est, cum aliis temperandum.

XX.

Puris signa.

Pure confecto, evacuatione opus est. Sunt autem ejus signa, si tenuis sit cutis, transparentis color albus; si crassior, versus acumen nigricantior, cum flosculo ex livido fusco, deinde mollitudo tumoris, & puris, manifesta fluctuatio: etsi pro loci ratione & cum crassitie cutis, tum & profundo abscessus situ non æque semper hæc appareant, unde profundis plane sectioni.

ctionibus non raro opus est. Igitur pure animad-
verso, id educendum vel sponte rupto abscessu, vel
aperto scalpello: nam Galeni rationem sequi, & dis-
cussionem puris tentare prius, minus tutum esse appa-
ret: interim enim pus acre reddi potest, & exedere,
vel corrumpere partes subjectas. Quare cavendum
quidem est, ne crudus fecetur perperam, ubi conce-
ditur mora: quod ex duritie & colore optime cogno-
scitur; non tamen & rursus in longum extrahenda,
si quid metuitur, apertio; & sæpe non expectata per-
fecta puris absolutione maturandum opus. Uti ejus
rei exempla tota die apud Chirurgos occurrunt, efflu-
ente serosa tenui & cruentata materia, & pure mox
postridie bono subsequente.

XXI.

Fit autem tutissime, si non sponte rumpatur ab-
scessus, quod ubi densior est cutis, raro fit, scalpello
apertio: neque ægroti consulendus est timor, sed eo
inscio, quasi aliud agendo, iusta mensura loco declivi
ferrum adigendum est. Quo facto, pus leniter ex-
primendum, & digestivo invitanda est pars, ut totam
prodat mali materiam, addito dein melle rosato, & si
sordidum sit ulcus, unguento apostolorum, fusco, vel
Aegyptiaco mundandum, denique consuetis sarcoticis
& epuloticis consolidandum est. Inter secandum vero,
ne pars nervea, ne vena, ne arteria paulo major, ne
musculorum fibræ secantur, cautio est, ne profundius
adigatur cultellus, aut apertura fiat ultra modum am-
pla, vel nimis exigua. Quodsi locus commodus se-
ctioni

Apertio.

V. Horn.
Microt. II,
1, 34.

ctioni non est, tum demum cauterio potentiali utendum, aut, si etiam hoc opus, (rarissime vero opus est) candente ferro urendum.

XXII.

Abscessuū
internorū
curatio.

*Prax. V, 14.
3. in calce.*

Hæc in iis valent, qui oculis sunt expositi: in profundioribus autem & altius abditis, difficilis liberatio est. Si viscus quoddam obsedit, discutientibus frustra adhibitis, naturæ opus committendum, cujus beneficio abscessum hepatis ex ipso abdomine pus effudisse conspeximus ad libram unam fere quotidie, sed funesto tandem exitu. Ubi vero hæc sunt immunia, non parcendum est, sed audacter secandum profundius: quod nisi fiat, ne introrsum erumpat alicubi, & gangrænam inferat partibus, metus est: cujus rei exemplum Sennertus narrat, ubi & bina alia ex Hildano reperies, qui alta admisione novaculæ inevitabilem ceteroquin mortis necessitatem declinavit. Addam quod notum & mihi, memorabile & lepidum. Matrona quædam, ruri vivens, cum ex ancillis quædam alterius mammæ inflammationem passa, ingentem ejus tumorem, & flammæ instar rutilantem summeque dolorificam amarissime plorans, ostenderet, adjiciens, se ferre amplius non posse, illa familiam lustrans, & forte scalprum excisori-um, quo fabri lignarii utuntur, manu gestans, ostendere mammam, jussit, eaque contrectata, cum pus subesse existimaret facile, magna violentia scalprum in eam repente conjiciens, ad ima adegit: Ruit in terram pallida & exanimis puella, ex mamma vero exilit puris bilibra plus minus: quo evacuato, & mun-

mundificato ulcere, insolita licet medicandi ratione, quam nunquam admisisset rogata, qua vero non admisa, ingens institisset periculum, servata est.

XXIII.

Hæc de abscessu bono, cui quod subest, sanguini debetur: qualis vel ex inflammatione est, vel illam tamen conjunctam habet: Sive jam sponte ortus sit, nulla alia prævia occasione, seu morbo primo vel secundo modo supervenerit. Horum qui symptomatici sunt, raro ad suppurationem veniunt, sed recedunt fere, ac evanescunt, crudi & rebellis humoris pleni. Critici non ut priores plane, sed pro loci & materiæ ratione, paulo aliter nonnunquam cupiunt curari: ut si ad glandulas materia desidat, vel maligna sit ac pestilens, quale quid observatur in bubonibus & carbunculis, contagiosa lue, obortis. Hic Theriacalia & quæ malignitati resistunt, adhibenda sunt, atque admiscenda, præsertim si ad suppurationem ventum sit; ibi fortius attrahentia & maturantia requiruntur: quorum effectus sæpe non expectandus, sed ante tumor perrumpendus est, ut jam supra monuimus.

Symptomatici.

Critici.

XXIV.

Alterum autem genus, quod non pure, sed quavis potius alia materia naturali vel non naturali scattet, alias curas postulat. Et in hoc quidem præcipue argumento explicando ille rarissimæ eruditionis Chirurgus M. A. Severinus, totus est, itaque hujus

Anomali.

de Recondita abscessuum natura opus unice hic commendandum: interim quid agendum, per compendium quoq; edifferendū est. Non est autem dubitandum quin materia, quæ intus est, unice hic legem ferat. Ea igitur probe expendenda, discuti an suppurari possit, an denique utrumq; recuset. Quo adverso, incidendum esse, patet, & quovis modo educendum quod molestum est, vel acri rodenteq; medicamine utendum, vel ignito etiam ferro sive per ipsa initia sive postea, ad eradicandum penitus malum adhibere placeat: etsi apud nos hoc fere extra usum sit, cum interim tamen non sine fructu aliquando usurpetur, ut in parotidibus ex febre maligna, in quibus generoso hoc remedio felicissime se usum narrat laudatus Severinus: c. l. quem vide. Idem vero in pestilentibus quoque admovemus maximo cum fructu, ubi nihil usitatus, neque salubrius quam anthraces exurere. Si vero abscessus talis ad suppurationem tendit, pariter adjuvandus, deinde, rupto eo, sollicite an quid subsit toto genere p. n. explorandum. Patet autem hoc, si ad superficiem est, ipsis oculis, si altius latet, ex eo, quod sanari recusat. Itaque specillo explorandum, & quovis modo educendum est, sive telum illud sit, sive ferramentum: eo enim non sublato, nunquam tuta erit curatio: soli plumbei globi, si non possint attingi, coalescere vulnera sinunt, neque tamen sine molestia retinentur: verum hoc ad vulnera potius pertinet. Quod si vero ossis particula abscescit, eximenda: si totum os quoddam corruptum sit, radendum est, vel siringa injectis variis corrigendum, iis præsertim, quæ supra de

*De Abs.
Crit. cap. 31.*

*Præternat.
continens.*

de spina ventosa memoravimus: etsi hoc rarius succedat. Memorabile exemplum ferri in abscessu faciei altius latentis apud Hildanum reperiens: & talia passim extant.

*Hildan.
Cent. III.
Obs. 24.*

XXV.

Neque de illis desperandum abscessibus, qui supernaturalia ostendunt contenta: solet enim Dæmonum vis tandem quoque medicamentis cedere, e ductis crassis humoribus, corporeque fortioribus purgantibus exterso: exemplum ejus rei extat memorabile apud Cabrolium, qui in abscessu cauterio aperto invenit pilos, ungues, clavos, castaneas, uvas, ficus, caseum, pulmentum, mel, ossa, aut eis similia, & animalcula quædam: quæ sane (nam illud *Eis similia* non nisi ad proxima his verbis referenda puto, certe ad clavos castaneas & uvas non extendetur temere) naturæ lege ibi nasci non potuere: tamen eum perfraxit; Quin etiam recrudescentem post triennium, & prodigiosa magis materia refertum feliciter iterum represcit, idque oleo vitrioli, sulphuris, & Mercurii: ut ait. In tali casu ergo post universalia ferrum & oleosa illa acerrima multum valere, hoc discimus exemplo. Commodum vero & fuerit, potiones vulnerarias præscribere, quibus plantæ addantur socia, quæ ab antiquis temporibus contra veneficia creditæ sunt valere, quæ recensentur cum alibi tum in Ill. Conringii Disseratione de incantamentis circa morbos.

Supernaturalia.

*Obs. Anat.
ZXVII.*

XXVI.

Ut Phlegmone sæpe in abscessum degenerat, SCIRRHUS.

S 2

idque

idque non omnino male, sic in scirrhum aliquando pessime. Hic Avicennæ Seriphos dicitur, nonnullis apostema lapidosum, non satis bene. Barbaris etiam Sclirus, a Græco sine dubio, σκληρόν, quod durus sit. Est enim scirrhus tumor durus & indolens, cum sensu vel exiguo vel prorsus nullo: A qua tamen regula exceptionem patitur musculosarum partium & cancrusus glandularum, ut mox patebit.

Quid.

XXVII.

Subiectum
scirrhi.

L. de tumor.
cap. II.

Contingit enim & hic partibus corporis permultis: mollibus scilicet plerisque omnibus, tam internis quam externis: nominatim vero musculis, visceribus, & glandulis. Sic vidi in hac patria mea in pelione quodam scirrhum totum brachium partemque pectoris occupantem: cui omni ex parte similis quoque Aquapendenti observatus est, qui: ego vidi, inquit, aliquando in spatulis, circa humerum & circa pectus scirrhum, qui agrotum interemit. In Hepate & Liene frequens est, & auctoribus celebratus pluribus: utero contingere Hildanus deprehendit: in glandulis Mesenterii quoque, puerorum præsertim, frequentissimus est, ut quoties atrophia ipsorum medicam manum eludit, nihil certius sit quam immedicabile hoc malum adesse, uti in defunctis & adaperitis constanter id deprehendi, ac nuper quoque mirabili ratione, quam anno huic Ephemeridum nostrarum inserendam transmissi. In salivalibus scrophulas fieri, ex supra dictis patet.

Causam duplicem potissimum veteres fecere, internam quidem, Pituitam, præternaturalem, & humorem melancholicum, naturalem: a quibus si exhalet quod tenue sit, crassum relinquatur, indurari in tumorem ejusmodi existimarunt: sive sponte id fiat, sive medicorum imperitia. Quod inflammato hepatis contingere, quoties nimis fortiter solventia adhibeantur, omisissis stringentibus, prolixè monet Galenus, & ex eo alii. Sed & tum fieri, ubi frigida actu & repellentia intempestive admoveantur, idem Pergamenus notat. Quæ quidem postrema ut recte habent, sic de prioribus si non sentire, loqui tamen aliter nos jubet posterior ætas, humorem melancholicum naturalem pernegans: Quin & pituitam indurari in dubium vocans.

Causæ ex veterum mente.

XXIX.

Videtur vero nostratibus in sanguineis visceribus per obstructionem retentum sanguinem, partibus subtilioribus discussis, consistere, & coagulari, dein in summam duritiem adduci, quod quidem ab acido fieri putant multi. Quandoquidem vero illius rei nullum est indicium, acidumque tam vehemens in corpore neque existit forte unquam, neque si esset, tantæ duritiei causa esse posset, utpote quod non nisi coagulat, rectius forte putaverim id fieri a calore ipso interno, ut in farciminibus fieri per cocturam, videre est. In carnosissimis vero partibus, & musculis serum potius crassum aut chyli crudioris partem subsistere,

Recentiorum.

credibile est. Quin imo pinguedinem membraneis in-
hærentem staminibus induratum intermistam esse,
non omnino ineptum, cum tale quid in dissectionis non
raro deprehendamus. Et hoc est quod dicunt au-
ctores hujus ævi, crassum, viscidum glutinosum &
frigidum humorem eum componere: quod alias uno
nomine pituitam veteres vocavere, eamque nil esse
aliud quam serum frigidum vel alia quadam occultiore
ratione, exhalante subtili, concretum, nimium hodie ma-
nifestum est. Ut adeo in scirrhus viscerum sanguineo-
rum calor sanguinem, in musculis frigus serum cogat,
mox eodem calore in justam duritiem excoquendum.
Præcedente ibi obstructione a sanguine, hic seri stagna-
tione, unde ut ille inflammationem sic iste œdemato-
sum tumorem sequi solet. Aliquando tamen utrum-
que misceri videtur, ut nuper in cadavere, scirrhusum
Lienis viscus ea facie qua externum latus & diaphragma
spectat, membranam crassissimam albidam & duram
instar cartilaginis ostendebat, altera qua dorsum, cru-
entum & ad nigredinem inclinans a nobis repertum
est. Præcedunt autem hunc scirrhum sæpe mensium,
hæmorrhoidumve suppressio, & quicquid ad cache-
xiam indirecta vel directa via perducit. Hinc Galenus,
sapientissime, ut solet: *tum scirrhus nasci potissimum,*
monet, si quod viscus phlegmone laborat, & crassis ci-
bis, succisque lentis quis utatur. At glandulæ quo-
modo indurescant, patet, idque facilius contingit in
pueris, ubi licentior diætā, & voracitas crassum, ipsius
ætatis indole legeque naturæ, chylum reddunt, segnio-
rem, & nimis impurum, adeoque aptissimum qui in
gland.

XVI. Meth.
Med. cap. 6.

glandulis hæreat: ubi volatilibus, subtilibusque particulis pulsis, subsistit reliquum, totamque receptaculi porositatem occupat.

XXX.

Scirrbus viscerum etsi non doleat, quoniam ipsamet sensum valde habent obtusum, pondere tamen suo, quasi lapis, proximis partibus incumbens, non tantum permolestus est, sed cum insuper affectorum actio cesset, sanitatem prorsus non raro perfundat. Itaque quantocyus curandus, vel potius, ne perficiatur, cavendum, & nascenti pro virili resistendum est: si enim perficitur, corrigi deinde amplius non potest: cujus rei reddit rationem, etsi ex veterum mente, sufficientissimam tamen, si quis recte ea sciat uti, *Hieron. Fabritius*, ut nihil desiderari possit. Neq; impune circumfertur in corpore scirrhus, ut innuimus, viscus. Si enim hepar vel lien affecti sint, hydrops certo sequitur. Exempla notavit *Hildanus*: & ipsa id ratio manifestissima dicitur. Intestinorum scirrhum idem recenset, Ileum induxisse in cæco, retracto in ileum. Scirrhus in utero sterilitatem infert, quod idem expertus affirmat, isque, quia attingi non potest, incurabilis est. Quod si prægnans sit mulier, partum impedit.

Prognosis
scirrhi viscerum.

De tum. c. l.

Obs. I, 61.

Obs. I, 65. 66.

Obs. I, 76.

XXXI.

Ast *Glandularum scirrbus*, difficilis est, eandemque habet cum priori rationem: quod ipse *Galenus* confirmat: nec minus ex eo consummato periculum, quia plerumque malignitatem contrahit, & in cancerum

Glandularum.
Meth. Med.
Lib. XIV.
cap. II.

Cent. II, Obs.

78.

Obs. VI, 75.

crum degenerat. Sic de mammarum scirrho memorabile exemplum reperies apud Hildanum, uti & de scirrho glandulæ bubonalis, apud eundem Chirur- gum expertissimum. Neque aliud esse scrophulas quam scirrhos canculosos, veterum testimoniis non minus ac ipsa re fecimus liquidum antea: in mesen- terio quoque, nisi mors præveniret, idem futurum arbitror. Quin nuper factum vidi, in illo puero, cu- jus Dissectionis historiam communicasse me Ephe- meridibus inferendam, dixi modo.

XXXII.

*Musculofa-
rum par-
tium.*

Denique is, qui in musculis oritur, si verus sit, (nam atheromata & ceteros tumores distinctim pro- posui) ubi major, summum in periculum ægrum in- ducit, estque prorsus etiam incurabilis. Vidimus in- pellione supra allegato, cui ex oedematoso scapulæ & brachii tumore sensim aucto & indurescente, scir- rhus oriebatur, usque ad extrema digitorum tu- more maximo extenso, & ex altera parte ipsum tho- racem occupante, horrendum exemplum, nullis prorsus remediis cedente malo, donec homo robu- stus, & ætatis optimæ, citra aliam affectionem, nisi quod immanibus doloribus, qui ex cancroso sero a- cerrimo orti, huic generi videbantur peculiare, ex- cruciatus miser, plerumque insomnes inter ejulatus noctes duceret, tandem interiisse. Eadem fuit illius quem Aquapendens vidit, fortuna. Vix autem in- horum utroque viscera immunia fuisse arbitror: nam solet talis externus tumor plerumque interiora ali- qua

qua in consensum trahere, contagio in eodem corpore serpente: quod tale est, ut etiam lactantes mulieres infantes inficiant, notante id rursus experto Hildano.

*Obs. cit. II,
78.*

XXXII.

Quamvis autem sit tanta mali atrocitas, tamen sine omni auxilio relinquendus æger non est, sed omnia potius tentanda. In scirrho itaque viscerum, præmissis universalibus, quæ eleganter exponit Aquapendens, emollientibus cum digerentibus ac discutientibus est agendum, sive sanguis sive chylus substituerit: ita tamen, ut in hoc fortioribus & calidioribus, in illo lenioribus & temperatis res peragatur: Cataplasma ex Althæa & ejus radicem cum pinguedine anserina, se usurpasse dicit Galenus, silvestremque malvam: quorum bina extrema emolliunt, digerit medium, his flores Chamæmeli, Meliloti Sambuci admisceri par est, & si scirrhus, quia inveteratior, discuti his, tanquam levioribus, recuset, gummata & resinæ, Colophonium, Styrax, Bdellium Ammoniacum postea arcessi possunt: non tamen initio, cum iis facile in lapideam duritiem adigi tumor queat. Galenus per initia butyro, resina, & cera candida utitur, non vetusta, Gummi porro Ammoniaco in aceto soluto, quod sæpe unum suffecisse affirmat, emollientibus alternatim succedere voluit. Vide ipsum, qui expertissimus, id cum primis laudat. Ex recentibus commodissimum hic esse emplastrum de Mucilaginibus, consideranti, ex quibus componitur, patefcet: nec dubito emplastrum.

*CURATIO:
Scirrhi viscerum.*

*Lib. VII.
x. y Vide &
de Fac. Med.
simpl. V, 7.8.*

*Defc. Ep. de
therm. pip.
p.m. 657.
Op. Chir.*

*Pathol II,
12. p. 391.*

de Ranis Vigonis fore egregiæ virtutis. Unguentum ad splenem induratum & emplastrum de cicuta Hil-
dani præstantissima sunt: nec minus egregium Fabri-
cianum videtur ceratum ex G. Ammoniaco aceto so-
luto, succo Tabaci, resina terebinthinæ: succo Ebuli, o-
leo de Capparibus & Cera, quo plurimos sanatos a se,
asserit. Meminit etiam spongiæ ex aqua calcis ex-
pressæ & exemplum curationis ea perpetratæ insigne
refert. Neque omittenda sunt interius exhibendæ
potiones humectantes, attenuantes, discutientes, ro-
borantes, eo ordine, ut si pituitosus, id est ex Chylo
coagulato tumor, ortus sit calefacientibus & inciden-
tibus utamur admistis; si a sanguine esse suspicio sit,
emollientibus & diluentibus felicius successurum o-
pus credatur, roborantibus ubique esse locum, siqui-
dem stringendo leniter, emollitæ materiæ expulsio-
nem adjuvant. Interim nec alia etiam interna ne-
gligenda prorsus sunt, vel hoc solo nomine, quod raro
scirrhus unus in corpore est, sed duplicatus, triplica-
tusve, quod non modo expertissimus Collega G. W.
Wedelius scribit, & exemplo illustri confirmat, sed ipse
quoque in apertis cadaveribus observavi. Non fru-
straneum erit MPil. Tartarear. Quercetani purgatio-
nem præmittere, decocta humectantia propinare &
diluentia, ut sunt lignorum: vel resolventia exhibe-
re ex ꝑ diaph. C. C. phil. parato: Crocus ꝑ sacharinus,
vitriolumque ejus ad roborandum partes idonea sunt:
licebit & dare antiscorbuticam misturam, simplicem,
seu de tribus, aliaque plura addere ejusmodi. Vide
Guilielmi Fabrit. Observ. Cent. II, 49. decoctum sple-
neticum insigne.

XXXIV.

Glandularum scirrhos Strumas constituere, parte priori ostendimus, & cum ibi curatio earum sit tradita, de ea amplius non est ut simus solliciti: id unum rursus notare lubet, cum tantus sit metus, ne cancerosam naturam induant, nihil tutius esse quam mature excindere: exemplo Hildani, qui omnino hic legi meretur. Etsi aliquando eisdem cedat, quibus viscerum scirrhus, remediis, ut apud ipsum rursus videre est. In iis vero scirrhis, qui oculis patent, cum materia nec in pus facile verti possit, nec discuti se patiatur medicaminum vi, scarificationes & cucurbitulæ in usum trahendæ; sunt enim, ut ait Sennertus, efficax plane remedium, ad ea evacuanda, quæ in alto hærent, & jam in scirrhum abitura videntur. Possunt vero istæ scarificationes Aegyptiorum more profundius institui, eo modo quo Prosper Alpinus docet. Reliqua omnia externa, præter unam excisionem, si forte minor sit & circumscripta concretio quale exemplum iterum Hildanus habet, irrita & inania usque adhuc deprehendimus.

GLANDULARUM.

Obs. Cent. II. 78.

Cent. ead. obs. 80. MVSCVLOSAR.

Prax. V. 1. 5.

De Med. Aeg.

Obs. III. 79.

XXXV.

Ut multo est Scirrhus ceteris tumoribus difficilior, sic CANCER scirrhum vincit: Græcis καρκίνωμα. Est tumor rotundus, nigricans, vel lividus, durus, immobilis, per initia quidem torpidus sæpe, post vero dolorificus, venas inflatas, liventes, & canceri pedum in modum recurvas ostendens circum: *Vide Aquapendentem.* In principio ciceris aut fabæ magnitudinem Cancris vix

CANCER.

I, 22. De Tumor. Quid.

Subjectum

Causæ præ-
cedentes.

Cent. II, 78.

Proxim.

Disput. de
Cancro
Mam.
XXXIII.

æquant, in processu ovum superant, venæ, ut dictum modo, in orbem nigro sanguine turgent. Malum oriri consuevit in oculis, naribus, auribus, labris, palato, fede, muliebribus, aliisque quibuslibet partibus, sed præcipue in foeminarum mammis: Et quidem a variis causis, quarum præcipua esse vulgo putatur melancholicus humor: argumento ex eo petito, quod nigricantior sit sanguis qui malum circumfedit: cuius tum in victu, tum suppressione evacuationum consuetarum, & maxime lienis pravitate, aliisque variis, causas quærunt. Quæ ut ex Galeni doctrina fluxere, ita mirum in modum hodiernis quibusdam displicent: Et hoc quidem non sine omni ratione. Hæc enim non esse adæquatas mali causas, saltem ex eo potest patere, quod non omnibus talia passis idem eveniat, aliis vero, alia omnia, pariter accidunt. Sic non ex lacte modo coagulato fieri in mammis cancerum, fidem gemina observatione *Hildanus* facit, sed etiam ex levi contusione, imo compressione paulo fortiore, si temeraria manus licentius lascivierit, ibidem oriri visus est. Scirrhum vero glandularum in eum facile degenerare, modo ostendimus: Idem vero & illo falsum ostenditur, quod, qui eum humorem gustare non sunt veriti, aliquando quidem acidum, aliquando muriæ admodum falsæ, nonnunquam & aquæ similem, deprehenderunt, in qua notabilis portio salis Ammoniæ soluta esset, observante id alicubi *celeberrimo Meibomio Nepote*. Quo tamen experimento non minus illorum, qui vel ad acidum, vel alcali in universum referunt canceri savitiem, sententia corrui-

Tametsi vero non semper bilem atram in causa esse, ex his constet; aliquando tamen esse, non licet forte ex toto negare. *Johannes enim Scultetus* observavit, ex obferatione pori Cholidochi in internis partibus cancrum generatum: semel in utero, semel iterum in colo, ejusdem bilis parte ad oculos apparente. Non est autem dubium, eam ex stagnatione vel sponte vitium contraxisse, vel acido accedente, acerrimam redditam, & cancrum inde natum: Recte igitur docuerunt hoc veteres, Galenus, Avicenna, Oribasius, ac reliqui prope omnes: cancrum oriri ab atra bile: talis enim fit, acido commixto: Neque obstat, quod bilem atram, vel melancholicum humorem non existere in corpore natura, contendat: ut enim hoc recte moneant, Galeni tamen interpretes omnes dudum de præternaturali sermonem esse monuerunt: quod an menti auctoris ejus consentaneum per omnia sit, licet possit dubitari, negari tamen nequit, atrum atque acerrimum humorem cum alias, tum in cancro non raro observari. Nam aceto, vel stillatitiis humoribus in illo similem perhibent; quoties acidus sit: atque eodem modo suam atram bilem describit Galenus, effusum nempe in terram, ebullire ibi, & fervere.

An bilis
atra.

XXXVII.

Est autem hic ubi increverit, omnium maxime & molestus, & periculosus, & lethalis: neque solum

Prognosis.

miserere eo ægri plerumque intereunt, sed miserius etiam, donec mors venerit, vivunt. Est tamen quædam ejus differentia non levis: Dum enim exiguo tuberculo malum circumscribitur, curari haut raro, nec difficulter potest: aliquando etiam relinqui, etsi non negligi se patiatur. At cum in ulcerosam degeneravit pravitatem, tum & summis doloribus affligit, & ferocit, serpit, depascit, non secus ac ferum aliquod animal, quod carnibus humanis vescens, non unquam satiatur, donec ad ipsum cor submisso veneno, vel sævis doloribus atque vigiliis confectum, hominem enecet. Non autem amplius fidendum illi est, qui venis circum lividis aut pallentibus tumet, tamen nec tentandus medicamentis, sed ferro extirpandus: si modo id fieri potest, nec altiores egit radices.

XXXVIII.

Curatio
non exul-
cerati.

Ad duplicem itaque hanc faciem curatio accommodanda. Primum omnium est, non exulceratum, non tangere, quod monuit *Hippocrates*; externis putata. Nam internis uti remediis, tantum abest, ut prohibitum sit, ut *Galenus* potius tales se curasse asseveret non paucos, idque purgantibus, *iteratis*, & *instituta optima victus ratione*, quibus promte succumbat, quod experientia nova firmavit expertissimus *Spigellii* discipulus, *Johannes Scultetus*, qui *solius decocti purgantis usu multos fuisse curatos*, liquidus testis est. Verum etiam si non tollat, tamen per diu cum tali possunt vivere: ut feminam, per quadragin-

draginta annos cancrum in mamma gestasse, *Hildanus* notaverit, *Tulpius* etiam quinquaginta. Hic dicat aliquis: tamen exempla legi, externis quoque egisse medicos nonnullos, idque feliciter. Sed hoc movere nos non debet. Ut enim difficile est, inter illa initia cancrum cognoscere, sic forte illi tubercula benigniora pro cancris acceperint; qualia strumas appellare *Severinum*, supra monuimus. Fugienda vero sunt emollientia præ ceteris, quæ illico, in usum tracta, malum exulcerant.

XXXIX.

In exulcerato major sollicitudo, imo maxima, Exulcerati. difficultas est. Præsertim si altius egerit radices: nam alias perinde ac alter, excindi etiam potest, quod postea non licet tentare. Ne quis ergo speret unquam se talem funditus curaturum, summorum medicorum auctoritas obstat: ineptientibus plane, qui soli *Hippocrati* & *Galeno* incurabilem fuisse putant, modernis vero quibusdam beneficio aleali sulphurei (σινδροξύλω) citra partis jacturam tolli. Arsenicum a multis quidem commendatur, & cum primis a *Job. Agricola* & *Petr. Job. Fabro*, verum istorum hominum non magna est apud me auctoritas. *Fallopium* tamen etiam & *Greg. Horstius* prædicant, sed non video ab aliis præstantibus & dignis fide viris confirmari, quin imo causticum ex arsenico cum maxima noxa adhibitum *Scultetus* vidit, & Doctissimus *Pechlinus* nihil eo in cancro mammarum se profecisse ingenue fatetur. Vide omnino *Hildanum*.
Itaque

Itaque vel totus cum parte tollendus talis, vel mitigantibus saltem & anodynis mulcendus est, non omis-
sis internis, acrimoniam sævi laticis infringenti-
bus. Fit autem hoc vel attemperantibus & diluen-
tibus, quæ in omnibus affectibus, ubi acrimonia hu-
morum, maxime vero atræ bilis affinium, regnat, lon-
ge sunt utilissima; vel pulveribus absorbentibus.
Præ ceteris inservit Lac, serumve caprillum, vel asi-
ninum, neque dubitaverim, decoctum pugillare,
quo, loco herbæ Thee, quædam propius ad malum re-
spicientia bullierint, præstantissimum futurum, ipsam-
que Theam maxime laudabilem. Hæc omni com-
petunt: quod si acidus sit humor, etiam terrea &
quæ vulgo absorbentium nomine veniunt, propinari
possunt, uti quidem Joh. Crato in sedandis doloribus
immanissimis lapillos cancrorum plurimum posse ait:
possunt vero eadem etiam inspergi, exemplo Sculte-
ti, qui tutiam, alumen ustum, lapidem Chrysolithum
(aliæ gemmæ parem referunt utilitatem) & scordium
socia. Et hoc quidem ad putredinem insigne est:
Verum & alia externa, eaque non una commendân-
tur: quæ antequam recenseamus, sudorifera quoque
laudanda sunt insipida, alexipharmacis mixtis, sed non
acribus valde.

XXXX.

Externa jam ut prosequar, pulveribus insper-
gendis accenseri debent etiam ea, quæ Felix Platerus
laudat, Cortices Granatorum, (ipsa balauſtia addi
possunt) Galla, Bolus Armena, Calaminaris lapis, ac
cremor

cremor calcis in superfusa eidem recenti aqua supernatans; Paucis: omnia terrea & adstringentia, sed non sola usurpanda, verum cum plumbeis maritata, quæ omne probavit ævum: etsi in illis ubi falsum non acidum in humore peccat, ut nonnunquam fieri, irrefragabilis experientiæ testimonio freti, asseruimus antea, aut veterum acre, sine dubio frustra adhibeantur. Ubi vero profunt, commodius in unguenta coguntur; vel sola cum oleo, vel cum succis plantarum, hic summe laudatarum: neque tamen earundem promiscue. Solanum præ reliquis omnibus commendatur, iamtum Galeno usurpatum, æque ac unguentum Diapompholygos. Reliqua nota sunt: Persicaria, Portulaca, Sempervivum, Geranium Robertianum, in quibus tamen minus est præsidii, temperant enim tantum, cum Solanum sit anodynum insuper. Præstantius est paulo Polygonum, Virga aurea, Scrophularia, & solatium illud vulnerum atque ulcerum, Plantago. Sed præcipue narcotica etiam profunt, Cicuta, Hyoscyamus, Mandragora, Tabacum: Quo refer & succum gammarorum, quorum Paracelsus meminit, cancerorum, & ranas, Helmontii delitias; item theriacam. Non autem emplastra tantum, quorū descriptiones innumerae apud auctores leguntur, verum & cataplasmata hinc fiunt, quorum in censum & Stercus humanum, nisi nimis esset sordidum, recipi posset. At Stercus vaccinum etiam conducet, & Humanum quidem internæ etiam prodesse, si quis devorare sustineat, anserinum externe, *Vide Eph. nostr. An. II. obs. 14.* Præter ista vero a quibusdam & poma putrida commendantur.

Supra laudatus doctissimus Meibomius Mercurium vivum conferre expertus est, & aliquando plus præstare quam plumbum. Etmüllerus quoque amalgama Mercurii cum Saturno laudat, quale quid etiam clarissimus Tulpus describit. Verum in exulcerato hæc: In non exulcerato irritam declarat. Si potestatem, *Obs. I, 47.* Bartholini *historia Anat. I, 7.* Expertissimus Wedelius, Magisterium Mercurii album a se inventum adhiberet: idemque inunctionem Mercurialem, si quid aliud, profuturam, conjectat. Istud mirum est, quod *Obs. XXIX.* narrat Petrus Marchetti, feminam cancro exulcerato nasi laborantem, solo unguento de cerussa potius ad dolorem sedandum, quam curationis causa præscripto, nec ullo alio remedio adhibito, brevi persanatam esse. In hac nec sanguinem infectum fuisse, nec aliud præter acidum illud peccasse, recte quis colligat. Ex emplastris Saturninum Mynsichti præstat, & Diaphulphuris Rulandinum, quod a Medico illo maximo, Guernero Rolancio, antecessore & Avunculo meo magno cum fructu usurpatum memini, cum adolescens ipsi domesticus, artis discendæ gratia adhererem, quod *Cur. ad Gl.* revocat mihi in memoriam Galenum, qui medicamentum ex Chalcitide in usu habuit. Hæc enim cum Colcothare, Rulandini parte, coincidit, etsi Chalcitis isto sit mitior. Alia vide apud *Phil. Jac. Sachs. in Gammarologia.* Quam necessarium sit etiam, aerem ad ulcus non admittere, discas ex *Tulpio c. l.* *L. II, S. 12, 4.*

XLI.

Tametsi vero hæc mitigent, non tollunt tamen

morbum. Est autem huic sævo ac refractario ultimum in sectione præsidium: Et quidem tam exulcerato quam non exulcerato par, non tamen facile isti adhibendum, quoniam & cum eo possunt ægri supere, modo coerceatur: tam crudele itaque remedium citra causam urgentem haud facile est tentandum. Ubi vero venis est lividis circumfusus, & graviora minatur, tum vero & non exulceratum tollendum esse, patet. Maxime vero exulcerato debetur excisio, modo commodus sit locus cui inhæret, ut in mammis maxime est, minime in utero, oculis, faucibus. Unde plerumque hic incurabilis, ad mortem sensim possesores abducens. Ubi vero patet sectioni, nec jam profundius abiit ac radicatus est, præmissa corporis præparatione sollicita, cultro vel incurvato instar falcis, si in mammis sit præsertim, ut vult Hornius, vel recto, sed lato tamen, ubi locus tale admittit, profunda & celeri manu fortiter prehensæ excisio fiat. Si mamma est affecta, separatio a musculo pectorali non cultro sed digitis molienda est, nec acutrajici semper opus. Vide Joh. van Horne elegantissimam Microtechnen. Facta excisione, sanguis non supprimendus est, sed ejus fluxui paulum indulgendum, ne recidiva oriatur: dein si radicum inhærentium suspicio sit, candente ferro admoto consumenda, si non, abstinemus ab hoc, & sanguinem sistentibus pulveribus vel liquore stiptico contenti simus. Exempla excisi canceri inhærentis variis partibus habet Hildanus: labio Marchetti, in quo novacula non forfice utendum esse, Scultetus te docere pote-

Parte alex.
ra §. 19.

Obs. III, 88.
Obs. XXX.
& XXIX.

Ad Tab. 43.
Obs. 52. seq.
Obs. V, 27.
28.

rit, suo sapiens damno; Mammæ, idem Scultetus; Ad radicem ocularis dentis extantis, itemque in mala, rursum Hildanus, ubi simul exemplum est bene præparati corporis, ejusdemque rei necessitas docetur. Sed de cancro satis: superest ultimum tumorum genus & terminus laborum, si tamen tumor est Gangræna & Sphacelus.

XLII.

GANGRÆ-
NA.

Quomodo
fiat.

GANGRÆNA autem dicitur affectio illa, quæ est in parte, dum emoritur: SPHACELUS vero, dum emortua est, ut eleganter *Hieronymus Fabritius* loquitur: Cum ergo utraque passio sit mortificatio, nec nisi gradu differant, una opera de ambabus agi, par erit. Ut autem in aperto est affectio, sic quo pacto fiat ut pars emoriatur, vivente & vidente homine, non facile dicitur: Difficile enim est creditu, cum vitæ principium, id asserente ipso æterno Numine, sit in sanguine, cumque eo manifeste influat, etiam mortis causam ex eodem fonte manare, nec qui fiat patet, si in eo vitium omne est, ut in circulum illo perpetuo redeunte, non æque omnia quæ tangit, illico destruantur affricta labe. Hunc igitur in ipsa parte corrumpi cum illa, ibique subsistere, putridæ instar paludis, certum est. Vulgo putant calorem partis extinguere: sed cum illa sibi proprium nullum habeat, nec alio gaudeat præter eum qui cum sanguine influit, non potest hoc dogma emunctæ naris hominibus placere.

Itaque forte non erit abs re, causas tanti mali Causa.
 propius intueri, & sollicitius rimari. Videmus autem
 oriri gangrænam tam a calore nimio, & quasi affante,
 qualis est in inflammatione gradus extremi, quam et-
 iam a frigore, quo pars affecta penitus mollescit: non se-
 cus ac pomis accidit, quæ glaciata, illico in putredinem
 abeunt. Notum in hoc est, per frigora iter facientibus
 pedes, manus, nares, aures emori. Aliquando & in-
 terna viscera id pati, memorabile testatur exemplum
 quod anno currentis seculi LXXXIV. in Polonia pa-
 tuit, cum hyems rigidissima magnam partem exerci-
 tus in hyberna sero tendentis, nova hostis insurgens
 confecit: Apertis cadaveribus, omnibus intestina,
 sphacelata inventa sunt. Simile contigisse Germanis
 anno M D LXXXVIII, a Gallis fuis, sed in extremis
 artubus, *Hildanus* memoriæ prodidit. Cumprimis L. de Gangr.
cap. 4.
 vero frigus in partes erysipelate affectas vel quavis a-
 lia de causa æstuentes injurium est: ut etiam manus
 febre ardente laborantis in aquam frigidam demissæ,
 sphacelatæ retractæ sint: plura exempla habent *Ephe-*
merides nostræ Acad. Leopoldinæ passim: & Gregorius
Horstius. Porro in quas partes humor acris post va- XIII, 57.
XIV, 104.
Obs. II, 4.
24.
 riolas, pestem, malignamque febrim decumbit, spha-
 celum prompte incurrunt, quod etiam contingit ti-
 biis acri sero hydropico inundatis, & liquore ex acu-
 leis animantium venenatorum perfusis. Raro etiam
 nulla prævia causa, ex sanguinis corruptione sponta-
 nea in corpore oriri observatur. Ulterius, contusio-



nes magnas, maleque curatas, & ulcera difficilia consequitur. Denique intercepto sanguinis circulari motu, non quidem in prorsus sanis, sed vicino vulnere aut fractura, vel scirrho laborantibus. Quorum omnium plura exempla notavit Guilielmus Fabritius, Lib. de Gangræna & Sphacelo: quibuscum, an possint componere suum alcali, qui huic & acido tantum non omnia acceptum ferunt, ipsi videant. Mihi sic videtur: non hic intemperiem, non acrimoniam solum sufficere, sed utrumque esse admittendum. acre scilicet falsum, vel aliud etiam, in peste, & ubi per metastasin gangræna nascitur, & in hydrope, manifestum est; At calidum & frigus in reliquis: Quod eo modo agere, quo ignis solet humidior, utique sum persuasus. Utraque vero causa non partis temperiem, sed substantiam pervertit, totamque corrumpit.

XLIV.

Symptoma-
ta.

Testantur vero immanes dolores lancinantes & urentes, quid fiat in parte; horror & rigor, quid fibrillæ sentiant; color vero mutatus lividus, nigricansque, quid factum sit: Pustulæ aut vesicæ magnæ falso sero refertæ cuticulæ adustionem ostendunt, nam a ferro candente pariter elevatur, & a subjecta cute abscedit, lineæ autem rubicundæ ex centro excurrentes, igneum sunt microcosmi meteoron, infausti præsagii: pulsus denique sensim subducens se, putridum foetorem, quem spargit membrum cadaver, spiritibus quoque necrosin inferri, persuadet.

XLV.

XLV.

Curationem non admittit Sphacelus: Nec Gangræna quæ integrum membrum, sive pes sive manus sit, ad corpus usque occupavit, sine ignominia artis tangi potest: Sed nec illius cura suscipienda est, quæ febrim acutam, & vomitum, & syncopticos insultus conjunctos habet, etiamsi non nisi extremam pedis infimamque partem infederit: Hæc enim signa lethalia sunt: sed illius demum, quæ modo orta est, ac nondum plane tenet. Et hinc quoque si a calore ortus fuit, sine ulla mora tempestive succurrendum, ne pars sensim emoriatur & brevi temporis spatio hominem jugulet: Nam exempla quidem prostant, quod aliquandiu sine ullo motu & sensu existentes partes gestentur impune, quale habet *Smetius L. X.* & vidimus ipsi in quodam Typolico, Juris studioso, post febrim malignam sphacelatum crus, cunctante medico & chirurgo, per integrum triduum, citra corruptionem partis vicinæ stetisse. Sed hoc in iis duntaxat contingit, quibus vel frigus admissum est acre, vel ex humoribus per metastasin fit sphacelus. Senes sæpe unica die pereunt, interdum pluribus juvenes, ut *Fabritius* recte perhibet. Idem dicit, raro se vidisse feliciter terminatam, quæ ab humorum affluxu eveniat. Si eam intelligit, quæ fit per metastasin, quod verosimile est, recte ait & hoc: Non enim admittit medicum ex peste, febre, & similibus oriens, quoniam Gangræna non perstat, sed sphacelus confestim adest, ejusque curam excludit.

Prognosis

XLVI.

XLVI.

Curatio.

De Gangr.
& Sphac.
cap. 13.

Ex quibus apertum fit, curationem aggredien-
tibus probe ante omnia expendendum esse, ex qua
contigerit causa: Si enim ab inflammatione oritur,
(quam fortis ligatura solet non raro inferre,) & sangvi-
nis urgeat copia, *Galeno* docente, vena secanda erit,
quæ ab ipsa parte laborante, sanguinem celeriter a-
vertat: tum potionibus refrigerantibus, quando cau-
sa continens non minus urget, est utendum, pulveri-
bus, aliisve cordialibus roboranda virtus vitalis, & a
sanguine arcendus inflammatorius calor: Huic inser-
vit cumprimis succus Citri, illius cortices, confectio Al-
kermes, Theriaca, Diascordium & Mithridatium.
Camphora quoque utcunque adhibita, vel propter
instantem putredinem in subsidium venire debet:
Externe epithemata cordialia, & spiritus instaurantia
odoratissima quæque ex usu sunt. His dum partes in-
ternæ & sanguis muniuntur, pars affecta quoque al-
tero oculo spectanda est, & defensivo cavendum, ne
latius malum serpat: egregium emplastrum, & quod
in usum servari aliquandiu potest, *Gu. Fabritius* de-
scribit. *Barbette* laudat Defensivum rubrum, aut
ceratum Vigonis: Unguentum Wurzii quoque, &
quod fortissimum est, Butyrum antimonii huic usui
commoda sunt. Quodsi interim altius inharere
malum videtur, scarificare profundius partem con-
venit, non curando, si venæ minores simul dissecentur.
Hanc lanienam crudeliorem visam, si reformident æ-
ger vel adstantes, simplex fiat, appositis cucurbitulis,
quæ

quæ sanguinem corruptum vel nimium incalescentem proliciant: hinc, post profundiores maxime, abluatur pars lixivio forti cui acetum additum sit æquali portione; vel incoctæ sint plantæ putredini resistentes, amaræ; vel aqua calcis, igneas particulas adhuc occultante, spiritu vini maritata, quam recentes Medici præprimis commendant. Sed scarificatione non semper opus est: sufficitque decoctum modo laudatum: sunt autem plantæ huic accommodatæ Absinthium, Ruta, Scordium, Carduus benedictus, flores Sambuci, Chamæmeli, Rosarum, radix Carlinæ, Angelicæ, Vincetoxici, &c. sane decocto tali ex scordio, Absinthio, Rosis, ruta, sale & aceto feliciter usus est *Bogdanus*: *Job. Mauritius Hofmannus*, amicus noster, farina Orobi, Scordio, Sambuci floribus cum aqua eorum destillata & Oxymelite simplici pedem restituit. Addi possunt & Aloes, Myrrha, Camphora: quæ quidem ipso etiam in principio mali, spiritui vini immixta, solent esse præstantissima, & vel sola sufficere, si præsertim spiritus theriacalis insuper addatur, & pars imbutis hac mixtura linteis involvatur sollicite, subinde renovandis. Olibanum porro, & Mastiche laudantur, eadem vi pollentes resistendi putredini, & balsamicis virtutibus clara. Unguentum Aegyptiacum in vini spiritu solutum prædicat *Ranchinus*, quod ubi profundius serpit, ex usu est. Salis quoque & Aluminis & Vitrioli magna est efficacia, unde aqua nigra Chirurgorum celebris est: Hæc non modo adstringunt, fibrasque partis roborant, ut possint expellere hærentem sanguinem, verum.

& hunc ipsum, ferique pravitatem emecando ac destruendo emendant. Alii aliis remediis utuntur: Memini matronam honestissimam decocto cerevisiæ lupulatæ cum pane & butyro in formam pultis, ex inflammatione gravissimi vulneris jam imminentem gangrænam coercuisse. Stercus equinum valde laudatur: R. F. equini g. v. coque lento igne in aceto acerrimo, colaturam R. & cum mica panis redige in cataplasmatibus consistentiam. Ioh. Crato sæpe se vidisse ait Gangrænam hoc victam sequente: Farinæ Lupinor. Fabar. a ʒiv. succi Rutæ ʒij Oxymel. f. ʒvj. lixivii. g. f. addito Scordii pulvere nonnunquam: Videntur autem farinæ tales ea facultate agere qua primo gradu calida valere dicit Galenus. Et his quidem Olibanum & Mastiche commode addi possunt. Cataplasma Euporiston contra Gangrænam proponit etiam Scultetus, ex sola Malvæ farina, & aqua Rosarum. Restincto incendio, & oppresso malo, danda est opera, ut corrupta separetur caro: quod obtinetur unguento Aegyptiaco, mixto digestivis, Apostolorum, & præ ceteris præstantissimo illo quod componere nos docet *Fabritius Hildensis*: dein obtegenda pars cataplasmate ex farina Lupinorum, quam mire prædicat, alterius tamen experientia, Cl. Et-müllerus, additis reliquis tum farinis tum herbis, & resinis supra enarratis. Meretur autem de modo præparandi hæc cataplasmata consuli ipse auctor doctissimus. Sed Operæ pretium forte est, audire & *Laz. Riverii* rationem: Sic ait: *Ego locos sacrificatos humectari jubeo spiritu sulphuris, quo caro mortificata*

Ep. Lib. II.

De simpl.
Med. far.

De Gangr.
Sc. c. l.

Cont. I Obs.
84.

&

& exusta est: post foveri jubeo totum brachium calide spiritu vini, in quo aloes & Myrrha infusa est, postea inspergebantur toti brachio pulveres ex Aloe & myrrha, magna quantitate, & supra pulveres admovebantur lintea spiritu vini madefacta, quo remedio per aliquot horas usurpato, brachium miraculi instar calorem nativum recepit, tumore imminuto: & Gangrana fuit extincta. Notari & hoc forte meretur, Joh. Petr. Fabrum unicam curam ejus in spiritu salis posuisse. Nam sal, inquit, acre & mordax quodcunque, si in spiritu salis rectificato solvatur, admiram reducitur dulcedinem. Sed quid de iis dicendum, qui liquorem insipidum jactant, domitorum tanti mali? Non de nihilo omnino est: vidit enim post omnia remedia vulgaria frustra tentata, colem ex Lue Grangrænosum Elegantissimus Medicus, Joh. Nic. Pechlinus, aqua non adeo acri ab empirico servatum.

De sulphuris Balsamo
mo Rulandino vide
Amman.
Med. Crit.
cas. XCIX.

XLVII.

His Gangrænae ex causa calida & inflammatione ortæ occurritur, quæ quia frequentissima est, plurima remedia adversus illam excogitata sunt, & in libris Chirurgicis plerisque, aliis morbi generibus omisis, sola memorantur. Diversa tamen non nihil est ratio illius, quæ ex principio interno, vel per metastasin generatur, vel sua sponte. Illa plerumque ut dixi, tam celeriter decurrit ad metam, ut locum medelæ nullum relinquat, sed statim Sphacelus adsit. Vidimus ipsi ex ardenti febre pe-

GANGRÆNA II. GEN.

dem & crus citius pene phacelosum quam Gangræ-
nosum, excisione totius mox tollendum: idque sic
fieri plerumque assolet, ut deliberatio de Gangrana
corrigenda, frustra instituatur. At quæ sponte gene-
ratur, etsi difficillime tollatur & sit plerumque letha-
lis, moram tamen aliquam concedit. Hic ergo quo
modo curatio instituenda sit, ex *Guil. Fabricio* po-
tissimum, qui optime omnium eam depinxit, trade-
mus: Primum injiciatur clister, ut alvus laxa sit, de-
inde sudorifera potio & alexipharmaca propinetur
sine mora. Inservient decocto & infuso, Radix An-
gelicæ, Contrayervæ, Levistici, Herbæ Cardui Bene-
dicti Fumariæ, Scordii, Rutæ, Diptamni albi nostratis
una cum radice, & Cretici. Diascordium, & reliqua
electuaria & opiata notissima sunt. Aqua theria-
calis, Alexipharmaca, Rob Sambuci internis potioni-
bus materiam præbent: Pulveribus ejusdem ordinis
& confortantibus C. C. Antimonium diaphoreticum,
Lapis Bezaar, terra sigillata & pulv. bezoardici com-
positi Salia fixa, & volatilia, crocus: quibus species
liberantes, theriaca & alia addi possunt. Misturæ
quoque bezoardicæ dictæ præstantissimæ credi de-
bent. Purgantia (quamvis qui istis in morbo acu-
tissimo & celerrimi motus locus sit, non video, præ-
sertim eo quo volunt auctores modo, inter initia
scilicet, præmittendis,) & Venæ incisionem minime
convenire, & hic notat auctor, & Barbette se expe-
rientia didicisse confirmat. Contra sudorifera, etsi
non semper sudor insequatur, tamen proficua præ-
dicantur, idque rectissime: continuandus ergo alexi-
phar-

pharmacorum usus est, & externe interim, ut in prior loco recensito sphacelo, agendum, scarificatione profunda, ablutione, unguento Aegyptiaco, fusco Würzii, cataplasmatibus, donec corrupta omnia sint consumpta: Et, quod non negligendum, ulcus diu tenendum apertum: donec scilicet internis præscriptis vitium feri, ex quo malum ortum est, correctum fiet: Nisi malis Barbettum sequi, viaque brevissima per ferrum candens totum exuere, & sub ipsis initiis e medio tollere. Quo quidem ego, si locus permittat, nullum esse salubrius consilium existimo.

XLIX.

Huic generi adnumeranda venit Gangrana quæ III. GENVS
ex scorbuto. ex summa humorum acrimonia scorbuto supervenire aliquando, Barbetto (nam apud alios vix legitur) observatum est, cui & peculiaria remedia adaptavit, signum ejus prædens, quod a pollice (pedis forre) initium sumere soleat, maculisque ac lineis subnigris se manifestare, quæ in crustam siccam degenerent, dolore aliquando nullo, nullo prorsus foetore. Commendat autem ad eam emplastrum ex semine Genistæ, Urticæ Romanæ, Rutæ, Absinthio, Gummi Galbano & Ammoniaco: Linimentum ex oleis Lumbricorum, Laurino, Rutaceo, cum Castoreo & spiritu vini, item infusum ex lignis, radicibus & plantis scorbuticis, de quibus ipse inspiciendus est, si affectus occurrat, quod rarius fieri existimo, modo debita scorbutici cura habeatur. Superest Gangrana ex frigore, quæ septentrionalibus regionibus, ubi frigus regnat intensius, est peculiaris.



L.

IV. GENVS
EX FRIGO-
RE.

Hæc ut natura a reliquis diversa est, sic non eadem ipsi debetur curatio. Quin imo dubitari posset, num Gangræna dici mereatur: Verum enim par est ratio caloris & frigoris, idemque in carnem humanam utriusque effectus, ut apertius constabit alias, & nunc vel ex hoc patet, quod neglecta abeat in sphacelum. Cognoscitur, si pars rubet, & dolor punctorius atque urens sentitur, quod accidit si mediocris est: si major adustio, sensus omnis amittitur, & nisi idonea adferantur remedia, putrescit quod affectum est male.

LI.

Curatio e-
jus.

*De Gangr.
e. Sph. c. 13.*

Præsentaneum huic paratum remedium est, vel nive, si ea in promptu sit, probe partes confricare, vel in aquam mittere frigidissimam: quo facto, postquam glacies totum illud quod corruptum est, circumfedit, sine alio auxilio sanescit, & restituitur. Hocque expertum & certissimum æque ac vulgatissimum populis Septentrionalibus solatium est: sed jam olim etiam multis retro seculis, Avicennæ scilicet temporibus, non ignotum fuisse, ostendit sæpe hic nobis memorandus Guilielmus Fabritius; Qui & exemplum recenset viatoris jam rigidi gelu, cui, in frigidam demerso, ita illud erupit, ut glacie quasi cataphracta ferrea contextus conspiceretur. Verum hoc cito fieri oportet, nulla mora: si enim ad ignem accedas vel leviter, non modo non juvat amplius, sed illico etiam,

etiam, ante quam adhiberi possit, pars computruisse
reperitur, nec in alterum dilata diem hæc immersio
utilis est. Cur autem salutaris sit, docebit Te Me-
dicorum decus magnum, *Pechlinus*, Libro de *aeris*
& *alimenti defectu*.

LII.

Post eam lenes frictiones adhibendæ, fotusque
ex lacte dulci, cui herbæ odoratæ & aromaticæ in-
coctæ fuerint instituendus: Rosmarinus puta, Laven-
dula, Mentha, Lauri baccae, Salvia, Origanum. Mu-
ria & hæc etiam iuvat, & Raparum decoctum. His
jam accedat, si major est læsio, sudor in lecto, the-
riaca vel mithridatio, vel bezoardica dicta essentia in
potu calido spirituofo, ut spiritu sambuci, vel simili
concitata. Illini quoque potest pars oleo lateri-
tio, ceræ, terebinthinæ, petroleo maxime, adjunctis
destillatis ex plantis supra laudatis vel aliis, quibus
penetrantissimis calor partis emortuus allecto novo
sanguine resuscitetur. Quod si magis desperata res
est, scarificatio, & unguenta exedentia corruptionem
adhibenda sunt, & ulcera excitanda, sanandaque ut
alibi docetur. Et hoc est quod in calcaneo PER-
NIONES solemus appellare, qui ad sphacelum sunt
gradus proximus.

LIII.

De GANGRÆNA peregrisse videri possem: sed
nulla de cauteriis ignitoque ferro facta est mentio:
quod

An ferrum
candens lo-
cum habeat.

quod tamen tot laudibus plerique Chirurgiæ doctorum extulere, præsertim etiam Hildanus: qui inces-
sit dictis acerrimis Wurziū, hæc paulo vehementius increpantem. Verum enim vero, quod potest ju-
cunda fieri & minus sæviēte manu, cur potius cum
cruciatu perficias? Ego autem tutis atque certis po-
tentialibus transigi cum hoc malo posse, si opus sit a-
liquo ejusmodi, sum persuasus, neque semper his o-
pus esse, præsertim si in tempore advoceris: Quin-
tota pars jam sphacelata sæpe illinatione butyri an-
timonii separata est. Ad rationes illorum qui ignem
præferunt, non difficile est respondere, quas idem
Guilielmus ordine recenset. Primum enim non
Arsenico, non sublimato quod videtur supponere, agi
necessum est, sed aliis potest indicationi satisfieri; æque
(quod ad secundum) determinate agentium ac ignis
actualis: Tertia objectio majoris momenti est, cito
scilicet operari ignea præsidia, medicamenta tardius;
esse vero periculum in mora. Sed neque hoc pla-
ne insolubile: alia enim quæ corrigant malum, præ-
cedant necesse est, nec nisi corrupta jam pars, reli-
qua sana, & extra periculum posita, tollenda est.
Nisi enim hoc supponis, quid poterit etiam hic can-
dens ferrum, unum aut alterum si tangas locum: neque
enim credo totum Gangrænosum quam late patet,
exurere licet, alias nervos omnino tangere necessum
foret, quod a perito Chirurgo non fieri, dicit ipse Hil-
danus. Ex quibus patet, non fuisse causam eidem tam
duriter tractare Felicem Wurziū, maxime, cum ejus
de nervis ratio non omnino sit contemnenda, ipse-
que

que cogatur fateri, non in ea convenire adustionem, quæ fiat ab inflammatione, gangræna. In secundo igitur genere, cum alexipharmaca & putredinem, coercentia cataplasmata sint aptiora, in tertia vero plane non sit his locus, quum nulla tam crudele facinus exigat ratio, in aprico est constitutum. Verum solet fere, nescio qua de causa, Hildanus Wurzio esse paulo iniquior. Cum quo non ita tamen facio, ut plane omne ignitum ferramentum damnem, sed in secundo genere, si æger sit patiens injuriæ, & videatur præ ceteris præstare; itemque cum pars exigua, & quæ nequeat excindi, corrupta appareat, ut casus sunt varii, non omnino pertimescendum esse arbitror. Interim de cauteriis quid ipse *Avicenna*, pro Wurzio allegandum dicat & fateatur, vide *c. l. cap. 17. p. m.*

803.

LIV.

DE SPHACELO restat dicere, qui ut est terminus postremus valetudinis, sic nobis quoque terminus hac vice, & extrema erit linea laboris. Sic autem vocatur corrupta partis substantia, quando citra spem omnem restitutionis emoritur, desinitque in putrilaginem. Ex quo patet, restitui eam non posse, nihilque aliud superesse, quam miserum, ut ait Celsus, sed unicum auxilium: ut cetera pars corporis tuta sit, quod mortuum est, abscindere. Hoc itaque, qua potissimum ratione fiat, edocendum est. Notandum vero, & hic properandum esse maxime, ut ex

SPHACE-
LUS.

Quid.

Prognosis.

Curatio.

Y

supra

supra dictis patet, tum saltem cum malum serpit. Duplex autem curandi ratio est, suo quæque loco adhibenda. Si enim infit sphacelus parti quam totam extirpare, aut non licet, aut non necesse est, quod rarius contingere solet, jubet Hildanus excedente remedio, quod vocant cauterium potentiale, consumere corruptum, & eschara mox cultello ablata, ut ulcera alia sanare.

LV.

Quoties autem integer digitus, pes, manus, brachium corrupta sunt, quantocyus excindenda, ne pars sincera trahatur. Ubi duplex occurrit dubium. Primum, quali instrumento id fieri debeat, alterum, quo loco. De priori Botalli sententia est, id perficiendum securi, vel simili findente, fortiter adacto, vel ex alto demisso cum pondere, quod ex suo auctore describit elegantissimus Hornius in Microtechnæ. Ex quo duplex beneficium jubemur expectare: Nam in momentaneo ictu, vix dolor ullus est, adeo, ut putent ægri, scintillam ignis in membrum incidisse; & præterea magna sanguinis profusio evitatur, dum in ferra ducenda nonnullam ducit Chirurgus moram. Verum quod ad hoc attinet, nullum esse ex Hæmorrhagia periculum, modo ligatura instituatur fortis, asserit expertus Van Horne, & Hildanus dudum monuit, ipseque aliquoties vidi. De cetero miris modis improbat eum postremo nominatus Vir Præstantissimus, & putat, ossa neutiquam æqualiter

æqualiter findi, sed comminui in frustula, quæ dum perioſtio adhæreant, indeque tarde abſcedant, multum negotii poſſent Chirurgo faceſſere: Quod non, æque Hornio, iudicio in his pollenti viro, metuum- dum eſſe, viſum eſt.

LVI.

Videri poſſet, dum crebrior experientia vel fir- maverit metum hunc, vel ſuſtulerit, nihil certi eſſe ſtatuendum, cum hunc poſtremum modum Guilielmus Fabritius inexpertus rejiciat, Clariff. Hornius vero alieno teſtimonio diffidens, laudare non audeat: Si tamen aliqua ſit eligenda ſententia, in partes Hildani lubenter pedibus irem: ſive enim experientiam con- ſulas, ſive rationem, utraque diſſuadebit hunc mo- dum. Ratio quidem, quoniam & cava omnia, ſi ſi- mul dura ſint ac rigida, per tranſverſum findi non poſſe, certum eſt, ſed vel acuto etiam instrumen- to percuffa, in frusta fortuita diſſilire; & illa quæ fibris rectis gaudent, niſi ad ductum earum adigas ferrum, æ- gerrime per rectam lineam dividi ſolent, omnium ve- ro difficillime per tranſverſum, neq; id æqualiter, ſi iti- dem duritie ac rigiditate gaudeant. Quod ſi cavitas in- ſuper accedat, fiet facile ut aliquæ fibræ adferri impul- ſum ſecutæ ductum ſuum naturalem, hinc vel illinc abripiant partem aliquam ſui, adeoque inæqualiter re- ſilient a ſociis. Experientia vero etiam hoc confir- mare videtur: Dum enim Lanii aut qui culinis præ- ſunt, partes animalium in frusta ollis percoquenda

discindunt, quod fit securi præacuta, maximaque ad-
acta vi, subjecta ossa neutiquam ad perpendiculum
frangi, sed inæqualiter, & ruditer disfilire, nec legem
recipere observantur. Idem ergo omnino in hu-
manis ossibus futurum, existimandum venit: ut hinc
Potali sententia minime recipienda, isque hunc mo-
dum potius excogitasse ingenio, quam ex usu
notasse, atque laudasse videatur. Adhæc Hilda-
nus, in tanta chirurgicarum operationum, quam ac-
quisiverat experientia, iniquus profecto fuisset, si mo-
dum compendiosissimum & tutissimum inexpertus
damnasset: Hæc ita videntur; dum ut dixi, res ipsa
& usus aliud docuerit: quod fieri facile per occasio-
nem posset, si & chirurgi hujus rei sint cupidi, & qui
præsumunt bello, tot occasionibus sese offerentibus, in-
conservationem humani generis proni, consentiant in
operationem ambiguam, sumtusque non magnos tali
instrumento fabricando impendere non renuant.

LVI.

Alter modus, ab omnibus usque adhuc proba-
tur: ut carnibus falcato cultro divisis, ferra os rescin-
datur, quem, ut perficere deceat, ubi prius aliud, quod
restat dubium, exposuero, paucis tradam. Est illa
vero de loco dubitatio, cum enim plerique in carne
viva, fieri sectionem oportere autument, alii in-
emortua eam jubent institui, eadem bona ex
hac electione promittentes. Et cum objici-
unt priores, altius sæpe malum intra carnes,
quam in cute appareat, perreptasse, ossaque ipsa cor-
rupis-

rupisse intimius, quoniam occlusus calor, humor-
que in imo magis putredini obnoxiam carnem ha-
beat; illi exurere cauteriis quod superest pravi, asso-
lent. Verum hæc nondum in salvo collocant istum
secandi modum, cum, si sanam partem igne tetige-
ris, evitari, quod cupis, dolor non possit, si eo ex-
tendere ustionem nolueris, de curatione certus esse
haut queas. Verum & crusta inustione producta,
obesse plurimum videtur, dum cohibet putredinem,
efficitque, ut in recenti sanitate facile novus fomes
malo non satis certo abolito subnascatur; maxime,
cum nec sanguis effluere, quantum sat esse, com-
mode possit. His atque aliis, quæ apud Hildanum,
legi possunt, nova illa methodus labefactatur, qui &
rationibus pugnat, & exemplis, eos, quibus eo mo-
do crura amputata fuere, non satis tutos esse, osten-
dens, & simul fontem erroris detegit.

LVIII.

Ad operationem ipsam nunc accedo. Hæc ali-
ter in minoribus partibus, ut digitis, aliter in manu,
aliter in membris integris tollendis institui deside-
rat. Et in digitis quidem non esse utendum forci-
pe aut tenaculis excisoriis, sæpe celebratus Guilielm.
Fabritius sedulo inculcat, sed novacula incisa cute, &
ligamentis in articulis separationem esse instituen-
dam. Idque in prima & secunda articulatione prom-
te ubique succedit. In pollice, si ad tertium os ser-
pere corruptionem contingat, ministro quatuor reli-

quos firmiter tenente, attrahitur ad se a Chirurgo pollex, sicque incisione recta ad carpum ducta, primo vel altero ictu totus pollex aufertur. At in mediis digitis, si tertia articulatio solvenda sit, hac fieri ratione commode non potest. Excogitavit ergo scalprum excisorium Hildanus, rotundum, qualia Scriniarii etiam, sed minora, ad cavata opera perficienda adhibent, eoque, manu in tabula locata, malleo valide percusso, uno ictu digitum a metacarpo separat. Hanc operationem a clarissimo quondam Collega, medicoque æque ac chirurgo felicissimo Henrico Meibomio, feliciter institutam novimus, uti reliquorum digitorum amputationis dicto modo peractæ exempla ipse narrat Hildanus.

LIX.

Manum vero in ipso carpo amputandam esse tradit, ligata, & fortiter retracta ad cubitum cute. Ad quod notare atramento lineam jubet quam chirurgus sequatur: minister cordatus teneat brachium, ipse cutim & carnem incidat, parumque deprimat manum, & celeriter operationem absolvat. Hoc optime procedere, anatome docet: Nam carpus non nisi externis ligamentis radio innectitur, quibus dissectis, decidit manus. Non est autem necesse, lineam ducere, neque enim potest aberrare, si tubercula cubiti radiique prominentia observet, & manum fortiter deprimat. Id tantum teneat, carpi os postremum duplex in cavitatem sat pro-

profundam inferi: adeoque introrsum nonihil inclinata cultri acie, cuspideque, ubi opus, insinuata, ligamenta difsecet.

LX.

Neque tamen prorsus rejiciendus est scalpro excindendi manum modus, a Sculteto, contra Hildanum, ut ipse ait, depictus: si enim digitus sic excindi possit, quidni & manus? Verum hoc habet incommodi, quod osia postrema carpi scalpro franguntur, ac deinceps tamen ab adhærentibus ligamentis liberanda, illaque abscindenda videantur, quia scalprum intra cavitatem rotundam penetrare non potest. Videtur ergo nihilominus Hildani modus, tanquam expeditior, præferendus.

Tab. XXII.
Fig. XV.

LXI.

Venio nunc ad artuum integrorum amputationem. Quæ ut est omnium operationum Chirurgicarum generosissima, sic multo plus & apparatus & difficultatis habet. Cum autem illa prolixè quidem a Guil. Fabritio, integro illo, quem toties citare necessum habuimus, libro; per compendium vero nuper a Doctissimo Hornio sufficienti ratione exposita sit, licebit mihi esse brevior. Primum itaque omnium apparatus ad eam necessarius omnis erit sollicite disponendus, ut in promptu sint, quibus usus esse possit, cum, si ullibi alias, hic celeritate quanta maxima opus habeamus; & paulo momento res deduci

duci in periculum possit. Dein, cardiaco propinato, & vel ad scamnum alligato membro, eum in modum quo vult Hildanus; vel fortissimis ministris idem tenentibus, culter falcatus in parte sana, ligatis probe infra supraq; vicinis, & attracta sursum cute, celeri manu circumducatur, & pariter, si unum os resecandum, abradatur perio-
stium, si duplex, *μαχαρις ενδεαδης* Hippocratis, in auxilium veniat, quo non modo periostium utrin-
que radatur, sed etiam intercedens inter utrum-
que ligamentum tendinosum pertundatur: tum ser-
ra ponderosa æqualiter ducta & adacta fortiter, os
tribus vel quatuor ductibus repetitis secetur; si ad
malleolos est malum, infra genu, si in femore, bra-
chiove, unius digiti interstitio a parte corrupta. Quo
peracto solvatur superius vinculum, nisi admodum,
recens sit sphacelus, ut nihil corruptionis superare,
possis esse securus. Proxima cura est, ut qui laxa-
tis habenis, prolixè erumpit cruor, sistatur. Ubi nec
ferro candente agendum, nec volsellis arreptæ arte-
riæ ligandæ sunt, sed optimum quia placidum & suffi-
ciens, Van Hornii remedium erit, quod protinus admo-
vendum est, si modo crepitus ille Lupi (quem rarissime
in Thuringia aliisque mediterraneis Germaniæ locis
inveni) sit ad manum: qua si destituaris, stuppa lo-
cum suppleat, Oxycrato & pulvere a Hildano descri-
pto turgens. Cui & colcothar utiliter additur, &
fortissime stringens alumen, quo uno Chirurgum
usum esse ad sistendum in hac operatione sanguinem,
Botallus testatur. Pulvilli autem seorsim parati exi-
gui

gui apponantur magnis vasis, & fungus vel stupa cum pulvere super illos applicetur.

LXII.

Sed non tacenda hic aqua styptica est, quæ in Anglicanis navibus probationem sustinens, magno præmio inventorem suum beavit. Hæc enim si adsit, non alio opus est remedio, etsi posset idem pulvis tutius forte adhuc illi superaddi, ut sit oxycrati loco. Vide de ea Joh. Cornelium Weberum, qui talem descriptum dedit: non tamen fortassis illum, qui tantam Serenissimi Britanniae Regis munificentiam proliciebat: Potest enim variis modis parare, & est mihi elegans, & paratu facilis ad manum, quem nulli alii cedere, persuasus sum, cujus conficiendi modum tradam alias. Nunc reliqua peragenda subjungam.

Obs. IV. 50
& 7.

LXIII.

Admotis quæ ad sanguinem sistendum apta sunt, unguentum defensivum adstringens, quale Hildanus cap. 13. vel potius 19. describit ex Chalmeteo, cum emplastro diapalma vel alio applicandum est, quo etiam cruciatim imposito, firmari fungus pulveribus conspersus optime potest, & denique fascia cruciata, quam Scultetus delineavit, contineri omnia. Hæc non ante tertium diem solvantur, ægerque interim cordialibus & refrigerantibus remediis, victuque tenui sustentetur, totumque brachium

Z

aut

aut femur bis de die oleo rosaceo vel myrtino un-
gatur; defensivum quoque cotidie reiteretur. U-
bi primus tandem apparatus tollendus est, in prom-
tu sint pulvilli parvi, albumine ovi & pulvere ad-
stringente inspersi, si priores sponte decidant, in
eorum locum substituendi: jamque etiam ossibus fi-
lamenta carpta, nec quicquam admoveatur aliud:
reliquum ulcus digestivis unguentis & mundificanti-
bus curandum, attracta sensim cute, & mox glu-
tino inductis linteolis arctissime adhærentibus, filo-
que per hæc traducto, non autem per ipsam cutim,
sensim arctetur: denique, ubi prius etiam os ipsum
catagmaticis pulveribus conspersum, particulas cor-
ruptas deposuerit, siccantibus & cicatrizantibus per-
curetur.

LXIV.

Unum superest monendum: Hildanum suade-
re, ut, ægro admodum debili, sanguinis profluvium
illico sistatur. Quem in finem cultro candente
ad secandam carnem utitur, quem vocat caute-
rium cultellare, quo vasa majora corrugentur,
sanguinisque profluvium omnino præcaveri possit:
& graviter increpat Chirurgos, qui hoc præstantissi-
mum remedium rejiciant, quo ipse aliquoties cum
fructu sit usus. Verum enim vero, cum metum
istum magnæ profusionis nobis ademerit penitus do-
ctissimus Hornius, & oculorum fides, & in ægro de-
bili tantus impetus sanguinis, qui pulveres repellat,
(quod

(quod ipse caufatur) neutiquam fit metuendus, præ-
terea igne actuali corrugatio nervorum fiat, maxime,
ut ipse fatetur, periculosa, summusque fit dolor, & in-
flammatiō facile excitetur, denique aqua styptica non
minori vi polleat quam ignis, nullo cum periculo
conjuncta, non video quomodo & hic locum habeat
ferrum candens, & aspectu terribile, ut vel solo ocu-
lorum intuitu ægrum exanimare possit.

Et nunc quidem de Excrefcentiis quoque appendicis
loco agere decretum erat: Polypo scilicet narium, Sar-
comate uteri, Natta aiiis, que similibus, quæ neque ad
tumores recte referuntur, nec ad reliquos ta-
men affectus chirurgicos pertinent, verum sunt
quasi excessus quidam tumorum: sed revocant ani-
mum aliæ, quæ eum sibi jam totum vendicant, curæ:

itaque in aliud tempus istæc quidem differre
cogor, & hic filum abrum-
pere.

SOLI DEO GLORIA.



GUNTHERI CHRISTOPHORI
SCHELHAMMERI

MED. D. ET ANATOMES IN ACAD. JEN.

P. P.

PROGRAMMA ANATOMICUM,

QVO

PHILIATROS SVOS

POSTREMVM ALLOCVTVS EST.

J E N Æ

Sumptibus JOHANNIS BIELKE. Bibliopol.

Litteris KREBSIANIS. 1695.

GUTHRIE CHRISTIAN
SCIENCE

MED. D. ET ANATOMES IN ACAD. HARV.

PROFESSOR OF ANATOMY

PUBLISHED BY THE
2 VOLS

FOR THE DIRECTOR

THE HARVARD MEDICAL SCHOOL
CAMBRIDGE, MASS.



Vod præſagiebat animus , lingua-
que ingratiis pronunciabat, cum po-
ſtremo in horto Academico vos com-
pellabam, NOBILISSIMI ARTIS CAN-
DIDATI, CVLTORESQUE EXIMII,
id nunc ad eventum plane ſpectare, notum eſt vobis o-
mnibus. Relinquenda ruruſum eſt patria , Vosque ,
O cariffima ſalutis publicæ ac felicitatis pignora, quæ a-
ſpectu veſtro toties exhilaraſtis, frequentia excitaſtis , a-
more traxiſtis docentem , una cum Academia hac flo-
rentiſſima deferendi mihi eſtis , & alterius curæ relin-
quendi. Non iſ erat animus cum ex Helmſtadienſi Ly-
ceo, in quo per integros undecim annos docueram, in
Parnalum hunc Salanum concederem : proruſque fu-
turum ſperabam, ut du iſ in patria, ad notos fontes , &
montium ſylvarumque amoena conſeneſcerem , & ad
latus Parentis, eodem officio hic functi, ſpolia mortalita-
tis olim meæ deponeretur.

Sed aliter viſum eſt illi qui res mortalium nutu tem-
perat, cujus imperſcrutabili voluntate nihil minus cogi-
tanti promovere pedem, ruruſumque migrare neceſſitas
imponitur ; quam, cum nondum ſatis agnoſcens, tergi-
verſarer adhuc , ægriuſq; avellerer, cum amore patriæ
retentus, & ſuaviſſimorum cognatorū, tum Celiſſimo-
rum Principum Clementiſſimo in me animo, eaq; grati-
quam nunquam ſatis potero deprædicare, ſubmiſſa devo-

4.

venetionerabor semper: ea subito intervenire, quæ nemo
eventura facile sperasset. Ex quibus illa propius videba-
tur innotescere, nec jam elicere, sed urgere, & impelle-
re nolentem. Postquam igitur

Talia secla suis dicebant currite fufis

Concordes stabili Fatorum numine Parca

parendū esse, intelligebam, & eundem quo illa vocabant.
Quo cum res esset perducta, recordabar Oslifragii, quod
in novissima anatome Vobis eram pollicitus, multumque
dolebam, eo me redactum esse, ut hoc nomen meum
expungere, & stare promissis, occasione destitutus,
prohiberer. Et jam convalescere ceperam, sarcinasque
componere, cum optata spes affulgeret, & pri-
mum vir quidam, mox puella elegans, vir rursus,
αὐτὸς ἑαυτῇ, in sectiones publicas destinaretur: qui singuli
rapacibus, quibus alienis bonis inhiaverant manibus, me
quoque occupare videbantur, & ex itinere retrahere. Sed
mira quadam evenit fortunæ volubilitate, ut priores,
carnificis manibus erepti, serius quam expectabamus,
terræ gremium subituri, evaderent; tertii cadaver in
horas expectatum, citius quam vellemus eidem com-
mitteretur, & postremam quoque hanc spem eluderet.
Qua decollata, cum solito more theatro Anatomico pe-
dem inferre haut liceret, ne prorsus officio deessem, quo
pacto vel aliquod memoriæ & amoris mei documentum
abituriens Vobis relinquerem, & animo menteque, exi-
guum saltem monentum vobiscum illuc versarer, cepi
cogitare. Qua in meditatione hærenti, temporis quod
vivimus ratio, meique ipsius conditio, argumentum
mihi singulare, suppeditare visum est, dum memoriæ
obtulit imaginem

§.
B I F R O N T I S J A N I,

Modo qui PATVLCIVS idem

& modo sacrifico CLVSIVS ore cluit.

Cum hoc enim biforini veterum Deo in limine ambiguo & loci & temporis constitutus & utrinque veluti ex alta specula in emetitum emetiendumque mare prospicientis subit animum recodatio, eorum potissimum quæ a tergo sunt: hoc est quæ vel publicis in sectionibus, vel alias me Præfide & profectore sunt acta. Clavem itaque claudentis & aperientis Dei mutuatus, clausam Theatri januam reserabo, & præcipuas observationes ibi olim obvias mentibus vestris, *suavissimi consories, & pars laborum istorum carissima*, recolendas obijciam: Præcipuas inquam, id est quæ rarius visa, vel aliorum forte diligentiam protenus subterfugerunt: non jactandi Vobis industriam meam gratia, à quo longissime animum abesse nostis, conscium scilicet sui, & non immemorem summorum in hoc studium aliorum meritum, sed quo istarum rerum memoriam apud vos refricem, & forte conservem.

Sex omnino cadavera per quadriennium quod ante hos aliquot menses elapsus est, cultrum subiere: in quibus multa quidem singularia, & rarioris observationis, naturæ quodam lusu occurrebant, sed quæ ego, quia ad scientiam parum vel nihil faciunt, soleo ferè negligere, aut certe non magni facere; tum verò ex communibus atque utilioribus sequentia exhibita fuerint luculenter.

I. Cerebrum vidistis, aliquando quidem ex parte corruptum, non tamen nunquam ad Vicussensi rationem per partes suas expositum: cujus ego viri incredibilem in hoc diligentiam mirari satis non possum, postquam præterita hyeme ad ejus ductum accurate vobis explanare omnia licuit, ita ut nihil forte possitis ulterius desiderare. At

II. Sinus ab eodem auctore descriptos semper non esse obvios omnes, etsi in diversis omnes fuerint refferati, perspicuum fuit: ita ut frustra quis expectet, minimum octo, quod ille ait, ad futuros.

III. Musculos faciei, colli, & qui intra fauces obvii sunt, semel vidistis omnes, nunquam non plurimos: quot scilicet temporis atque cadaveris conditio permisit detegendos.

IV. In ore membranam pituitariam, ejusque appendicem uvulam, observastis, hant paulo accuratius quam in libris descripta extat, idque in capite etiam Cervino, privatim dissecto, ubi multo luculentiora sunt omnia.

V. In linguae parte postica foraminula quæ ocellos vocavi, septem, ordine per superficiem posita, sub forma literæ V. bis demonstrata, quæ mox in Argentoratensi Academia quoque, cum id ibi innotesceret, fuisse notata accepimus. Lingvam ipsam, prout ab immortali Malpighio descripta est, accurate examinavimus, & quantum ad papillas & superficiem, a bovina diversam invenimus.

VI. In larynge novas valvulas, nunquam ab aliis visas, ter demonstravi.

VII. Glandulas salivales Rivinianas non semper proprio

proprio suo ductu gaudere, sed in Wartonianorum communem rivum lympham fermentativam plerumque effundere, aliquot exemplis patuit.

IIIX. Nukianam novam, quam sub oculo collocat, nullibi in homine reperiri, perquirentibus adversum est.

IX. Oculi musculos in orbita sua demonstratos, quales à Bartholino delineantur, eo non exempto, oculis licuit usurpare.

X. Auris structuram multorum animalium variam, & Labyrinthum avium pulcherrimum vidistis haud semel.

XI. Cor ad Lovveri ductum in fibras suas resolutum: canalis arteriosi & foraminis ovalis oblitterati etiã in adultis manifesta vestigia: valvulas quoque non uno modo præparatas vobis plus simplici vice exhibuimus.

XII. Pulmonariam bronchialem arteriam atque venam Ruyfchianas, à magnis pulmonum vasis diversissimas estis intuiti.

XIII. Diaphragma in cane, neutiquam verò in homine ex duplici musculo compingi, secus quam persuadere voluit eruditus Bartholinus Nepos, in omnibus cadaveribus conspeximus.

XIV. Ventriculi tunicas Willisianas, non tam aperte in homine quam canibus habuimus obvias.

XV. Quod etiam de gula fibris observatum est, in homine longè alio, quàm istis, ductu decurrentibus.

XVI. Mesenterio non nisi Jejunum & Ileum connecti, neutiquam duodenum vel colon, nisi exigua sui parte, contra quam vulgo persuasum est, experti sumus.

XVI.

XVII. Unde & Arteria mesenterica inferior vix talis est appellanda, cum maximam partem ad colon excurrat.

XVIII. Glandulas Peyerianas intestinales, longe plures etiam quam a Cl. auctore descriptæ sunt, in canum præsertim intestinis deprehendimus, potissimum in Ileo, ad valvulam coli, & cæcum.

XIX. Valvulam coli nil minus esse quam valvulam, conspexistis, sed pendulam Ilei ad angulum rectum colo inserti partem, ut

XX. Cæcum (in homine quidem, nam in avibus aliter res habet) nil nisi coli appendiculam, quo flatus & stercora retrograda divertant. ideoque tam arctum & plerumque inane, quia non nisi retentis & copia abundantibus istis, rectoque ductu ex colo regurgitantibus impletur: id quod in homine contingit rarissime.

XXI. In canibus privata opera dissectis, si id veniam datis hic quoque commemorare, novum chyli sub renibus aliquando receptaculū sese in conspectum dedit

XXII. Ductum pancreaticum, ut in avibus semper, sic in quadrupedibus aliquoties, in homine bis quoque duplicem, quod cum cera alba cum implevissem, jucundum erat. apprime spectatu.

XXIII. In hepate aliquando perexilem, aliquando magnum hepaticum ductum: quod in pathologicis usum habet.

XXIV. Uti & illud: intestinum rectum aliquando novum colon amplitudine æquasse; Ileum verò nonnunquam prope insertionem in colon tam angustum & exile fuisse, ut vix digitum admitteret.

XXV.

XXIV. Vesicam felleam illasam ab hepate separata m semper, sed semel tamen porum in hepate restitisse hiantem, ex quo bilis exstillabat: vesicula interim inflata non minus turgente, nec flatum ullibi emitte-
tente.

XXV. Aliquoties etiam ductum cysticum sty-
lum nec a superna, nec inferna parte admittentem,
cum bilis interim e cysti pressa libere efflueret, argu-
mento, suo pyloro eam gaudere annulari.

XXVI. Hujus in intestinum ingressum plerumque
cum pancreatici ductus osculo coincidentem, sed ali-
quando etiam unciam ab eo distantem.

XXVII. Renum structuram longe aliam esse
quam pingitur vulgo, clarissime compertum atque o-
stensum est, glandularum serie proxime sub membra-
na posita, tubulorum verò striatorum toto ordine
in ductus hiantis ureteris, ex pelvi emissos, turmatim
concurrente: papillarumque simul vanitas, & Cl. Be-
lini figurarum obscuritas animadversa est.

XXVIII. Renis succenturiati dextri talis structu-
ra, qualis in bibliotheca Anatomica describitur, sed sine
valvula: sinistri vero cum rene ejusdem lateris mani-
festa per venas communicatio obviam fuit.

XXIX. Highmorum pingere splenem bovis, non
hominis notavimus facile: nec obscuram celeberrim
Malpighii descriptionem huic satis aptari posse.

XXX. Testium virilium descriptionem Grafia-
nam veram videri, licet suillus videatur potius constare
ex Glandulis.

XXXI. In utero prostates ab ipso dictas glandu-
las adesse, sed vix humorem albicantem fundere.

XXXII. Tubas Fallopianas stylo sæpe impervias: sed flatui patuisse.

XXXIII. Et hæc quidem in visceribus observata fuere: In Musculis vero, quos aliquoties accurate omnes, paucissimis exceptis, prosecuti sumus, multa falso hucusque tradita fuisse, percepistis, aliqua nova, quæ hic commemorare longum foret, conspexistis.

XXXIV. Articulationes quoque omnes ac singulas, præsentibus quibus hæc in pretio sunt, non semel evolvimus, & accurate lustramus.

XXXV. Lamellas in maxilla, uti & in genu articulatione, & hic quidem semilunares, alibi alias, ex mediis ligamentis erui, præsertim capitis cum collo, ejusque motum super primam vertebra[m] prorsum retrorsum; super Atlantem volubilem demonstravi.

XXXVI. Arteriæ verticalis miram qua caput ac cerebellum subit, flexuram admirati sumus.

XXXVII. Radii ad cubitum superne in annulari ligamento sese rotantis motum, & contra hujus inferne super illum pronationem multa jucunditate sumus contemplati.

XXXVIII. Manifestam, nec tamen vulgo commemorari solitam in medio carpo articulationem invenimus.

XXXIX. Digitorum pulpam glandulas globosas pelucidas occultare, & stratum coccineum sub unguibus posuisse naturam, liquidò compertum est.

Denique **XL.** non aqua, non igne, sed ferro, ac cultri acie a cute separata cuticula, glandulas sub illa positas manifesto humorem exsudareprehendimus: ex quo veri sudoris fontes patuere.

Hæc

Hæc in theatro oculis vestris exposita sunt, Auribus aliud animisque oblectamentum erat paratum, cum manus ab opere cessabat, & ex illo in ἀνεγερτήριον nos conferremus. Hic per integrum prope semestrem, quantum scilicet a sectionibus & ossium emundandorum labore vacabat, Osteologiam vobis explanavi, ubi minuta quoque sectatus, connexionum, & præcipue articulationum omnium rationem curatius indagavi, earum divisionem in multis emendavi, & arcana in his condens Naturæ consilia non infeliciter forte detexi. Alia vice in infante recens nato dissecando (quantum quidem ejus, minime ad hoc vocatus professor meus intactum reliquerat) occupati fuimus, Sceletoque ex ossibus composito, osteologium infantilem, adhibita in auxilium Kerkeringii Osteogonia, sumus scrutati, & in quibus ab adultorum ossibus distent, instituta collatione, ostendimus: inde ad Cloptonem Havers sæpe digressi, ejus de generatione ossium sententias cum naturæ opere componere satagemus. Rursum alia vice de Ligamentorum, Membranarum, & porro alia, de Musculorum fabrica solliciti fuimus, quorum artificium atque doctrinam omnem prolixè exposui: in qua proh! quantas invenimus difficultates! quam innumera in obscuro adhuc delitescunt! quæ nulla ingenii vi, aut labore quamvis assiduo potuimus superare, deficientibus, vel falso recensitis anatomicis experimentis, quæ ad intimiora sese recipiens Natura, industriæ humanæ usq; negavit. Id patuit unum: Mathematica lege, magno judicio, maxima diligentia constructas demonstrationes J. A. Borelli in multis deficere, adeoque ad priora dilapsos nos nihil vel parum de motus animalis prima & vera ratione ad-

huc pernovisse. Hæ delitiæ fuerunt Hybernæ: quibus dum rigor ac gelu obsistebat, Floræ regnum ingressi, hortensibus indulgebamus: non obsecundantes Horatianis ad Taliarchum monitis, nec audientes dicto, si quando calida juvenus, & fervens ille sanguis ad alia omnia ætatem aptissimam vocabat. Quod ad Vos potissimum pertinet, AUDITORES, industriè, qui spretis illecebris æstivis, spretis hybernis dum alios compositionum, alios concitatis equis instituta nivalibus vehiculis itinera cursusque oblectabant, mihi vel disserenti, vel in intensissimo frigore profecanti constantia incredibili adhæsisistis. Et nunc quidem hinc abiens, alii qui præluceat vestris studiis, lampadem hanc traditurus sum: antequam tamen omnem ad vos aditum mihi præcludat nunc regnans Deus Clusius, quando per paucas adhuc dies commorari hic cogunt me negotia quædam domestica, ne pretiosum tempus sine fruge vobis mihi que effluat, si non omnino, at quantum licet, quod pollicitus sum, præstare constitui, aliquot demonstrationibus, discursu perpetuo comitatis, siccam anatomem exhibere, & ossa ex alio cadavere residua diffringere, ubi, tametsi medullam quam non unius generis ossa continent, educere, oculisque exponere vestris non erit integrum, internam tamen ossium faciem, variasque in calvaria potissimum, cavernas conspicietis. Huic itaque postremo conatui nostro favete, eoque peracto, si merui, Plaudite!

P. P. Prid. Cal. Januar. M DC XCV.

